

Peqqussutissatut siunnersuummut nassuiaatit

Nassuiaatit nalinginnaasut

1. Aallaqqaasiut

Inissianik attartorneq pillugu Inatsisartut peqqussutaat atuuttoq 2001-imiilli atuussimavoq. Piffissap ingerlanerani attartornermut tunngassuteqartunik misilittagaqaleriartornerup nassatarisaanik peqqussut pingasoriarluni allanngortinneqartarpoq. Allanngortitsisarnerit tamarmik annertuumik pingaaruteqartuusarput. Allanngortitsisarnerit peqqussutip atuisunut paasiuminaalliariorneranut peqqutaaqataasarsimapput. Aammattaaq pissutsit attartornermut tunngassuteqartut allanngoriartornerat pissutaalluni, matumani ilanngullugu ineqartunut maalaaruteqartarfimmik inissianillu piginneqataasalernissamik kissaateqarnerit, attartornermut peqqussutip nutarteriffiqeqarnissaa eqikkaarlugulu allanneqarnissaa pisariaqalersimavoq.

Siunnersuut matumuuna saqqummiunneqartoq ilaatigut inissianik attartorneq pillugu malittarisassanik atuuttunik ingerlateqqitanik imaqarpoq, ilaatigullu aamma najugaqartut maalaaruteqartarfiannik atuutsitsilerneq pillugu malittarisassat nutaarluinnaat imaralugit. Inatsisartut Ombudsmandiata inissianik attartorneq pillugu maalaarutaasarsimasut assigiinngitsut tunngavigalugit inassuteqaatigisarsimasai siunnersuummut ilanngunneqarput.

2. Peqqussutissatut siunnersuummi pineqartut pingaarnerit

Siunnersuummi saqqummiunneqartumi inatsisinut atuuttunut naleqqiussinermi, pingaartumik uku erseqqissaavigineqassapput:

- Sulisunut atorfinitsinneqarnermi inissiamik innersuussiffiqeqarsinnaatitaasut inissianik innersuussisarnermi maleruagassanik atuuttunik erseqqissaaneq.
- Attartortumut sulisunut inissiami najukkamini ukiuni arfineq-marlunni najugaqareernermini inissiamik attartukkatut nalinginnaasutut tigusinissaanut periarfissat.
- Ilaqutariinnut ataatsinut illuni illunilu affarleriinni ineqarnermut akiliutip immikkoortuinik iluarsineq.
- Imermut naatsorsuutininut maleruagassanik atuutsitsilerneq.

- Aserorterinissamik pinaveersaartitsinissamut akiliutip akilersinniarneqartarnissaanut maleruagassanik atuutsitsilerneq.
- Inissianik paarlaannissap ajornannginnerulersinneqarnera.
- Attartukkamik ukioq ataaseq tikillugu allanut attartortitseqqikkallarsinnaanerup tamakkiisup atuutsinneqaqqilerneru.
- Illup najukkap iluarsaanneqarnissaata isaterneqarnissaataluunniit kingunerisaanik attartortunut nuuttariaqartunut ajunngitsorsiassaqaqartarnermik atuutsitsilerneq.
- Ineqarneq pillugu maalaaruteqartarfimmik atuutsitsilerneq.

Tamatuma saniatigut Naalakkersuisut ineqarneq pillugu naalakkersuinikkut ingerlatsinerat malillugu arlalinnik iluarsisoqarpoq.

3. Pisortanut aningaasaqarnikkut allaffissornikkullu aqutsinermut sunniutissat

3.1. Pisortanut aningaasaqarnikkut sunniutissat

Peqqussutissatut siunnersuutip atuutsinneqalernissaa imminermi Nunap Karsianut aningaasaqarnikkut sunniuteqartussaannngitsutut naliliiffigineqarpoq. Kisianni ineqarneq pillugu maalaaruteqartarfiup atuutsinneqalerneratigut ineqarnermut aningaasaliissutit ilaneqarnissaat pisariaqartinneqalissaaq. Taamaattumik peqqussutissatut siunnersuummi attartortitsisut ataasiakkaat attartukkamut ataatsimut ukiumoortumik 100 kr.-inik akiliisarnissamik peqquneqarnissaannut aningaasallu Namminersornerullutik Oqartussanut akiliutigineqartarnissaat periarfissinneqarpoq. Ullumikkut pisortat attartortitaasa 12.300-t missaannik amerlassuseqarnissaat naatsorsuutigineqarpoq.

Ineqarneq pillugu maalaaruteqartarfiup ingerlanneqarneranut aningaasartuutit ilaatigut attartortut ataatsimoorlutik akiliisittarnerisigut matussuserneqarsinnaapput, tassa Naalakkersuisut attartortitsisumut ukiumoortumik ataatsimoorlutik akiliutissamik akilersitsiniartoqartarnissaannik peqqusippata, ilaatigullu sulianik maalaaruteqartarfimmut tunniussinermut atatillugu atuisut annikitsumik akiliuteqartittarnerisigut matussuserneqarsinnaallutik. Kiisalu atuisunut akiliut 500 kr.-iusoq aatsaat attartortoq suliakkiinermi tamakkiisumik ilaannaakuussumilluunniit taparserneqanngippat akiliutigitinneqartassaaq.

Najugaqatigiiffinnik ingerlatsineq annertunerpaamik imminut nammattussaavoq. Attartortitsisup imaluunniit inissianik aqutsisup ineqarnermut akiliut aqqutigalugu inissianik aqutsinermut aningaasartuutini matussuserniarsinnaavai. Attartortitsisup inissiaatai ineqarfittut immikkoortortanut aggugaapput, ingerlatsinermut, aserfallatsaaliuinermit illuatitsisarnernullu tunngatillugu aningaasartuutiviusut tunngavigalugit namminersorlutillu aningaasaqartunut.

Iluarsaassinissat isaterinissallu attartortunut inissianiit nuuttussanut taarsiissutissanut aningaasartuuteqarfiusussat eqqarsaatigalugit, aningaasartuutissat sanaartukkanut ataasiakkaanut ilanngunneqarsinnaassapput, taakkulu aqqutigalugit aningaasalersorneqarsinnaassallutik.

3.2. Pisortanut allaffissornikkut sunniutissat

Pisortat atuisuusut, tassalu A/S Inissiaatileqatigiiffik INI kommunellu, namminneq inissiaatiminnik aqutsisuusut peqqussutissatut siunnersuutip atuutilerneratigut attartornermut maleruagassanik atuuttunik nassuiaasinnaanerat ajornannginnerulissasoq naliliisoqarpoq.

4. Inuussutissarsiornermut aningaasaqarnikkut allaffissornikkullu sunniutissat

Namminerisamik inissiaatinik attartortitsinermit maleruagassat maleruagassanut maanna atuuttunut naleqqiullutik annertunerusumik allannguuteqartinneqanngillat. Taamaattumik matuma inuussutissarsiornermi aningaasaqarnikkut allaffissornikkullu sunniuteqarnissaa naatsorsuutigineqanngilaq.

5. Avatangiisinut pinngortitamullu sunniutissat

Peqqussutissatut siunnersuut avatangiisinut pinngortitamullu sunniuteqartussatut naliliiffigineqanngilaq.

6. Innuttaasunut allaffissornikkut sunniutissat

Peqqussutissatut siunnersuutip innuttaasut ataasiakkaat, tassalu attartortut attartortullu peqatigiiffii, inissianik aqutsisoq attartortitsisorluunniit pillugit maalaaruteqarnissamut periarfissaannik oqinnerulersitsinissaa naatsorsuutigineqarpoq. Tamatuma saniatigut peqqussutissatut siunnersuutikkut attartortut atuisinnaatitaanerata arlalitsigut ajornannginnerulersinneqarpoq. Paarlattuanik attartortut piffissaq eqqorlugu inissiamut aningaasartuutininik akiliineq ajortut sukateriffigineqarput.

7. Sunniutaasinnaasut annertuut allat

Peqqussutissatut siunnersuutip atuutilerneratigut ineqarneq pillugu maalaaruteqartarfimmik, attartortut pisortallu attartortitsisut akornanni aaqqiagiingissutinik isumagisaqarnissamut piginnaatitaasumik pilersitsisoqassaaq. Taamaalilluni maalaarutit suliarineqartarnerat sivikillineqangaatsiassaaq, aammalu attartortup periarfissai pitsannguuteqangaatsiassasut naatsorsuutigineqarpoq. Peqqussutissatut siunnersuut allanik annertuuninik sunniuteqassanngitsaq nalilerneqarpoq.

8. Pissutsit Naalagaaffeqatigiinnermut namminersulernissamullu attuumassutillit

Peqqussutissatut siunnersuut namminersulernissamik suliaqarnerup ingerlaneranut sunniuteqassanngitsoq nalilerneqarpoq. Naalagaaffeqatigiinnermut tunngatillugu Namminersornerullutik Oqartussat Danskillu Naalagaaffiata suliffeqarfiutai sinnerlugit Kalaallit Nunaanni Rigsombudsmandip akornanni inissianik pilersuinissaq inissianullu tunngassutillit pillugit isumaqatigiissuteqartoqarpoq.

9. Oqartussaasunut kattuffinnullu il.il. tusarniaaneq

Peqqussutissatut siunnersuutissap allaqqaarnera 2004-mi ukiakkut tusarniaassutigineqarpoq, ukununnga: A/S Inissiaatileqatigiiffik INI, KANUKOKA, Kalaallit Nunaanni kommunit tamarmik, Kommunit Kukkunersiuisoqarfiat, SIK, Sulisitsisut peqatigiiffiat, PPK, PIP, AK, IMAK, ASG, Siumut, Atassut, Kattusseqatigiit, Demokraatit, Inuit Ataqtigiit, Tele Greenland A/S, Royal Greenland A/S, Air Greenland A/S, Nukissiorfiit, Mittarfeqarfiit, Kalaallit Nunaanni Politimestereqarfik, Kalaallit Nunaanni Rigsombudsmandi, Inatsisartut Ombudsmandiat, Kalaallit Nunaata Eqqartuussivia, Inatsisartut Allattoqarfiat, Namminersornerullutik Oqartussani pisortaqarfiit tamarmik, Grønlandsbanken, Sparbank Vest, Deloitte, Price Waterhouse Coopers, Ejendomskontoret Igdlo kiisalu Grønlands Ejendoms kontor.

Ineqarnermut Attaveqarnermullu Pisortaqarfik tusarniaanermi atillugu akissutinik tigusaqarpoq, ukununnga: A/S Inissiaatileqatigiiffik INI, KANUKOKA, Paamiut Kommuneat, Maniitsup Kommunea, Nuup Kommunea, Qeqertarsuup Kommunea, Ammassallip Kommunea, Kommunit Kukkunersiuisoqarfiat, Sulisitsisut Peqatigiiffiat, PPK, AK, IMAK, ASG, Nukissiorfiit, Kalaallit Nunaanni Rigsombudsmandi, Inatsisartut Ombudsmandiat, Nunanut allanut Pisortaqarfik, Ilaqtariinnermut Pisortaqarfik, Piniarnermut Aalisarnermullu Pisortaqarfik, Akileraarnermut Pisortaqarfik, Inuussutissarsiornermut, Nunalerinnermut Suliffeqarnermullu Pisortaqarfik, Aningaasaqarnermut Pisortaqarfik, Aqutsinnermut Pisortaqarfik, Inatsisilerivik, Namminersulernissamat, Aatsitassaqarnermut Inatsisilerinnermullu Pisortaqarfik kiisalu Igdlo Ejendoms kontor.

Tusarniaanermi akissutit pissarsiarineqartut, inatsisit teknikimut tunngasortaanik kukkunernut kiisalu oqaatsinut tunngasortaanik kukkunernut amigaatinullu oqaaseqaatitaqartut oqaaseqaateqarfigineqaratik peqqussutissatut missingiutip allaqqaarneranut iluarsiiissutigineqarput.

Tusarniaanermi akissutit pissarsiarineqartut allat, siunnersuutip allaqqaarnerani najoqqutassat imaannut tunngassuteqartut annertunersaat matuma kinguliani saqqummiuteqqinneqarput oqaaseqaateqarfigineqarlutillu. Immikkoortuni tulliuttuni takuneqarsinnaasutut tusarniaanermi akissutit arlallit peqqussutissatut missingiutip allaqqaarnerani iluarsiinissamat tunngaviliipput.

Ineqarnermut Attaveqarnermullu Pisortaqarfimmit tusarniaanermi akissutit peqqussutissatut siunnersuutip allaqqaarnerani tulleriinnilersuineq malillugu oqaaseqaateqarfigineqarnissaat naleqqunnerpaatut isumaqarfigineqarpoq.

Missingiummi § 4-mut

Sulinermik inussutissarsiuteqartut kattuffii AK, IMAK, PPK aamma ASG ataatsimoortumik allagaqarlutik missingiummi § 4, inissiigallartarnermut tunngasoq oqaaseqarfigaat. Kattuffiit paasiuminaatsippaat Naalackersuisut kattuffiit tamanna pillugu isumasioqqaarnagit nutaamik peqqussutissatut missingiummi, utaqqiisaagallartumik ineqartitsisarnermi akiliuteqartitsinissamik periarfissiisumik suliaqarsimammata. Kattuffinniit tikkuarneqarpoq 2003-mi Naalackersuisunut isumaqatiginninniarnermi utaqqiisaagallartumik ineqartitsisarneq pillugu paasiniaanissaq isumaqatigiissutigineqarsimammata. Kattuffiit ataasiakkaat Naalackersuisullu akunnerminni isumaqatigiissutigisaasa allattorsimaffianni takuneqarsinnaavoq, isumaqatiginninniarnermi illuatungeriit utaqqiisaagallartumik inissiigallartarneq oqallisigisimagaat, taamatullu kattuffiit paasiniaanermut, sulisunut utaqqiisaasumik inissiigallartarnermi aningaasartuutininik appartitsissutaasussanik siunnersuusiornermik aaqquissuussanillu inassuteqarnermik kinguneqartussanut peqataanissaq piareersimaffigigaat. Aqutsinermut Pisorta qarfirmiit kiisalu Aningaasaqarnermut Pisorta qarfiup Isuma qatiginninniarnernut Immikkoortortaanit isummersuutininik isummanut taakkununga assingusunik saqqummiussisoqarpoq.

Peqqussutissatut siunnersuummi isumaqatiginninniarnernut akulerunnissaq siunertarineqanngimmat pisorta qarfiup kattuffinnit oqaaseqaatigineqartut tusaatissatut tiguneqarnissaat aalajangiunneqarpoq, taamaattumillu siunnersuummi § 4, imm. 2 naapertorlugu utaqqiisaasumik inissiigallarnermut akiliuteqartitsisinnaaneq peerneqarluni. Kattuffiit ataatsimoorlutik tusarniaanermut akissuteqarnerisa kingunerisaanik § 4 tamakkerlugu nutaamik oqaasertalerneqarpoq.

Missingiummi § 5-imut

A/S Inissiaatileqatigiiffik INI-miit inissiamik imm. 1, nr. 1-5 naapertorlugu innersuunneqartumik attartortoq sunik piumasaqarsinnaanera pillugu erseqqissaasoqarnissaa kissaatigineqarpoq. Imm. 2-mi allaqqavoq inissiap naleqquttumik angissuseqarnissaa pitsaassuseqarnissaalu anguniarneqassasoq. Inissiap pitsaassusaa angissusaalu pillugit sukumiisumik nassuiaateqartoqarnissaa kissaatigineqanngilaq, aalajangersakkami siunertaasoq tassaammat inissiamik innersuussinermi inissiamut aalajangersimasumut tunngasunik naliliisarnissaq, tassanilu suliat ataasiakkaat ataatsimoortumik naliliiffigineqartassallutik. Assersuutigalugu soorlu inissiaq pingasunik initalik angisooq, annikitsumik ineqarnermut akiliuteqarfiusartoq inissiamit sisamanik initalimmit mikisumit, annertuumik ineqarnermut akiliuteqarfiusartussamit pilerigineqarnerusinnaavoq.

A/S Inissiaatileqatigiiffik INI-miit inissiat inoqanngitsut imm. 4 naapertorlugu Naalackersuisuniit agguasseqatigiinnissamut aalajangersaavigineqanngitsut agguanneqarnissaannut aallaavissamik ujartuisoqarpoq. Imm. 1, nr. 1-6 naapertorlugu inissianik innersuussisarneq nr. 7-10 naapertorlugu innersuussisarnermit salliutinneqassaaq. Kommunit ataasiakkaat imaluunniit

Naalackersuisut nr. 7-10 naapertorlugu inissianik agguaassinissamut malitassamik sukumiinerusumik isumaqatigiissuteqarnissaq pisariaqartikkunukku, tamanna namminneerlutik isumaqatigiissutigisinnaavaat.

Isumaqatigiissuteqartoqarsimanngippat agguaassinerit imm. 1-imi tulleriinnilersuinerit taaneqartut malillugit pisassapput.

KANUKOKA-miit isumaqartoqarpoq imm. 1-imi allassimasut tulleriiaarneri allanngortinneqartariaqartut, taamaalilluni inissiat kommunep inunnik isumaginninnermik siunertaqartumik pisariaqartitai naammassiniarlugit taakku nr. 8-miit siulliutinneqalerlutik. Kommunep agguaasseqatigiittarnerup allanngortinneqarnissaa pisariaqartippagu, tamanna pillugu Naalackersuisunut isumaqatigiissuteqarnissaa kaammattuutigineqarpoq.

Missingiummi § 6-imut

A/S Inissiaatileqatigiiffik INI-miit imm. 1 pisariaqanngitsutut isumaqarfigineqarpoq, qinnuteqartut inissiamik neqeroorfigineqarnerminni inissiamik tigusiumanngissinnaammata. Naalackersuisunit tamanna isumaqataaffigineqanngilaq, qinnuteqartut inissiamut immikkut kissaatigisaat qinnuteqartup inissiamik tigusinissaanut akornutaasinnaammata, taamaalillunilu qinnuteqartup kissaataanut naapertuutinnngitsumik neqerooruteqarnermi qinnuteqartoq itigartitsisinnaalluni. Aalajangersagaq allanngortinneqarpoq, taamaalillunilu inissarsiortut kissaatigisaannut allattorsinnaasaannut tamanut matussusiisumik imaqalerluni.

KANUKOKA isumaqarpoq imm. 3 allanngortinneqartariaqartoq, taamaalillunilu sumiiffinni attartortitsinissamik ajornartorsiorfiusuni inissiat annerusut inissarsiortunut, utaqqisut allattorsimaffianni nalinginnaasumi allatsissimasunut init amerlassusaat apeqqutaatinnagit tunniunneqarsinnaanerit neqeroorutigineqarsinnaalerluni. Naalackersuisut tamatumunnga isumaqataapput, taamaattumillu imm. 3 allanngortinneqarluni. Naalackersuisunit allannguinissaq eqqarsarnartoqartinneqanngilaq, aalajangersakkamimi § 7, imm. 1-imi attartortut ineqarnermut aningaasartuutinik ingerlaavartunik akiliisinnaanngitsut inissianik tunineqarsinnaanerit pinaveersaartinneqarmat.

Missingiummi § 7-imut

Ombudsmandip 2004-mi novembarimi nammineerluni misissuinerminut atatillugu oqaatigaa, Naalackersuisut nalunaarusiornermikkut inoqtigiit isertitai ineqarnermut, kiassarnermut innaallagissamullu aningaasartuutininut matussutissatut amigarpata, attartortitsisut attartortitsinissamik itigartitsisinnaanerannik maleruagassamik atuutsitsilernerat isornartoqartinneqartoq. Ombudsmandip oqaaseqaataa Naalackersuisunit tusaatissatut tiguneqarpoq, taamaattumillu maanna § 7, imm. 1-imi inissarsiortut isertitaat pillugit paasissutissanik piumaffigineqarsinnaanerit inatsisitigut tunngavissinneqarpoq.

A/S Inissiaatileqatigiiffik INI-miit imm. 2-p erseqqissarneqarnissaa kissaatigineqarpoq, taamaalilluni qinnuteqartup utaqqisut allattorsimaffiini tamavinni allatsissimanermut sullissinermut akiliisarnissaa ersarinnerulersinneqarluni. Tamanna aalajangersakkamut nassuiaatini erseqqissarneqarpoq.

Missingiummi § 8-mut

A/S Inissiaatileqatigiiffik INI-miit aalajangersagaq paatsoorneqarsinnaasutut isigineqarpoq, taamaattumillu Naalakkersuisut aalajangersakkap oqaasertai allannortippaat, taamaalillunilu imm. 1 peerneqarluni. Imm. 2 allannortinneqarpoq, taamaalillunilu inissarsiortut kissaatigisaannut allattorsinnaasaannut tamanut matussusiisumik imaqalerluni.

Missingiummi § 10-mut

IMAK-imiit imm. 2-p allannortinneqarnissaa siunnersuutigineqarpoq, taamaalillunilu sulisut angerlarsimaffimmini sulisariaqartartut/piareersartariaqartartut kissaatigigunikku inoqutigiinni inuit amerlassusaannut naleqqiullugu inuit tunniunneqarsinnaasut inimik ataatsimik ilaneqarsinnaalernissaat siunnersuutigineqarpoq. Naalakkersuisut naalakkersuinikkut ingerlatsinerat, 2003-mili peqqussutissatut siunnersuummut atugartik ingerlatiinnarpaat, taannalu aamma attartorneq pillugu peqqussutissatut siunnersuummut nutaamut ilaatinneqarpoq. Naalakkersuisut naalakkersuinikkut ingerlatsinerat aningaasaqarnikkut tulleriiarinermut ersersitsisuuvoq, taamaattorli kommunit ataasiakkaat tamanna kissaatigippasuk Naalakkersuisut kommuneni ataasiakkaani allatut naalakkersuinikkut ingerlatsinnissartik ammaffigaat.

Missingiummi § 16-imut

IMAK-imiit allaffimmi pisortat akissaateqarfik 36 qaffasinnerusorluunniit naapertorlugu akissarsiaqartinneqartut pisortanut inissianut innersuunneqarsinnaajunnaarnerat, sulisunullu allanut naleqqiullutik inissianut innersuussisarnermi salliutiinnarneqartalernissaat naammaginartuutinnigilaat. Naalakkersuisut naalakkersuinikkut ingerlatsinermi ilaatut allaffimmi pisortat akissaateqarfik 36 qaffasinnerusorluunniit naapertorlugu akissarsiaqartinneqartut pisortanut inissianut innersuunneqartarnerat atorunnaarsereernikuuvaat, tamannalu 2003-mi attartorneq pillugu peqqussutip allannortinneratigut pereerpoq. § 16 tassunga nangissutaavoq.

Missingiummi § 19-imut (maanna § 18-inngortumut)

Aalajangersagaq § 18, imm. 3-nngorlugu allannortinneqarpoq. Aalajangersagaq imm. 4-mik aamma 5-imik nutaamik ikkussinikkut erseqqissaavigineqarpoq.

Missingiummi i § 20-mut (maanna § 19-inngortumut)

Aalajangersagaq § 19-inngorlugu allanngortinneqarpoq.

Missingiummi § 21-mut (maanna § 20-nngortumut)

Sulinermik inuussutissarsiuteqartut kattuffii AK, IMAK, PPK aamma ASG ataatsimoortumik allagaqarlutik oqaatigaat, Naalakkersuisut kattuffinnut isumasiueqqaaratik sulisup inissiamik neqeroortigineqartumik tiguisussaanera, piumannikkunilu utaqqisut allattorsimaffiannit peerneqartussaanera aalajangersarsimagaat. Naalakkersuisut sulisunut inissianut najugarilivigassanut utaqqisut allattorsimaffianni allatsissimasunik ikilisaaniarnerminni, aalajangersagaq Naalakkersuisut naalakkerusinikkut ingerlatsinerannik piviusunngortitsinissamut pisariaqartutut isumaqarfigaat. Naalakkersuisut sulinermik inuussutissarsiuteqartut kattuffiinut allanulluunniit inissiamik neqeroortigineqartumik tiguisusstaatitaanermut maleruagassat ilusilerneqarnerannut kattuffiit allalluunniit sunniuteqarsinnaanissaanik ilimasuutississimangilaat. Tamatumani inissiap sulisumut innersuunneqartup inissianik nalinginnaasumik iluarsaassisimanissaq pillugu inatsisitigut piumasaqaatinut naammassinnissimanissaa soorunami piumasaqaataavoq. Ullumikkut pisortat inissiaataanni attartortittakkani inissiat ilaat ukiut 40-t sinnerlugit pisoqaassuseqarput, inissiallu taakku soorunami pisoqqatut nungullarsimasutullu isikkoqassapput, kisiannili atorsinnaassallutik. Aalajangersagaq § 20-mut allanngortinneqarpoq.

§ 21-mut nutaamut

Naalakkersuisut maleruagassamik, sulisunut inissiamik najukkamik inissiatut attartortittakkatut nalinginnaasutut tiguisinnaanermut periarfissiisumik ilanngussaqqarput. Pisinnaatitaaffik piumasaqaatit sukumiinerusumik allaaserineqartut tunngavigalugit atuutissaaq.

Missingiummi § 22-mut

Aalajangersagaq atorunnaarsinneqarpoq, pisortaqarfik A/S Inissiaatileqatigiiffik INI-miit saaffigineqarnissamut oqartussaaffeqarnermigut sulisunut inissianik innersuussivigineqarsinnaatitaallutik atorfinitsinneqarsimasunut inissianik innersuussisarnermut atatillugu suliassanik suliaqarnissamut periarfissaqareermat.

Missingiummi § 23-mut

Teknikimut tunngasut eqqarsaatigalugit siunnersuummi imm. 1, § 22-ngorlugu allanngortinneqarpoq, aalajangersakkallu sinnera § 23-imiitiinnarneqarluni. Kiisalu aalajangersakkap oqaasertai imaalu allanngortinneqarput, A/S Inissiaatileqatigiiffik

INI-miit aalajangersagaq malillugu aqutsinerup isumagineqarnera ajornakusoortoq oqaatigineqarmat.

Missingiummi § 24-mut

Imm. 3 allanngortinneqarpoq, suliassaqarfimmi allaffissornikkut aqutseriaatsimik ineriartortitsinermut naapertuuttunngortinneqarluni.

Missingiummi kapitali 3-mut aamma 4-mut

Aalajangersakkap ersernerlunnera, najugaqatigiiffiup ataatsip aamma A/S Inissiaatileqatigiiffik INI-p akornanni eqqartuussisulersuussinermik kinguneqartoq pissutaalluni Naalakkersuisut missingiummi kapitali 3, kapitalinik malunnik, tassalu 3-mik 4-millu, taarserpaat. Kapitalini nutaani marlunni aalajangersakkat, kapitali 3-mut nutaangitsumut aalajangersakkanut naleqqiullutik ataatsimik amerlanerupput, taamaattumillu peqqussutissami aalajangersakkat sinneri paragrafimik ataatsimik siuartinneqarlutik. Tassalu: § 36 § 37-nngorpoq, § 37 § 38-nngorpoq il.il.

Missingiummi § 36-mut (maanna § 37-nngortumut)

A/S Inissiaatileqatigiiffik INI-miit aalajangersakkap annikitsunik arlalinnik iluarsiivigineqarnissaa kissaatigineqarpoq, tamannalu naammassineqarpoq. Imm. 5 naapertorlugu maanna attartortitsisup qularnaveeqqusiissut immikkullu sillimmasiissut attartortup akiligassaanut matusissutissatut atorsinnaalerpai. Siunnersuummi aningaasat taakku attartortitsisup attartornermut isumaqatigiissut naapertorlugu pisussaaffiitut matusissutissatut taamaallaat atornerqarsinnaagaluarput, taamaalillunilu attartortitsisup attartortumut, soorlu attartortup illumi aserorterineranut piunasaqaateqarsinnaanera mattunneqarluni. Kiisalu imm. 6-imik nutaamik ikkussisoqarpoq, taannalu malillugu naafferartumik akilersuisinnaanermut aaqqissuussineq attartortunut, ukiut kingulliit pingasut iluanni attartugarisimasaminni ineqarnermut aningaasartuutinut ingerlaavartunut akiliinngitsoortarnermikkut sumiginnaasimasunut atuuttussaatinneqanngilaq.

Missingiummi § 37-mut (maanna § 38-nngortumut)

Peqqussutissatut siunnersuummi imm. 2 peerneqarpoq, ullumikkut attartortut tamarmik siumoortumik ineqarnermut akiliuteqartinneqartarmata.

A/S Inissiaatileqatigiiffik INI-miit attartortitsisup akileeriaasissamik aalajangiisinaanerata ilanngunneqarnissaa kissaatigineqarpoq. Naalakkersuisunit attartortut ataasiakkaat ineqarnermut, imermut kiassarnermullu qanoq ilillutik akiliisarnissaannik aalajangersaanissaq kissaatigineqanngilaq, attartortitsisup akiliinissamut piffissaq akiliiffissarlu pillugit aalajangiisinaanera naammattutut Naalakkersuisunit isumaqarfigineqarmat.

Missingiummi kapitali 5-imut (maanna kapitali 6-inngortumut)

Naalackersuisut tusarniaanermi akissutinik siunnersuummi kapitali 5-imut (maanna kapitali 6-inngortumut) oqaaseqaateqarfiusunik arlalinnik tigusaqarput. Tusarniaanermi akissutit Naalackersuisut kapitalimi tassani annertuunik allannguissamut tunngavissippaat, taamaalillunilu illuutini immikkut uuttusersugaasuni imermut naatsorsuutinik ataatsimoortunik suliaqartoqartarunnaassalluni. Illuni taamaattuni attartortut ataasiakkaat pilersuisutullu ingerlatseqatigiiffiup akornanni toqqaannartumik, imaluunniit attartortut ataasiakkaat attartortitsisullu akornanni toqqaannartumik akiligassanik iluarsiisoqartassaaq.

Missingiummi §§ 42 aamma 43 kattullugit § 42-nngortinneqarput, § 44 § 43-nngortinneqarpoq, kiisalu § 44-mik nutaamik, imermik akiliisarnermut tunngasumik ilanngussisoqarluni.

Missingiummi § 40-mut (maanna § 41-nngortumut)

A/S Inissiaatileqatigiiffik INI-miit naatsorsuutinik nikisitsisinnaanermut periarfissiisoqarnissaa kissaatigineqarpoq. Kapitalimi aalajangersagaq ullunik akiliiffissanut killiliussanik arlalinnik imaqarpoq. Naatsorsuutinik nikisitsisinnaaneq ammaaneparpat, tamanna ullunik akiliiffissatut killiliussanik paatsiveerutisisinnaavoq. Kiisalu Naalackersuisut isumaqarput, ukiumoortumik naatsorsuutit suliarineqarnissaannut piffissaliussaareersoq naammattoq.

Tamatuma saniatigut A/S Inissiaatileqatigiiffik INI-miit attartortitsisup kiassarnermut naatsorsuutit suliarinerinut akiliisitsisinnaaneranut inatsisitigut tunngavissamik pilersitsisoqarnissaa kissaatigineqarpoq. Naalackersuisut Inissiaatileqatigiiffiup kissaataa naammassiniarlugu imm. 3-mik nutaamik ilanngussippat.

Nukissiorfiit aamma Inuussutissarsiornermut, Nunalerinermut Suliffeqarnermullu Pisorta qarfik attartortitsisup siunertanut ataatsimoortunut inaallagissamut aningaasartuutaasa attartortitsisup siunertanut ataatsimoortunut kiassarnermut aningaasartuutai, tak. imm. 1, assigalugit matussuserneqarsinnaanissaannik ujartuippat. Attartortitsisup siunertanut ataatsimoortunut innaallagissamut aningaasartuutai ingerlatsinermut aningaasartuutit ataanneereerput, taakkulu attartortut ineqarnermut akiliutit aqutugalugit akilertarpaat, taamaattumillu kiassarnermut maleruagassat assinginik ilanngussinissaq pisariaqarani.

Missingiummi § 41-mut (maanna § 42-nngortumut)

Inuussutissarsiornermut, Nunalerinermut Suliffeqarnermullu Pisorta qarfik isumaqarpoq, innaallagissamut aningaasartuutit missingiummi § 41-mut (maanna § 42-nngortumut) ilaasariaqartut. Tamatumunnga tunngatillugu

erseqqissaatigineqassaaq, innaallagissamut akiligassat pilersutut ingerlatseqatigiiffup atuisullu akornanni toqqaannartumik iluarsineqartarmata.

Missingiummi § 43-mut (maanna § 43-nngortumut)

A/S Inissiaatileqatigiiffik INI-miit aalajangersakkap oqaasertaasa allanngortinneqarnissaat kissaatigineqarpoq, taamaalillunilu Nukissiorfiit akiligassanik ima kingusitsigisukkut nassiussisarnerat, allaat akiligassat ukiumut naatsorsuusiorfiusumut tullermut nuuttariaqarlutik, pinngitsuuinernut tunngavigineqartarunnaassalluni. Naalackersuisut isumaqarput aalajangersakkami akiligassat siumut naatsorsuutigereersinnaangisat pineqarnerat ersarissumik allassimareersoq, taamaattumillu aalajangersagaq allanngortinneqanngilaq.

Missingiummi § 43-mut nutaamut (maanna § 44-nngortumut)

Naalackersuisut aalajangersakkamik, imermik akiliisarnermut iluarsiiffiusumik ilanngussipput.

Missingiummi § 44-mut (maanna § 45-nngortumut)

Namminersulernissamut, Aatsitassanut Inatsisilerinermullu Naalackersuisoqarfimmit tikkuarneqarpoq, inatsisinut nassuiaatit imm 2, nr. 3-p paasinissaanut ilitsersuussinngitsut ilassuteqanngitsulluunniit, taamaattumillu inissiap nungullarnerata pisoqalinerataluunniit kingunerisaanik nutarterisarnerit allatulluunniit iluarsaassinerit illuutip attartukkallu pissusiat eqqarsaatigalugu akulikitsumik pisariaqartut. Naalackersuisut inissiat iluini sukumiisumik toqqartorneqartuni nutartigassanut iluarsaassanulluunniit sunut aalajangersimasumik piffissamut killiliinissaq kissaatiginngilaat. Aalajangersagaq aalajangersimasumik nalilersuinissamut ammaavoq, tamatumunngalu pissutsit pissutaasussat amerlapput. Tamanna aalajangersakkamut nassuiaatini ilanngunneqarpoq.

Missingiummi § 47-mut (maanna § 48-nngortumut)

Ejendomskontoret Igdlø siunnersuuteqarpoq, inissiami ineeqqamik attartortup atuinerminik allamut tunniussisinnaanngineranik aalajangersakkamik ilanngussisoqassasoq. Naalackersuisut tamatumunnga isumaqataapput, taamaattumillu aalajangersakkami imm. 4-mik nutaamik ilanngussisoqarpoq.

Missingiummi § 50-imut (maanna § 51-inngortumut)

A/S Inissiaatileqatigiiffik INI isumaqarpoq aalajangersagaq attartortup pisinnaatitaaffiisa annikinnerpaaffilerneqarnerannik imaqartariaqartoq, kiisalu inissiap atorneqarnerata ingerlaqqinnissaa attartortitsisup attartortullu akunnerminni

isumaqatigiissutigisinnaavaat. Naalackersuisut aalajangersagaq maannatut oqaasertaqartinneqarnera naapertuuttut isumaqarfigaat, attartortup atortunik ikkussuinissamut illuummi innaallagissap kuuffeqarnerullu pisinnaasai naammannersut naliliiffigissallugu tamatigut pisariaqartunik ilisimasaqartarnissaa naatsorsuutigineqarsinnaanngimmat.

Missingiummi § 51-imut (maanna § 52-inngortumut)

A/S Inissiaatileqatigiiffik INI isumaqarpoq, aalajangersakkami attartortup akuersissutinik pisariaqartunik qinnuteqarnissamut taakkunungalu akiliisarnissamut pisussaatitaaffiata immikkut ittumik naatsorsuusiorneqartarnissaa ersittariaqartoq. Naalackersuisut isumaqarput akuersissutinik qinnuteqartussaataaneq attartorneq pillugu peqqussummi maleruagassiorneqarsinnaanngitsoq, kisiannili imm. 4-mik nutaamik ikkussinikkut antenit immikkut pigineqartut ataatsimoorussalluunniit attartortitsisumit susassarineqannginnerat, taamaattumillu tuniniaasup attartortullu akuersissummik pisisimasut akunnerminni tamanna iluarsisassarigaat erseqqissarneqarpoq.

Missingiummi § 54-imut (maanna § 55-inngortumut)

A/S Inissiaatileqatigiiffik INI isumaqarpoq aalajangersakkap oqaasertai allanngortinneqartariaqartut, taamaalillunilu aalajangersagaq attartortup pisinnaatitaaffiisa annikinnerpaaffilerneqarnerannik imaqalerpoq, kiisalu inissiap atornerarnerata ingerlaqqinnissaa attartortitsisup attartortullu akunnerminni isumaqatigiissutigisinnaavaat. Naalackersuisut aalajangersagaq maannatut oqaasertaqartinneqarnera naapertuuttut isumaqarfigaat, attartortitsisoq pitsannguutissatut kissaatigineqartup kingunerisassaanik naleqqunneranillu naliliisinnaasutut qaninnerpaatut naatsorsuutigineqartariaqarmat. Tamatuma saniatigut Namminersornerullutik Oqartussat kommunellu inissiaataannik attartortittakkanik attartortitsineq pillugu nalunaarummi nr. 23-mi, 22. december 2003-meersumi kapitali 15 attartortup pitsanngorsaanissamut taakkunungalu taarsiiffigineqarnissamut pisinnaatitaaffiitut maleruagassanik sukumiinerusunik imaqarpoq.

Missingiummi § 56-imut (maanna § 57-inngortumut)

A/S Inissiaatileqatigiiffik INI-miit kissaatigineqarpoq, qinnuteqaatit suliarineqartarnerinut attartortitsisup sullissinermut akiliisitsisinnaaneranut inatsisitigut tungavissiisoqassasoq. Naalackersuisut Inissiaatileqatigiiffiup kissaata akueralugu imm. 2-mik nutaamik ikkussipput.

Missingiummi § 57-imut (maanna § 58-inngortumut)

A/S Inissiaatileqatigiiffik INI aalajangersakkamut arlalinnik oqaaseqaateqarpoq, taakkulu ilaat Naalakkersuisunit akuerineqarput. Imm. 2-p oqaasertalerneqarnera allangortinneqarpoq, taamaalillunilu "ilinniariartorneq" taarserlugu "ilinniagaqarneq" ikkunneqarpoq, ilinniagaqarneq annertunerusunut eqquisinnaammat, ilinniariarterullu pineqarnerani atuagarsornerinnaq eqqarsaatigineqartarluni. Imm. 2-mi "assigisaaluunniit" peerneqarpoq, inatsisip atuutsinneqarnissaani tamatumani sunarpiaq pineqarnerasoq nalornissutigineqarmat. Naalakkersuisut oqaatsip taassuma peerneqarnissaa naapertuuttutut isumaqarfigaat, tamatumunnga peqatigitillugu imm. 1-imik nutaamik ikkussisoqarmat, taannalu malillugu attartortup peqanngikkallarnermini kissaatini attartortitsisumut tunngavilersunngikkaluarlugu inissiaq najukkani qaammatit aqqaneq marluk tikillugit allanut attartortissinnaavaa.

Missingiummi § 58-imut (maanna § 59-inngortumut)

A/S Inissiaatileqatigiiffik INI siunnersuuteqarpoq attartortut attartukkaminnik attartortertik ingerlatiinnarlugit inissianik paarlaasseqatigiissinnaasariaqartut, tassalu pisinnaatitaaffimminnik pisussaatitaaffimminnillu tamavinnik paarlaallutik. Naalakkersuisut tamatumunnga isumaqataapput. Aalajangersagaq allangortinneqarpoq, taamaalillunilu attartortut inissianik paarlaannerminni periaaseq nutaaq toqqassallugu periarfissaqalerput. Aammattaaq inissianik paarlaannermut atatillugu allaffissornikkut aqutsinnermut attartortitsisup attartortormut ataatsimut 250 kr.-inik sullissinnermut akiliisitsisarnissaa inatsisitigut tunngavissiuunniarlugu ilanngussisoqarpoq.

Missingiummi § 59-imut (maanna § 60-inngortumut)

Nukissiorfinniit nassuiaatit oqaasertaliornerisa paatsuunganarnerat uparuarneqarpoq, taakkulu allangortinneqarput. Aammattaaq missingiummi imm. 2 allangortinneqarpoq, taamaalillunilu attartortup, aappaasup qimagaasup imaluunniit inooqataasup qimagaasup sivikinnerpaamik ukiuni marlunni inissarsiortut allattorsimaffiannut nalinginnaasumut allatsissimanissaa piumasaqaataajunnaarpoq. Nutaamik oqaasertalernerani piffissamut piumasaqaat peerneqarpoq.

Missingiummi § 60-imut (maanna § 61-inngortumut)

Missingiummi i imm. 1 erseqqissarneqarpoq. Taamatuttaaq aalajangersakkamut nassuiaatit erseqqissarneqarput, taamaalilluni peqqussutip oqaasertaanik paasiniaanermi ikiorneqarsinnaaneq ersarinnerulersinneqarluni.

Missingiummi § 62-imut (maanna § 63-inngortumut)

Missingiummut nassuiaatit erseqqissarneqarput, taamaalilluni peqqussutip oqaasertaanik paasiniaanermi ikiorneqarsinnaaneq ersarinnerulersinneqarluni.

Missingiummi § 64-imut (maanna § 65-inngortumut)

A/S Inissiaatileqatigiiffik INI-miit aamma Namminersulernissamut, Aatsitassaqaarnermut Inatsisilerinermullu Naalakkersuisoqarfimmiit erseqqissarneqarpoq, nassuiaatini inatsisinik atuutsitsisoqartoq. Aalajangersakkamut imm. 2 nutaaq ilassutigineqarpoq, nassuiaatillu taanna naapertorlugu iluarsineqarput.

Missingiummi § 66-imut (maanna § 67-inngortumut)

Namminersulernissamut, Aatsitassaqaarnermut Inatsisilerinermullu Naalakkersuisoqarfimmiit erseqqissaatigineqarpoq, aalajangersagaq siunnersuummi inissianik piginneqataaffiusunik taamaatitsinissamut aalajangersakkanut naapertuutinningsoq. Nr. 4 allanngortinneqarpoq, taamaalillunilu attartortut inatsisitigut pisinnaatitaaffii nukittortinneqarlutik.

Missingiummi § 67-imut (maanna § 68-inngortumut)

A/S Inissiaatileqatigiiffik INI-miit aamma Namminersulernissamut, Aatsitassaqaarnermut Inatsisilerinermullu Naalakkersuisoqarfimmiit aalajangersakkami naapertuutinningsut marlussuit uparuarneqarput. Tamatuma kingunerisaanik Naalakkersuisoqarfimmiit imm. 1 allanngortinneqarpoq, taamaalilluni attartortup attartornermut isumaqatigiissut malissimaneraa pillugu naliliisarneq, Namminersornerullutik Oqartussat kommunelluunniit attartortumik attartorunnaarsitsineranni pisussanngortinneqarluni. Tamatuma saniatigut imm. 5-imik nutaamik ilanngussisoqarpoq, taamaalillunilu attartortitsisup attartortut inissiamiit aninerannut atatillugu taarsiissutinut aningaasartuutai illuummik iluarsaassinermut isaterinermulluunniit aningaasaliissutinik akilerneqartussanngorput.

Missingiummi § 69-imut (maanna § 70-inngortumut)

Ejendomskontoret Igdlo siunnersuuteqarpoq, aalajangersakkamik namminerisamik illuutini inissianik attartortitsisartut attartortullu attartortup attartornermik taamaatitsinissamut siumoortumik nalunaarfissaata qaammatit pingasut tikillugit qaammatip naaneranut atuuttussanngorlugu akunnerminni isumaqatigiissuteqarsinnaanerannik periarfissiisumik ilassuteqartoqassasoq. Naalakkersuisut Ejendomskontori siumoortumik nalunaarnissamut piffissaliussap qaammammik ataatsimik sivisussusillip attartortitsisup attartortussamik nassaarniarnissanut sivikippallaarnera pillugu isumaqatigaat. Taamaattumik siunnersuutigineqartoq malillugu Naalakkersuisut aalajangersagaq allanngortippaat.

Missingiummi § 72-imut (maanna § 73-inngortumut)

Naalackersuisut imm. 1-imut ilassuteqarput, taannalu malillugu namminerisamik attartortitsisut attartortup akiliinngitsoornerata kingunerisaanik attartornermut isumaqatigiisummik atorunnaarsitsinissaq pisussaaffigiunnaarpaat. Tamatumunnga tunngavigineqarpoq namminerisamik attartortitsisartut eqqarsaatigisassaasa pisortat attartortitsinerinut naleqqiunneqarsinnaannginnerat, pisortat attartortitsinerini eqqarsaatigisassat tassaammata inissiap najugaqatigiiffimmut atanera, aammalu attartortup akiliinngitsoornerani najugaqatigiiffiup aningaasartuuteqartussaanera, aningaasartuutillu attartortut sinnerinut agguarneqartussaanagerat.

Missingiummi § 73-imut (maanna § 74-inngortumut)

Imm. 2 nutaaq ilanngunneqarpoq, taamaalillunilu aalajangersagaq siunnersuummi § 72-ip (maanna § 73-ip) allannguutaanut naleqquttunngorpoq. Imm. 3-mi sullissinermut akiliisitsisarnermut maleruagassaq allanngortinneqarpoq, taamaalillunilu maanna annerpaamik 150 kr.-inik sullissinermut akiliisitsisoqarsinnaalerluni. Attartortitsisup akileequisisutaanik nassiussinermut sullissinermut akiliisitsisoqarsinnaavoq, aammalu tamatuma kingorna atorunnaarsitsinerup atorunnaarsinneqarneranut akiliisitsisoqarsinnaalluni. Taamaattorli sullissinermut akiliutissat attartortitsisup akileequisisummik nassiussinermini allaffissornikkut aqutsinermut aningaasartuutigisarpiaanit amerlanerussanngillat.

Missingiummi § 74-imut (maanna § 75-inngortumut)

§ 58-imi maanna atuuttumi attartukkamik allamut attartortitsigallartaarneq pillugu aalajangersakkamut innersuussisummik ilanngussisoqarpoq, tassanilu attartortitsisoq attartukkamik allamut attartortitsigallarnermi attartornermi nalinginnaasumi attartornertut atorunnaarsitsisinnaanera ersarissumik periarfissinneqarpoq.

Missingiummi § 76-imut (maanna § 77-inngortumut)

A/S Inissiaatileqatigiiffik INI Naalackersuisunut qinnuteqarpoq, sumiiffinni attartortup inissiamiit anieranut atatillugu nalinginnaasumik iluarsaassinissamik attartortitsisumut ajornakusoortitsiviungaatsiartuni nalinginnaasumik iluarsaassinissamik aqqissuussinermik allamik atuutsitsileqqullugu. Naalackersuisut tamanna pillugu maleruagassamik imm. 4-mi ilanngussippot, tamatumalu saniatigut aalajangersakkami Namminersulernissamut, Aatsitassaqarnermut Inatsisilerinermullu Naalackersuisoqarfimmiit oqaaseqaatigineqartunut naapertuuttunik annikitsunik iluarsiisoqarpoq.

Missingiummi § 78-imut (maanna § 79-inngortumut)

A/S Inissiaatileqatigiiffik INI-miit kaammattuutigineqarpoq, attartortitsisup attartortullu inissiap takuniarneqarnissaanut piffissaq oqaasiinnakkut

isumaqatigiissutigisassagaat, ullumikkut periaaseq taanna atorneqarmat, aammalu tamatumunnga atatillugu ajornartorsiorteqartoqanngimmat. Naalakkersuisut aalajangersagaq tamanna naapertorlugu allanngortippaat. Kiisalu A/S Inissiaatileqatigiiffik INI-miit qinnutigineqarpoq, attartortitsisup akissatut missiliuutigineqartoq attartortup tamanna pillugu kissaateqarnerani allakkatiguinnaq tunniuttassagaa. Naalakkersuisut aalajangersagaq tamanna naapertorlugu allanngortippaat.

PPK-miit aalajangersakkamut ilassusiisoqarnissaanik kissaateqarpoq, tassanilu attartortitsisoq inissiamit aninermut atatillugu amigaatit aaqqiagiinngissutigineqarnerat pillugu ineqarneq pillugu maalaaruteqartarfimmut saqqummiussinissamik pisussaaffilerneqarnissaa pineqarpoq. Attartortup suliamik ineqarneq pillugu maalaaruteqartarfimmut suliakkiinera annertuumik aningaasartuuteqarnermik kinguneqassanngitsoq pisarissersuutaasanngitsoruunniit Naalakkersuisunit isumaqarput. Attartortoq 500 kr.-inik akiliissaaq, attartortorlu tamakkiisumik ilaannaasumilluunniit tapersernejarpata taanna utertinneqassaaq.

Missingiummi kapitali 13-19-imut, inissiat piginneqataaffiusut pillugit

Tusarniaanermi akissutinik, assigiinngitsutigut inissianut piginneqataaffiusunut kapitalinut maanna oqaasertarinneqartunut isornartorsiuisunik amerlasuunik takkuttoqarpoq, taamaattumillu Naalakkersuisoqarfik aalajangerpoq kapitalit peqqussutip maanna ilusiligaaneraniit peerniarlugit. Taamaattorli Naalakkersuisuniit, kingusinnerusukku inissiat piginneqataaffiusut pillugit peqqussummik suliaqartoqarnissaa anguniarniarpaat.

Missingiummi kapitali 20-mut (maanna kapitali 14-inngortumut)

KANUKOKA isumaqarpoq, ineqarneq pillugu maalaaruteqartarfimmik pilersitsisoqartariaqanngitsoq, namminerisamik inissiaatini attartortittakkani attartortunut aamma pisortat inissiaataanni attartortittakkani attartortunut maleruagassat assigiinngitsut atuutsinneqarnissaat naammaginarinneqanngimmat. Taamatuttaaq KANUKOKA isumaqarpoq, tamakkiisunik ineqarnermut akiliutinik qaffaanikkut atuisut akiliutaannik atuutsisoqalartariaqanngitsoq, akerlianilli atuisut ataasiakkaat akiliisinneqartarnerisigut akilerneqartariaqartoq. Ineqarneq pillugu maalaaruteqartarfimmik pilersitsinissami siunertaavoq attartortup piginneqataasulluunniit aaqqiagiinngissutit aalajangiiffigineqarnissaannut eqaatsumik ajornanngitsumillu periarfissaqarnissap qulakkeerneqarnissaa. Taamatuttaaq Naalakkersuisut aalajangerput, namminerisamik inissiaatini attartortut ineqarneq pillugu maalaaruteqartarfimmik atuisinnaatinneqassanngitsut, maannarpiaq tamanna pisariaqarnerisigut naliliiffigineqarsinnaanngimmat. Naalakkersuisut pisortat inissiaataanni attartortittakkani atuisunut akiliisitsissanngippata, suliakkiinissamut akigititassaq annertuallaarujussualertussaavoq.

Nuup Kommunea isumaqarpoq, ineqarneq pillugu maalaaruteqartarfiup pilersinneqarnissaa suliat ingerlaneranut naammassineqarnissaannullu kinguarsaataassasoq, tamatuma kingorna suliat eqqartuussivinnut nalinginnaasunut suliakkiissutigineqarsinnaasussaammata. Taamatuttaaq Nuup Kommunea isumaqarpoq, A/S Inissiatileqatigiiffik INI inissianik aqutsisunit kisiartaalluni maalaaruteqartarfimmut ilaasortaataqarnissaa naapertuutinnngilluinnartoq. Ineqarneq pillugu maalaaruteqartarfik kinguarsaataasussatut eqqarsaatigineqanngilaq, taamaallaalli attartortup piginneqataasullunniit eqaatsumik ajornaatsumillu suliakkiinissaanut periarfissaalluni. A/S Inissiatileqatigiiffik INI Kalaallit Nunaanni inissianik aqutsisut annersaraat, taamaattumillu A/S Inissiatileqatigiiffik INI ineqarneq pillugu maalaaruteqartarfimmi issiatitaqartussanngorlugu toqqarneqarpoq.

Missingiummi § 125-mut (maanna § 82-inngortumut)

Sulisitsisut Peqatigiiffiat, PPK aamma IMAK ineqarneq pillugu maalaaruteqartarfiup katitigaanissaanut naammagittaalliorput, taamaattumillu Naalakkersuisut aalajangersakkami annikitsunik allanngiippat.

Aammattaaq Sulisitsisut Peqatigiiffiat inassuteqarpoq, imm. 1-imi aalajangersagaq "-sinnaavoq" "-saaq"-mut allanngortinneqassasoq. Naalakkersuisut ineqarneq pillugu maalaaruteqartarfimmik pilersitsinissaq ersarissumik anguniagaraat, kisiannili ineqarneq pillugu maalaaruteqartarfimmi ilaasortaasussat avataaneersuusussaammata, Naalakkersuisut isumaat malillugu taakku maalaaruteqartarfimmut ilaanissaannut pinngitsaalineqarsinnaanngillat, taamaattumillu aalajangersakkat "-sinnaavoq"-mik oqaasertaqarnissaa aalajangerneqarpoq.

Sulisitsisut Peqatigiiffiannit aalajangersakkami maalaaruteqartarfimmut ilaasortat sinniisissallunniit ineqarneq pillugu maalaaruteqartarfimmut takkutinnngitsoornerisa kingunerisassaata takuneqarsinnaanngitsut oqaatigineqarpoq. Naalakkersuisut imm. 5 allanngortippaat, taamaalillunilu Naalakkersuisut kingunerisassanut isummernissamut pisinnaatitaaffilerneqarput.

Missingiummi § 126-mut (maanna § 83-inngortumut)

Namminersulernissamut, Aatsitassaqaqarnermut Inatsisilerinermullu Naalakkersuisoqarfiup kiisalu Sulisitsisut Peqatigiiffiata aalajangersagaq oqaaseqarfigaat, tassanilu akissarsiaqartitaaneq pillugu inatsit, ataatsimiititalianut ilaasortat akissarsiaannik iluarsiivioreersaq innersuuppaat. Naalakkersuisut aalajangersagaq nassuiaatinut naapertuuttunngorlugu allanngortippaat. Taamaalilluni maalaaruteqartarfimmut ilaasortat Inatsisartuni, Naalakkersuisuni il.il. ilaasortat akissarsiaqartitaanerit pillugu Inatsisartut inatsisaat nr. 22, 18. december 2003-meersoq naapertorlugu akissarsiaqartinneqassapput, ullormusiaqartinneqassapput angalanermullu aningaasartuutitut taarsiiffigineqartassallutik.

Missingiummi § 127-mut (maanna § 84-inngortumut)

Sulisitsisut Peqatigiiffiata ineqarneq pillugu maalaaruteqartarfimmumt suliakkiinermumt akiliuteqartitsisarnissaq paasilluarsinnaavaa, kisiannili 500 kr.-inik akiliuteqartitsisarnissap aalajangersimasunik isertitaqartartut ilaat maalaaruteqartarfimmumt suliakkiinissaannumt mattussisinnaanera eqqarsaatigineqartariaqarsoraat. Naalackersuisut Sulisitsisut Peqatigiiffiata isumanerluutaa isumaqatiginngilaat, maalaaruteqartoq maalaarutimini tamakkiisumik ilaannaasumilluunniit taperserneqarpam aningaasat uterteqqinneqartussaammata. Tunngaviatigut isigalugu maalaaruteqartussap maalaarut tunngavissaqarluartunik imaqarpam 500 kr.-it akiliutigigallaannartussaavai.

Missingiummi § 129-mut (maanna § 86-inngortumut)

Namminersulernissamumt, Aatsitassaqaqarnermumt Inatsisilerinermullu Naalackersuisoqarfimmumt tikkuarneqarpoq, imm. 3-mi naggatip kingulliup kingorna siulittaasup sinniisaata ilaasortallu ikinnerpaamik marluk, imaluunniit siulittaasup ilaasortallu marluk sinniisaasa najuunneranni maalaaruteqartarfiup aalajangiisinnaatitaanera ersarinnigimam. Naalackersuisut imm. 3-p oqaasertai allannortippaat, taamaalillunilu ersarissumik allassimalerpoq ineqarneq pillugu maalaaruteqartarfik aalajangiisinnaassuseqartoq, siulittaasoq taassumaluunniit sinniisissaa ilaasortallu imaluunniit taakku sinniisissaat ikinnerpaamik marluk najuunneranni.

Missingiummi § 131-mut (maanna § 88-inngortumut)

Namminersulernissamumt, Aatsitassaqaqarnermumt Inatsisilerinermullu Naalackersuisoqarfiup imm. 1-ip immikkoortua siulleq imm. 2-mut naleqqiullugu pisariaqarsorinnigilaa. Naalackersuisut tamanna isumaqatigaat, taamaattumillu imm. 1, nr. 1 peerneqarpoq.

A/S Inissiaatileqatigiiffik INI-p isumaa malillugu attartornernumt 1990-imiit 1995-imumt aallartinneqarsimasunumt aalajangersakkamik amigaateqartoqarpoq. Naalackersuisut attartornernumt 1990-imiit 1995-imumt aallartinneqartunumt maleruagassanik, Inatsisartumt peqqussutissaanni nutaami aalajangersakkamumt akerliusinnaasunik soqarsorinnigilaat, taamaattumillu tamanna pillugu aalajangersakkanik ilanngussisoqannigilaq.

Missingiummi ilanngussaq 2-mut (maanna ilanngussaq 3-nngortumumt)

A/S Inissiaatileqatigiiffik INI isumaqarpoq, sillimmasiinermi ingerlatsinermumt, aserfallatsaaliuinerumt illuartitassanullu akiliutit ukiumumt m²-mut 18 kr.-iniit 25 kr.-inumt qaffanneqartariaqartumt. Naalackersuisut ilanngussaq 2-mi kisitsisit pingaarnerit

tamakkiisumik iluarsiivigaat, taamaalillutillu aningaasartuutiviusunut naapertuuttunngortinneqarput.

Ilanngussaq 3-mut (maanna ilanngussaq 4-nngortumut)

A/S Inissiaatileqatigiiffik INI isumaqarpoq, torersaarnissamut maleruagassat iluarsaattariaqartut, taakku qangalili suliarineqarsimammata. Iluarsineqarnerini attartorneq pillugu peqqussummi qimmeqarneq qitsuuteqarnerlu eqqarsaatigalugit maleruagassat oqaluttuareqqiinertaqannginnissaat immikkut pingaartinneqartariaqarpoq, tamatumalu saniatigut nipiliornissamut qununartumillu pissusilersornissamut inerteqquteqarneq ersarinnerujussuarmik nassuiarneqartariaqarluni. Naalakkersuisuniit torersaarnissamut maleruagassat maanna oqaasertaliornerat naleqquttutut isumaqarfigineqarput, torersaarnissamut maleruagassat ataatsimut isigalugit taakkunani attartorneq pillugu peqqussummi maleruagassat ersarissumik paasiuminartumillu allassimasariaqarmata.

Nuup Kommuneaniit illuni sanileriinni uigulukuttunilu namminerisamik isertarfilinni uumasuuteqartoqarsinnaannginneranik sukannernerulersitsineq naapertuussorineqanngilaq, taamaattumillu kommunemiit tamatuma qasukkartinneqarnissaa taamaalillunilu attartortut toqqissisimanerisa ajorseriannnginnissaa inassutigineqarpoq. Naalakkersuisut pisortat inissiaataanni attartortittakkani qimmeqarnermut qitsuuteqarnermullu maleruagassat aalajangiusimaannarpaat. Tamatumunnga peqqutaavoq uumasuutit inissiami annertuumik nungullartitsisarmata, tamatumalu saniatigut sanilinut akornutaasinnaallutik.

Peqqussutissatut siunnersuummi aalajangersakkanut ataasiakkaanut nassuiaatit

§ 1-imut

Matumani erseqqissaatigineqassaaq peqqussutissatut siunnersuummi taamaallaat illunik illumilu ininik najugassatut attartornerit kisimik pineqarmata, matumani attartukkamik allanut attartortitsigallartarneq ilanngullugu. Pequtinik inissianiluunniit atortunik allanik, soorlu timigissarnermi atortunik, qarasaasianik, umiatsianik snescooterinilluunniit attartornissamut isumaqatigiissutit attartorneq pillugu peqqussummi aalajangersaavigineqanngillat. Atortunik pequtinilluunniit attartortoqassapat, tamanna atortunik atugassanik imaluunniit atortunik taakkuninnga attartornermut isumaqatigiissusiornikkut aalajangangersaasoqassaaq, tamatumani atortup immikkut attartorneqarnissaa imaluunniit inissiamik attartornermut atatillugu atortup attartornissaa pineqaraluarpalluunniit.

Kiisalu peqqussutissatut siunnersuut attartortoq inuttut namminiussisoqanngitsunut, soorlu ingerlatseqatigiiffiutillugu, imaluunniit attartortoq inuinnaalluni attartukkami

nammineerluni najugaqartinnagu, soorlu illuummi inissianik arlalinnik attartortitseqqinnissaq siunertaralugu attartornermik ingerlatitseqqittuutillugu atuutissanngilaq.

Peqqussut illuutini Namminersornerullutik Oqartussanit, kommunenit namminersortuniillu pigineqartuni inissianut attartortittakkanut, kiisalu inissianut sulisunik atorfinitsitsinermit atatillugu atugassiissutaasartunut atuuppoq, tamatumani peqqussummi aalajangersakkani atuutinngitsutut allaqqasoqanngippat.

Attartorneq tassaavoq akiliilluni atuineq. Atornerit assigisaallu, soorlu aningaasanik annikitsuinnarnik akiliisitsilluni attartortitsinerit peqqussummi pineqanngillat. Akiliutaasoq aningaasaanngitsunik, soorlu sulinermik akiliinerusinnaavoq, taamaattumillu attartortitsisup peqqussummi aalajangersakkat sanioqquitiinnarlugit akiliut sulinermik taarsertissinnaanngilaa.

"Illut illunilu init inigisassat" isumaqarpoq, ineqariaatsit nalinginnaasut tamani, soorlu illuni quleriinnik, illuni sanileriinnik, illuni uiguleriiaanik, ilaqutariinnut ataatsinut illunik, illuni affarleriinnik, ineqarfinni ininik, ineeqqani inissianilu ininik attartortitsinerit, taakkulu tamarmik peqqussummi pineqarput. Aasarsiortarfinnik attartortitsineq peqqussummi ilaatinneqanngilaq, tamatumani aasarsiortarfittut taaneqartoq attartortup ulloq unnuarlu najugarisaa pingarneq pineqanngippat. Aamma umiatsiat angerlarsimaffiit attartortinneqartarnerat peqqussummi pineqanngilaq.

Illunik illunilu ininik atuineq atuisumut aningaasanik akeqartoq sunaluunniit pisariaqanngilaq pissuseqartoq attartornerunermik. Tassalu pigineqatigiilluni inissiat inissiallu nammineq pigisat, aammalu atuisunit pigineqartuni ineqatigeeriaatsit assigiinngitsut attartornertut taaneqarsinnaanngillat. Inissialli taamaattut piginnittumit imaluunniit taamatut pisinnaatitaaffilimmit attartortinneqarpata, tamanna peqqussutip atuuffiata iluani attartortitsinerit taaneqassaaq.

Attartortitsinerit akuleriit, attartornermit isumaqatigiissut ataaseq atorlugu ininik najugassatut najugassatullu atuinermiit allaanerusumut, soorlu inuussutissarsiormermit, atugassatut attartortitsinerit peqqussutip atuuffiata iluanniipput, aammalu najugassanik attartornertut isigineqassallutik. Akerlianik inuussutissarsiormerinnarmut atugassanik attartortitsinerit peqqussutip atuuffiata avataanniipput.

Aalajangersakkami erseqqissarneqarpoq peqqussut taamaallaat attartortitsinerit, attartortoq inuttut namminiussuseqartillugu atuutissasoq. Attartortoq inuttut namminiussuseqanngippat attartortitsineq attartorneq pillugu peqqussutip avataaniissaaq. Assersuutigalugu attartukkami attartortitsisoq inuttut namminiussuseqarpat, attartortorlu aktiaateqarluni ingerlatseqatigiiffiuppat, tamanna peqqussummik tunngaveqartinneqassanngilaq, kiisalu attartukkamik allamut attartortitsinerimi attartortitsisoq/attartortoq aktiaateqarluni ingerlatseqatigiiffiuppat, attartukkanilu sulisut ilaannut attartortippagu, tamanna peqqussummut ilaatinneqassaaq.

§ 2-mut

Aalajangersakkap atuutilerneratigut Namminersornerullutik Oqartussat attartornermut isumaqatigiissusiassamik nalinginnaasumik assigiissakkamik inissianut assigiinngitsunut, soorlu ilaqutariinnut arlalinnut inissianut, ilaqutariinnut ataatsinut illunut, pisortat inissiaataannut attartortittakkanut, kiisalu namminerisamik inissiaatinut attartortittakkanut atugassamik pilersitsissapput. Attartornermut isumaqatigiissutit kalaallisut taamatullu qallunaatut oqaasertaqartinneqassapput, oqaatsit marluk taakku akuerineqarnissamut piumasaqaataassammata.

Peqqussummi aalajangersakkat ilaat attartortunut illersuutaapput, taamaattumillu attartortumut akornutaasumik sanioqqunneqarsinnaanatik. Imm. 2-p atuutilerneratigut attartortitsisup attartortullu akornanni isumaqatigiissutit, attartortup inatsisitigut inissisimaneranut aalajangersakkap kingunerisassai eqqarsaatigalugit ajorseriartitsisut atuuttussaatinneqassanngillat. Taamaalilluni attartortoq attartortitsisorlu akunnerminni attartorneq pillugu attartortumut peqqussummi aalajangersakkanit ajornerusumik inissisimalersitsisunik isumaqatigiissuteqarsinnaapput, tassanilu aalajangersakkat ersarissumik illersuutaasutut allassimasut allakkatigut isumaqatigiissummi tamanna ersarissarneqarsimappat taakku pineqanngillat.

Aalajangersakkakkut attartorneq pillugu peqqussummi anguniarneqartunit attartortumut ajornerusumik inissisimalersitsisut attartortup attartortitsisullu akunnerminni immikkut isumaqatigiissutigippassuk, tamanna akornuserneqassanngilaq.

§ 3-mut

Attartornerit inatsisini immikkut ittuni aalajangersaaffigineqartut peqqussutit atuuffiisa avataanniipput. Tamatumani assersuutigalugu sulisunut inissiat atuuffissaannut aalajangersarneqareersut najugarisassatut pisussaaffiusut eqqarsaatigineqarput, tak. Nalunaerutit C, 5-1-9. Aamma sullissivinniinnerit, soorlu utoqqaat illuanni assigisaaniluunniit najugaqarnerit, inunnik isumaginninnermut inatsisit naapertorlugit pilersinneqarsimasut peqqussutit atuuffiisa avataanniipput.

Naalackersuisut inissianit attartortittakkanit inissianik immikkoortitsisinnaapput. Inissiani taamaattuni attartorneq pillugu peqqussummi maleruagassat malinneqassanngillat. Naalackersuisut inissianut taamaattunut innersuussisinnaatitaapput, aammalu kikkut piumasaqaatit suut malillugit taakkuninnga tunniunneqassanersut aalajangersinnaallugu.

§ 4-mut

Aalajangersakkami ersarissarneqarpoq peqqussut utaqqiisaagallartumik inigitinneqartunut atuutissanngitsoq. Utaqqiisaagallartumik inigitinneqartunut

aaqqissuussinissaq aalajangersaaffigineqassappat, taassuma ataani utaqqiisaagallartumik ineqartinneqartup akiliutissaanik aalajangersaasinnaanermut akiliisitsiniarsinnaanermullu periarfissiisoqassappat, tamanna Naalackersuisut aamma sulinermik inuussutissartiuteqartut kattuffiat ilaasortaaffigisap isumaqatiginninniarnerminni isumaqatigiissutigissavaat. Utaqqiisaagallartumik ineqargitinneqarneq tassaavoq sulisorilivigassamik inissiamut innersuunneqarsinnaatitaalluni atorfinitsinneqartumik, sulisunut inissiamik innersuunneqarnissamut utaqqiisaasumik inissiigallarneq.

Aalajangersakkamissaaq erseqqissarneqarpoq, peqqussut utaqqiisaagallartumik inigitinneqartut saniatigut aamma utaqqiisaagallartumik ineqartitaasunut allanut aamma atuutissanngitsoq, tamatumani utaqqiisaasumik inissiigallarnermut akiliuteqartitsinissaq aalajangersarneqarsimagaluarpalluunniit. Allatut inissiigallarneq tassaasinaavoq peqqinnissaqarfiup taartinik imaluunniit piffissami sivikitsumi atorfeqartinneqartunik inissiigallarnerat. Taamaattorli utaqqiisaagallartumik inigitinneqartunut allaanerusunik inissiigallartarnernut imm. 3 aamma 4 atuutissapput.

Aammattaaq angerlarsimaffeqanngitsunut angerlarsimaffinnut, akunnittarfinnut, sũmandshjemminut, tikeraanut inissiisarfinnut, inissiigallartarfinnut assigisaannullu inissittarnerit peqqussutip atuuffiisa avataanniipput.

Aalajangersakkami imm. 3-p atuutilerneratigut Namminersornerullutik Oqartussat kommunellu inissiigallartarnermit allaanerusumik inissiigallarnermut aningaasartuutitik appartissinnaavaat, tassani inissiigallarnermut akiliuteqartitsisarnissaq inatsisitigut tunngavissiuunneqarmat. Naalackersuisut akiliutissap kiisalu inissiigallarnermut atatillugu aningaasartutit annertussusissaannut maleruagassiornissamut pisinnaatinneqarput.

Inissiap inissiigallartarfittut atorneqartussap inissiigallartarfittut aalajangerneqarsimanissaa piomasaaqataavoq. Tamannattaaq inissianut, sullissiviup illuutaanut immikkoortuinullu allanut atasunut, aammalu inissianut, sulisunik sullissivimmi, taassuma immikkoortortaani ingerlatsivimmiluunniit atorfinitsinneqarsimasunik inissiigallarfittut atorneqartunut atuuppoq.

§ 5-imut

Aalajangersakkami inissiat inueruttut innersuunneqartarnerini tullerriarinnissaq takutinneqarpoq. Inissarsiortut utaqqisut allattorsimaffianni nalinginnaasumi allatsissimasut, tak. nr. 10, saniatigut illuutini Namminersornerullutik Oqartussanit kommunenilluunniit pigineqartuni inissiat inueruttut nr. 1-9-mi siunertat aalajangersarneqartut malillugit innersuunneqartassapput.

Imm. 1, nr. 1-6 naapertorlugu inissianik innersuussisarneq nr. 7-10 naapertorlugu inissianik innersuussisarnermiit salliutinneqartassaaq.

Namminersornerullutik Oqartussat kommuneluunniit inissianit attartortittakkaniit inissiaq ataaseq amerlanerusulluunniit siunertanut immikkut ittunut atugassatut immikkoortissinnaavaat, assersuutigalugu inissiatut atorfinnut aalajangersimasunut atugassatut imaluunniit pisortanut inissiatut. Kiisalu Namminersornerullutik Oqartussat kommuneluunniit inissianik immikkut inuussutissarsiornermut suliassaqartitsiniarnermulluunniit atugassanik inniminniisinnaapput. Assersuutigalugu tamanna suliffeqarfinnik nutaanik aallartitsinermi sulisunik immikkut piginnaanilinnik pileritsatsitsiniarnermut imaluunniit inunnik isumaginninnermut suliffeqarnermullu naalackersuinikkut ingerlatsinerup tamakkiisup iluani suliniuteqarnermut ikorfartuutitut pisinnaavoq. Inissiat inniminnerneqartunut tunngatillugu inissianik attartornermi peqqussummi maleruagassat malinneqassapput.

Imm. 4-mi kommunet ataasiakkaat imm. 1, nr. 7-10-mi inissaqartitsinissamut siunertat taaneqartut akornanni agguaassinissaq pillugu Naalackersuisunut isumaqatigiissuteqarsinnaapput. Aalajangersagaq kommunemi inissianik isumaginninnermi atugassanik pisariaqartitsinerup appartinneqarnissaanik kommunep Naalackersuisullu kissaateqarnerannik naammassinninnissamut atugassatut eqqarsaatigineqarpoq.

§ 6-imut

Aalajangersakkap atuutilerneratigut inissarsiortoq, utaqqisut allattorsimaffianni nalinginnaasumi allatsissimasoq inissiap akianut, inissisimaffianut, taassuma ataani quleriinni sumi inissisimanissaanut kiisalu inissiap angissusaa inoqutigiinni inuit amerlassusaannut naapertuuppat taassuma angissusissaanut tunngatillugu immikkut kissaatiminik allataqarsinnaavoq. Aalajangersarneqartut tamavinnut atuuttuupput, tassalu inissarsiortoq kissaatiminik allanik allataqarsinnaangilaq. Inissarsiortoq, utaqqisut allattorsimaffianni nalinginnaasumi allatsissimasoq kissaatiminik immikkut ittunik allataqassappat, kissaat naammassineqarsinnaalertinnagu inissarsiortumut inissiamik neqerooruteqartoqarsinnaangilaq. Taamaalilluni kissaatit immikkut ittut inissiamik neqeroorfigineqarnissap tungaanut piffissamik sivitsorsaaqataasinnaapput.

Sumiiffinni inissianik attartortitsiniartarnermik ajornartorsiorfiusuni inissarsiortut inissianik, inoqutigiinni inuit amerlassusaat ininik marlunnik amerlanerusunilluunniit sinnerlugit initalinnik tunineqarsinnaapput. Inissarsiortup inissiamut aningaasartuutitut ingerlaavartunut kiisalu qularnaveequsiissutissamik akiliisinnaanissaa qulakkeerniarlugu, pisuni taamatut ittuni attartortitsisup inissarsiortup aningaasarsiaanut paasissutissanik piunasaqartarnissaa immikkut pisariaqassaaq.

§ 7-imut

Aalajangersakkap atuutilerneratigut attartortitsisup inissarsiortoq aningaasarsiaanut paasissutissanik piunasaqarfigisinnaavaa. Paasissutissat taamaallaat attartortup

inissiamut aningaasartuutitut ingerlaavartunut kiisalu qularnaveeqqusiissutissamut ataatsikkut akilerneqarsinnaasumut, imaluunniit qaammatit aqqaneq-marluk sinnernagit naafferarlugit akilersorneqartussamut akiliisinnaaneranut naliliiniarnermut atorneqassapput.

Namminersornerullutik Oqartussat kommunellu inissiaataannut inissarsiortut utaqqisut allattorsimaffiannut, attartortitsisumit ingerlanneqartumut allatsissapput. Inissiat piffissamut tullerriiarineq, inissarsiortut utaqqisut allattorsimaffiannut allatsiffigisaat malillugu innersuunneqartassapput. Inissianut assigiinngitsunut inissarsiortunut allattuiffiit immikkoortillugit allattorneqassapput. Aalajangersakkami utaqqisut allattorsimaffiannik allaffissornikkut aqutsisoq sullissinermit akiliisitsisarnissamik pisussaaffilerneqarpoq. Sullissinermit akiliutissap angissusissaata aalajangerneqarnerani utaqqisut allattorsimaffiannik aqutsinermit aningaasartuutit pisariaqartinneqartut matussutissaqartinneqassapput. Utaqqisut allattorsimaffiannut allatsinnermut atatillugu sullissinermit akiliisitsisoqartassaaq aammalu ukiumoortumik uppersaanermit atatillugu sullissinermit akiliuteqartitsisoqartassalluni. Utaqqisut allattorsimaffiitut qinnuteqartup allatsiffigisaanut tamavinnut sullissinermit akiliisitsisoqassaaq.

§ 8-mut

Sulisunut inissiat inueruttut 20 procentii sulisunut namminneq kissaatigisamik nuunniarlutik utaqqisut allattorsimaffiannut allatsissimasunut innersuunneqartassapput. Maleruagassaaq taanna sulisut sulisunut inissiamut najukkaminnut sunniuteqarsinnaanerat periarfissinniarlugu ilanngunneqarpoq. Aalajangersakkap atuutilerneratigut inissarsiortoq, utaqqisut allattorsimaffianni nalinginnaasumi allatsissimasooq inissiap akianut, inissisimaffianut, taassuma ataani quleriinni sumi inissisimanissaanut kiisalu inissiap angissusaa inoqutigiinni inuit amerlassusaannut naapertuuppat taassuma angissusissaanut tunngatillugu immikkut kissaatiminik allataqarsinnaalerpoq. Aalajangersarneqartut tamavinnut atuuttuupput, tassalu inissarsiortoq kissaatiminik allanik allataqarsinnaanngilaq. Inissarsiortoq, nammineq kissaatigisamik nuunniarluni utaqqisut allattorsimaffianni allatsissimasooq kissaatiminik immikkut ittunik allataqassappat, kissaat naammassineqarsinnaalertinnagu inissarsiortumut inissiamik neqerooruteqartoqarsinnaanngilaq. Taamaalilluni kissaatit immikkut ittut inissiamik neqeroorfigineqarnissap tungaanut piffissamik sivitsorsaaqataasinnaapput.

§ 9-mut

Aalajangersakkap atuutilerneratigut Naalakkersuisut Namminersornerullutik Oqartussat inissiaataanni attartortittakkani sulisunut inissianik inniminniissamut inissianut normunik atugassiisinnaapput. Namminersornerullutik Oqartussat inissianut normuutaasa aqunneqarnerinut aningaasartuutit attartortunut tutsinneqannginnissaat qulakkeerniarlugu, aningaasartuutitut taakkununga matussutissanik sulisitsisunut, inissianut normunik inniminniisunut ukiumoortumik akiliisitsisoqartarsinnaavoq. Akiliutit ilaatigut aqutsisup inissianik

neqerooruteqartarneranut, utaqqisut allattorsimaffiinik iluarsisarneranut il.il. aningaasartuutaanut matusissutigineqartassapput.

§ 10-mut

Aalajangersakkap atuutilerneratigut Naalakkersuisut kommunalbestyrelsemut inissiat normuinik aalajangersimasunik amerlassusilikkanik, kommunemi sullissivinniluunniit tassunga atasuni sulisunut, inissiamik innersuunneqarsinnaatitaallutik atorfinitsinneqartunut inissianik inniminniinissamut atugassanik tunniussisinnaapput.

Kommunalbestyrelse aalajangersinnaavoq, pisuni tamavinni kommune sulisut inissiamik, inoqutigiinni inuit amerlassusaat inimik ataatsimik sinnerlugit innersuunneqartassanersut. Taamatut aalajangiineq taamaallaat inissiaq innersuunneqartoq kommunep nammineq inissiaataanut attuumassuteqarpat atorneqarsinnaavoq. Namminersornerullutik Oqartussat inissiaataat kommunalbestyrelsep inissianik, inoqutigiinni inuit amerlassusaat inimik ataatsimik sinnerlugit innersuussisinnaanissamut periarfissaqartitaaneranut ilaatinneqanngillat. Inissiat kommunemit aamma Namminersornerullutik Oqartussanit pigineqartut immikkoortinneqarnerannut pissutaavoq, Naalakkersuisut namminneq inissiaatiminnut tungatillugu ineqarneq pillugu naalakkersuinikkut ingerlatsinertik allangortinnagu ingerlatsiinnarnerat, tamatumalu saniatigut kommuneni ataasiakkaani tamanna kissaatigineqarpat ineqarneq pillugu naalakkersuinikkut ingerlatsinermi allamik ingerlatsisoqarsinnanera Naalakkersuisunit ammaffigineqarmat.

§ 11-mut

Sulisunut, inissiamut innersuunneqarsinnaatitaallutik atorfinitsinneqartunut inissianik innersuussisarneq pillugu Naalakkersuisut aamma Naalagaaffiup Siinniisoqarfiata, Nunatta Eqqartuussiviata Politimestereqarfiullu akornanni isumaqatigiissusiortoqassaaq. Illuatungeriinnit inissiap inniminnerneqarneraniit kingusinnerpaamik qaammatit pingasut qaangiunnerini sulisup inissiamut innersuunneqartarnissaa anguniarneqassaaq. Tamanna naammasiniarlugu isumaqatigiissuteqarfiusinnaasut tassaassapput, inissianik aalajangersimasunik amerlassusilinnik Naalagaaffiup Sinniisoqarfianut, Nunatta Eqqartuussivianut Politimestereqarfimmullu atugassanik immikkoortitsisarneq.

Naalagaaffiup Sinniisoqarfiani, Nunatta Eqqartuussiviani Politimestereqarfimmilu pisortatut sulisut Namminersornerullutik Oqartussat qitiusumik allaffeqarfianni pisortat pisortanut inissianut salliutinneqartussaanerattut pisinnaatitaaffeqanngillat, kisiannili Naalakkersuisut aalajangersimasumik isumaqatigiissuteqartoqarneratigut sullissivinni taakkunani pisortatut sulisunut pisortanut inissianut innersuussisinnaapput.

§ 12-imut

Inatsisartuni sullissivinnilu taakkununga atasuni sulisut inissianut innersuunneqartarnerat pillugu Naalackersuisut Inatsisartullu akunnerminni isumaqatigiissusiussapput. Namminersornerullutik Oqartussat inissianik arlalinnik inniminniinermikkut isumaqatigiissummut pisussaaffini naammassisinnaavai. Kiisalu inissiat Namminersornerullutik Oqartussat qitiusumik allaffeqarfianni sulisunut innersuussisarnermut maleruagassat naapertorlugit innersuunneqartassapput. Pisortatut sulisunut pisortanut inissianik agguaassinissaq pillugu aalajangersimasumik isumaqatigiissuteqartoqarsinnaavoq, pisortalli taakku qitiusumik allaffeqarfimmi pisortatut atorfeqartinneqartut pisortanut inissianut salliutinneqartussaanerattut pisinnaatitaaffeqanngillat.

§ 13-imut

Aalajangersakkami takutinneqarpoq, inissiat qanoq tulleriinnilerlugit Namminersornerullutik Oqartussani sulisunut inissianut innersuussiffinneqarsinnaatitaallutik atorfinitsinneqartunut innersuunneqartassanersut.

Namminersornerullutik Oqartussat sulisunut inissiaataat immikkoortunut sisamanut agguagaapput.

Aalajangersakkami allassimavoq, inissianik innersuussinermi Naalackersuisuni ilaasortat, pisortat, immikkoortortani pisortat, allaffinni pisortat assigisaallu Namminersornerullutik Oqartussani sulisunit allanit salliutinneqartassat. Aammattaaq allassimavoq taamatut salliutitsisinnaatitaaneq taamaallaat Namminersornerullutik Oqartussat qitiusumik allaffeqarfiani pisortanut atuuttoq.

Sulisunut sinnerinut inissiat tassaapput Namminersornerullutik Oqartussat qitiusumik allaffeqarfianni, taamatullu sullissivinni sullivinnilu tassunga atasuni, kiisalu sullissivinni allani, suliffeqarfinni allani aktiaatileqatigiiffinnilu Namminersornerullutik Oqartussanit pigineqartuni sulisunut innersuunneqartussat. Qitiusumik allaffeqarfimmiit inissianik isumagineqartut tassaapput pisorta qarfiit ataasiakkaat, kiisalu sullissiviit suliffeqarfiillu tassunga atasut, kiisalu sullissiviit, suliffeqarfiit aktiaatileqatigiiffiillu Namminersornerullutik Oqartussanit pigineqartut, tassaallutik soorlu Asiaq, Aja, Røde Kors Børnehjemmet aamma A/S Inissiaatileqatigiiffik INI.

§ 14-imut

Namminersornerullutik Oqartussat inissianik Naalackersuisuni ilaasortanut Naalackersuisoqarfinnilu ataasiakkaani pisortanut innersuunneqartussanik immikkoortitsissapput. Inissiani ataasiakkaani inoqutigiit aalajangersimasumik amerlassuseqarnissaannut piunasaqaateqartoqanngilaq, taakkulu pingaartumik

tassaassapput ilaqutariinnut ataatsinut illut illullu affarleriit. Inissiat inissiaqarfittut immikkoortortamut ataatsimut immikkoortinneqassapput, tassalu Naalakkersuisuni ilaasortanut pisortanullu inissiat tamarmik inissiaqarfittut immikkoortortamut ataatsimut ataatsimoortinneqassapput, inissiaqarfittut immikkoortortanut allanut, pingaartumik ilaqutariinnut arlalinnut illunit ilaasortaaffigineqartunut ilaatinneqarnissaat naapertuuttutut isigineqanngimmat.

§ 15-imut

Namminersornerullutik Oqartussat inissianik Namminersornerullutik Oqartussat qitiusumik allaffeqarfianni immikkoortortani pisortanut assigisaannullu, akissaateqarfik 37 qaffasinnerusorluunniit naapertorlugu akissarsiaqartinneqartunut innersuunneqartussanik immikkoortitsisinnaapput, kisiannili Namminersornerullutik Oqartussat taamatut pinissamut pisussaaffilerneqanngillat. Pisortanut inissiat tassaasinnaapput illuni sanileriinni uigulukuttuniluunniit inissiat, kiisalu ilaqutariinnut ataatsinut illut illulluunniit affarleriit. Inissiat § 19-imi maleruagassani aalajangersarneqartut malillugit inoqutiginni inuit amerlassusaat ininik marlunnik sinnerlugit initalimmik innersuussisoqarsinnaavoq.

§ 16-imut

Aalajangersakkami oqaatigineqarpoq, Namminersornerullutik Oqartussat qitiusumik allaffeqarfianni allaffinni pisortat, akissaateqarfik 36 qaffasinnerusorluunniit naapertorlugu akissarsiaqartinneqartut inissianut innersuussisarnermi Namminersornerullutik Oqartussani sulisunit allanit salliutinneqassasut.

§ 17-mut

Aalajangersakkami allassimavoq sulisut sulisunut inissiamik innersuunneqarsinnaallutik atorfeqartinneqartut allat aatsaat Naalakkersuisunut ilaasortanut, pisortanut, immikkoortortani pisortanut assigisaannullu kiisalu allaffimmi pisortanut inissianik innersuussinissamut pisariaqartitat naammassinerini sulisunut inissiamut innersuunneqartassasut.

Sulisorisat sinnerinut inissiat tassaapput Namminersornerullutik Oqartussat qitiusumik allaffeqarfianni, taamatullu sullissivinni sullivinnilu tassunga atasuni, kiisalu sullissivinni allani, suliffeqarfinni allani aktiaateqarluni ingerlatseqatigiiffinnilu Namminersornerullutik Oqartussanit pigineqartuni sulisunut innersuunneqartussat. Qitiusumik allaffeqarfimmiit inissianik isumagineqartut tassaapput pisorta qarfiit ataasiakkaat, kiisalu sullissiviit suliffeqarfiillu tassunga atasut, kiisalu sullissiviit, suliffeqarfiit aktiaatileqatigiiffiillu Namminersornerullutik Oqartussanit pigineqartut, tassaallutik soorlu Asiaq, Aja, Rude Kors Børnehjemmet aamma A/S Inissiaatileqatigiiffik INI.

§ 18-imut

Aalajangersakkami allassimavoq inissiat qanoq angissusillit sulisunut inissiamik innersuunneqarsinnaatitaallutik atorfinitsinneqarsimasunut tunniunneqarsinnaanersut. Inissiat angissusaat init amerlassusaat malillugit naatsorsugaapput, kvadratmeterit amerlassusaat tunngavigineqaratik. Assersuutigalugu inissiaq sisamanik initalik pingasunik sinittarfeqarpoq, ataatsimik ineqarluni, kiisalu perusersartarfeqarluni/uffartarfeqarluni igaffeqarlunilu.

Najukkami inissianik attartortitsiniartarnej ajornartorsiorfigineqarpat, inissiat inoqutigiinni inuit amerlassusaat ataatsimik amerlanerusunilluunniit sinnerlugit initallit innersuunneqarsinnaapput.

Aalajangersakkap atuutilerneratigut Naalagaaffiup Sinnisoqarfiani, Nunatta Eqqartuussiviani, Kalaallit Nunaanni Politimesterqarfimmi sullissivinnilu taakkununga atasuni sulisut, kiisalu Inatsisartuni sullissivinnilu tassunga atasuni sulisut aamma Namminersornerullutik Oqartussat qitiusumik allaffeqarfianni, sullissivinni suliffeqarfinnilu tassunga atasuni sulisut kiisalu sullissivinni suliffeqarfinnilu allani sulisut inissiamik innersuunneqarsinnaatitaallutik atorfeqartinneqartut inissiamik annerpaamik tallimanik initalimmik tunineqarsinnaapput, inoqutigiinni inuit amerlassusaat atorfeqartup inissiamik anginerusumik innersuunneqarnissaanut pisinnaatitaaffiliisut apeqqutaatinnagit. Maleruagassaq pissusiviusunik tunngaveqartinneqarluni ilanngunneqarpoq, Kalaallit Nunaanni inissiat arfinilinnik initallit ikittuaraannarsuit pigineqarmata.

Inoqutigiinni inuit amerlassusaat piffissami inniminniiffiusumi sulisitsisumit, sulisumut inissiamik inniminniissummik immersuisuusumit allanneqassapput. Tamatuma saniatigut piffissami innersuussiffiusumi inoqutigiit amerlassusaat allanneqassapput, inniminniinerup kingorna innersuussinissarlu sioqqullugu inoqutigiinni inuit amerlassusaat allannguuteqarsimasinnaammata. Piffissami innersuussiffiusumi inoqutigiinni inuit amerlassusaat inissiap qanoq angitigisup sulisumut tunniunneqarnissaanut aalajangiisuusaaq. Inniminniissutip paasissutissanik eqqortunik imaqarnissaa sulisitsisup akisussaaffigaa.

§ 19-imut

Aalajangersakkami allassimavoq, inoqutigiinni inuit amerlassusaat inissiamik innersuussinissamut atatillugu qanoq aalajangersarneqassanersut.

Angajoqqaat kisimiittut taamatullu aappariit meerallit inuttut marluttut naatsorsorneqartarput. Angajoqqaat kisimiittut aappariinnut sanilliunneqartarput, angajoqqaat kisimiittut ataatsimik meerallit namminneq sinittarfeqarnissaminnik, tamatumalu saniatigut meeqqap nammineq sinittarfeqarnissaanik pisariaqartitsinerisa aappariit namminneq sinittarfeqarnissaminnik, tamatumalu saniatigut meeqqap nammineq sinittarfeqarnissaanik pisariaqartitsinerisa annertoqatigiinnassagaa naatsorsuutigineqartariaqarmat.

Naartuneq naatsorsuineranut ilaatinneqarneq ajorpoq, tamanna nalorninarqarsinnaammat.

§ 20-mut

Aalajangersakkap atuutilerneratigut Naalagaaffiup Sinniisoqarfiani, Nunatta Eqqartuussiviani, Kalaallit Nunaanni Politimesterqarfimmi, Inatsisartuni sullissivinnilu taakkununga atasuni sulisut, kiisalu Namminersornerullutik Oqartussat qitiusumik allaffeqarfianni sullissivinnilu tassunga atasuni sulisut, pisussaapput inissiamik innersuunneqartumik tigusissallutik, tassani pisortat Naalackersuisunilu ilaasortat kisimik pineqanngillat. Sulisut taakku inissiamik innersuunneqartumik tigusinissaq kissaatiginngippassuk, tamanna sukumiinerusunik nassuiarneqartunik arlalinnik kinguneqarsinnaavoq. Assersuutigalugu sulisoq inissiamut allamut innersuunneqarnissamut pisinnaatitaaffeerutissaaq.

Sulisup inissiamik tigusinissamut pisussaaffiligaanera, pisortat sulisitsisullu sulisumut inissiamik innersuussisussaataitaneranut pissusissamisoortumik illuatungiliunneqartutut isigineqassaaq. Tassalu sulisitsisup inissiamik innersuussinerani inissarsiortut aalajangersimasumik qinnuteqaateqarnerat tunngavigineqartanngilaq, kisiannili atorfinitsinnerup malitsigisaatut isigineqartarluni. Taamaattumik sulisup atorfininnerminit piffissap sivikitsuinnaap ingerlanerani inissiamut innersuunneqarnissani naatsorsuutigisariaqarpaa.

Tamatumani sulinermik inuussutissarsiutillit kattuffiata sulisup ilaasortaaffigisaata ilaasortamik pilertortumik inissavimminnut innersuunneqarsinnaanissaat, taamaalillutillu inuunermik nalinginnaasumik ingerlatsilernissaat soqutigisarissagaa naatsorsuutigineqartariaqarpoq.

Taamaattumik sulisup inissiamik innersuunneqarsinnaatitaalluni atorfeqartinneqartup pilertornerpaamik sulisunut inissiamut najugarilivigassaanut innersuunneqarnissaata qulakkeerneqarnissaa anguniarneqartassaaq.

Sulisut inissiaq innersuunneqartoq naatsorsuutigisanut naapertuutsitsinngitsutut isumaqarfigunikku, nammineq kissaatigisaminnik nuunnissamut imaluunniit inissianik taartigiinnissamut inissianillu niueruteqarnermi neqeroorutaasartunut allanut periarfissiissutaasut atorsinnaavaat.

§ 21-mut

Aalajangersakkap atuutilerneratigut Naalackersuisut imaluunniit kommunalbestyrelsep aalajangersinnaavaa, sulisoq sulisunut inissiami najugaqartoq inissiamik attartortittakkamik nalinginnaasumik neqeroorfigineqarnermini inissiaq najukkani inissiani attartortittakkani nalinginnaasuni piumasaqaatit naapertorlugit najuinnassanerlugu aalajangersinnaatitaassanersoq. Tamatumani atorfillip inissiaq najukkani tigummiinnarniarlugu aalajangernerata pitsaaqutigissavaa, inissiamut init amerlaqataannik initalimmut nuuttariaqannginnera. Sulisup pisinnaatitaaffianit

sulisunut inissianut imaluunniit inissianut attartortittakkanut nalinginnaasunut inissarsiortut allattorsimaffianni allatsissimasut allat sunniuteqarfigineqassanngillat, sulisunut inissiamut taarsiullugu inissiaq attartortittagaq nalinginnaasoq neqeroorutigineqartoq peerneqartussaammat. Sulisoq inissiamut attartortittakkamut nalinginnaasumut neqeroorutigineqartumut nuunnissaminut taarsiullugu sulisunut inissiaq najuinnarniarlugu aalajangerpat, inissiamut normu sulisup sulisitsisuata pigisaa atorneerutissaaq, taannalu atorlugu sulisunut inissiamik allamik inniminniisoqarsinnaavoq.

Sulisoq sulisunut inissiami ukiut arfineq marluk sinnerlugit najugaqarsimasoq inissiamik inissiatut attartortittakkatut nalinginnaasutut tigusinissani qinnutigisinnaavaa. Tamatumani piomasagaataavoq sulisup piffissaq tamakkerlugu inissarsiortut allattorsimaffianni nalinginnaasumi allatsissimanissaa.

Periarfissat nassuiarneqartut marluk inissianut Naalagaaffiup Sinniisoqarfiani, Nunatta Eqqartuussiviani, Kalaallit Nunaanni Politimesterqarfimmi sullissivinnilu taakkununga atasuni, inissianut Naalakkersuisuni ilaasortanut Naalakkersuisoqarfinnilu ataasiakkaani pisortanut, inissianut Namminersornerullutik Oqartussat qitiusumik allaffeqarfianni sulisunut innersuunneqarsimasunut, kiisalu inissianut siunertanut aalajangersimasunut inniminnerneqarsimasunut imaluunniit inissianut atorfinnut aalajangersimasunut aalajangigaasunut atuutinngillat.

§ 22-mut

Aalajangersakkap atuutilerneratigut kommunep inissianik isumaginninnermi siunertanut innersuussisinnaatitaanerninik atuisup qulakkeertassavaa, kommunep taamaaliornermigut inissiaqarfittut immikkoortortamut aningaasatigut annasaqartitsinnginnissani. Annaasaqarsinnaanermut matussusiinissaq ilaatigut kommunep attartornermut isertitassat uninngatinneqarnerinut akiliisarneratigut, ilaatigut annasaqarsinnaanermut qularnaveeqqusiineratigut aammalu ilaatigut kommunep qularnaveeqqusiissutissanik tamakkiisunik akiliineratigut qulakkeerneqassaaq. Taamaattorli attartortup attartortitsisumut uppersarsinnaappagu, attartortoq ineqarnermut aningaasartuutitut ingerlaavartunut akiliisinnaanerninut naammattunik isertitaqartartoq, kommunep annasaqarsinnaanermut qularnaveeqqusiinissaq pisussaaffigissanngilaa.

Taamatuttaaq attartortitsisup kommune inissianik isumaginninnermi siunertanut innersuussinerani itigartissinnaavaa, attartortoq siusinnerusukkat attartortitsisumut attartornermini ineqarnermut akiligassanik akilinngitsuugaqarsimappat imaluunniit taarsiinissamut piomasagaatinut akiligassaqarpat. Assersuutigalugu attartortitsisoq attartortup siusinnerusukkat attartukkaminut ineqarnermut akiliutinik akiliinngitsoornini pissutigalugu anisitaanerani annasaqarsimaguni, attartortoq taarsiisussanngortissinnaavaa. Kommunep ineqarnermut akiligassat akilinngitsuukkat imaluunniit taarsiinissamut piomasagaatit akilersinnaagunigit inissiamik isumaginninnermut atatillugu innersuussisoqarsinnaassaaq.

§ 23-mut

Inissiamik isumaginninnikkut innersuussisarnermi attartortup ineqarnermut akiliummik akiliisinnaanissaa aallaavigineqassaaq, pineqartoq aningaasaqarnikkut ajornartorsiortutut isigineqanngimmat, taamaallaalli tamatumani iserfissaarunnera, tassalu inissaaleqinera pineqarmat.

Kommunep inissarsiortut allattorsimaffiat sanioqqutiinnarlugu innersuussinissaq kisiat siunertarlugu inissiamik isumaginninnikkut innersuussinermik atuippat, kommunep annaasaqarsinnaanera annikitsuarsuussaaq. Tamatumani attartortitsisup kommunep annaasaqarnissamut qularnaveeqqusiissutaanut itigartitsinissaa naatsorsuutigineqartariaqarpoq, inissiamik inunnik isumaginninnikkut innersuussatut tunineqartup inissiamut aningaasartuutissat matussusernissaannut naammattunik aningaasassaqaarnissaa naatsorsuutigineqartariaqarmat.

Kommune inummik inissaaleqiinnarani aammattaaq aningaasakilliortumut inissiamut innersuussisariaqartillugu, kommunep annaasaqarsinnaanermut qularnaveeqqusiissutaata attartortitsisumit atorineqarnissaa kommunemiit naatsorsuutigineqartariaqarpoq, inissarsiortup inissiamut aningaasartuutissat matussusernissaannut naammattunik aningaasassaqaannginnissaa naatsorsuutigineqartariaqarmat.

Annaasaqarsinnaanermut qularnaveeqqusiissut tunngavigalugu piumasarineqartussat attartortup attartornerata unitsinneqarnerata imaluunniit anisitaanerata kingorna naatsorsorneqassapput. Qularnaveeqqusiissut attartortup inissiamik atugassinneqarnerata kingorna qaammatit aqqaneq marluk qaangiunnerini ingerlaannartumik atorunnaassaaq, tassalu attartortitsisup attartorneq qaammatit aqqaneq marluk iluanni atorunnaarsissavaa. Piffissap taassuma ingerlanerani attartortitsisup annaasaqarsinnaanermut qularnaveeqqusiissutissamik atuisimanini pillugu kommune allaffigereersimassavaa.

Assersuutigalugu attartugassaq attartortumut 1. december 2004-mi atugassiissutigineqarsimappat, annaasaqarsinnaanermut qularnaveeqqusiissut 30. november 2005 ilanngullugu atuuttussaatinneqassaaq. Kingusinnerpaamik 30. november 2005-imi attartortitsisup qularnaveeqqusiissut atugassanngorniarlugu kommune allakkatigut ilisimatissimanngippagu, qularnaveeqqusiissut ingerlaannartumik atorunnaassaaq.

Attartortitsisup 30. november 2005-imi attartortup ineqarnermut akiliuteqarsimannginnera peqqutigalugu attartorneq unitsinneqarsimammat qularnaveeqqusiissut atugassanngorniarlugu kommune allakkatigut ilisimatissimappagu tamanna naammappoq, aammattaaq ullormi tassani annaasat amerlassusaat takuneqarsinnaanngikkaluarpataluunniit. Annaasat aatsaat 2006-imi aprilimi eqqartuussummik naammassititsiniaasartup attartortumik attartorneqartumiit anisitsinerata kingorna naatsorsorneqarsinnaappata, attartortitsisup eqqartuussummik naammassititsiniaasartup anisitsinerata

kingunitsianngua akiligassap akileqquneqartup annertussusianik kommunemut nalunaaruteqarnissaanut piffissaqarluarpoq.

Tassalu tamanna piffissaliussap iluani piumasaqaatissanik pinngortoqarsimaneranut qularnaveequsiissutip atugassanngornissaanut naammappoq, naak piffissaliussap naanerata kingorna aatsaat annaasat amerlassusaat paasineqarsinnaagaluartut.

§ 24-mut

Aalajangersakkap atuutilerneratigut attartortoq inissiamik najukkaminik piginneqatigiilluni inissiatut imaluunniit namminerisamik inissiatut tigusinissaminik kissaateqanngitsoq inissiamut assingusumut innersuunneqarnissamut pisinnaatitaavoq. Inissiaq naammaattumik angissuseqassaaq pitsaassuseqassallunilu, aammalu ineqarnermut aningaasartuutit tamakkiisut sapinngisamik inissiami qimanneqartumi aningaasartuutit annertoqatigissallugit. Taamaattorli attartortup inissiaq innersuunneqartoq tigussallugu pisussaataaangilaq, attartortoq inissiaq najukkani piumasaqaatit atuuttut allangortinnagit najuinnassallugu aalajangersinnaavoq.

Illumi attartortut najukkaminni inissianik attartortittakkanik piginneqatigiilluni inissiannngortitsinissaq siunertaralugu piginneqatigiilluni inissiaatillit peqatigiiffiannik pilersitsisimappata, Naalakkersuisut peqqussummi matumani aalajangersakkat sanioqqussinnaavaat. Taamaaliornikkut allannguiniarnermi suliamut tapersiinissaq siunertarinearpoq.

§§ 5-imik aamma 65-imik sanioqqutsisinnaanermut periarfissaq piginneqatigiilluni inissiaatillit peqatigiiffiata pilersinneqarneraniit aamma illumik tigusinissamik allakkatigut qinnuteqarneraniit atuutilissaaq.

Kiisalu inissianik attartortittakkanik piginneqatigiilluni inissiaatillit peqatigiiffiannut allannguiniarluni suliap ingerlanerani attartortitsisoq inissiamik inueruttumik inummut peqatigiiffimmuut ilaasortanngorniarluni allatsissimasumut innersuussisinnaavoq.

Kapitali 3-mut

Kapitali 3-mi aalajangersakkat attartorneq pillugu Inatsisartut peqqussutaanni nr. 5-imi, 31. maj 2001-imeersumi kingusinnerusukku allannguuteqartinneqartumi §§ 8-9-mi aamma 12-imi aalajangersakkanut taartaapput. Aalajangersakkanut maannamut atuuttunut naleqqiullugu najoqqutassatigut allannguisoqarpoq, tamatumalu nassatarisaanik inatsisitigut inissisimaneq allanngortinneqarpoq, tamannalu pingaartumik ilaqutariinnut ataatsinut illuni illunilu affarleriinni inatsisitigut inissisimanermut tunngasuuvoq, kisiannili aamma oqaasertaasigut erseqqissaasoqarpoq, taakkunanilu inatsisitsitigut inissisimanermut najoqqutassanik allannguisoqanngilaq.

Aalajangersakkat attartorneq pillugu Inatsisartut peqqussutaanni nr. 5-imi, 31. maj 2001-imeersumi kingusinnerusukkat allannguuteqartinneqartumi §§ 8-9-mut aamma 12-imut naleqqiullutik "Najugaqartut oqartussaaqataanerat"-nik qulequtserneqarlutik kapitalimut immikkoortumut inissinneqarput, tassani attartortut inissianik attartortittakkanik najukkaminnik ingerlatsinermut sunniisinnaaneranunt killissaqartitsinissaq pingaarnertut siunertarineqarnera ersarinnerulersinneqarluni.

§ 25-mut

Aalajangersagaq Namminersornerullutik Oqartussat kommunellu ilaqutariinnut arlalinnut illuutaannut oqaatsitigut erseqqissarneqarluni, attartorneq pillugu Inatsisartut peqqussutaanni nr. 5-imi, 31. maj 2001-imeersumi kingusinnerusukkat allannguuteqartinneqartumi § 8, imm. 1-3-mut assingusuvoq.

Namminersornerullutik Oqartussat kommunellu ilaqutariinnut ataatsinut illuutaat illullu affarleriit najugaqatigiiffinnut agguarneqartarunnaarlutik ingerlatsinermut aserfallatsaaliuinernullu immikkoortortaqaqfinnut agguarneqartalerput, tak. § 30. Aalajangersakkap atuutilernergatigut Namminersornerullutik Oqartussat kommunellu ilaqutariinnut arlalinnut illuutaat, tassalu illut quleriit, illut sanileriit illullu uigulukuttut, inissianik imminnut atasunik minnerpaamik pingasunik inissiarallit, najugaqatigiiffinnut agguarneqarput. Najugaqatigiiffinnut agguaneq piginnittup suliniuteqarneratigut piumasaqarneratigullu pisassaaq, attartortut suliniuteqarneratigut pinnani.

Najugaqatigiiffik naatsorsuutininik immikkut ingerlatsiffiuvoq, aningaasaqarneralu najugaqatigiiffik aamma ingerlatsinermut aserfallatsaaliuinernullu immikkoortortaqaqfinnit allanit immikkoortitaavoq. Najugaqatigiiffik inuit inatsisitigut piginnaatitaaffeqarneratuulli isigineqarsinnaanngilaq.

Inatsisini maannamut atuuttuni aalajangersarneqarpoq, "Namminersornerullutik Oqartussat kommunellu inissiaataat attartortittakkat najugaqatigiiffinnut namminerisaminnik aningaasaqarnermik ingerlataqartunut agguarneqassasut", tak. Inatsisartut peqqussutaanni nr. 5-imi, 31. maj 2001-imeersumi kingusinnerusukkat allannguuteqartinneqartumi § 8, imm. 1. § 25, imm. 1-imi oqaasertaliussamut allannguummi erseqqissarneqarpoq, najugaqatigiiffiit inuttut piginnaatitaaffiligaasutut isigineqarsinnaanngitsut.

Aalajangersakkamissaaq erseqqissarneqarpoq attartortut najugaqatigiiffimmi ataatsimiititsinermi najugaqatigiiffimmut siulersuisunik qinersisimappata, attartortut najugaqatigiiffiup ingerlanneqarneranut sunniuteqaqataanissamut pisinnaatitaaffeqartut. Attartortut najugaqatigiiffiup ingerlanneqarneranut sunniuteqaqataasinnaanerat najugaqatigiiffimmi siulersuisut aqutugalugit aammalu § 26-mi aamma § 28, imm. 4-mi aalajangersakkat naapertorlugit pissaaq.

Kiisalu imm. 3-mi Naalakkersuisut Namminersornerullutik Oqartussat kommunellu ilaqutariinnut arlalinnut illuutaasa najugaqatigiiffinnut agguarneqarnissaat, najugaqatigiiffinni siulersuisunut qinersisarneq najugaqatigiiffinnilu siulersuit

sulinerat, matumani ilanngullugit najugaqatigiiffinni siulersuisut najugaqartunut aningaasaliissutinik atuinissaannut maleruagassat pillugit maleruagassiornissamut pisinnaatitaaffilerneqarput.

Naalackersuisut Namminersornerullutik Oqartussat kommunellu inissiaataannik attartortittakkanik attartortitsisarneq pillugu Namminersornerullutik Oqartussat nalunaarutaanni nr. 23-mi, 22. december 2003-meersumi najugaqatigiiffiit allaffisornikkut aqunneqarnerat pillugu sukumiinerusunik maleruagassiaqarput.

§ 26-mut

§ 26, imm. 1-ip aamma imm. 2-p Inatsisartut peqqussutaanni nr. 5-imi, 31. maj 2001-imeersumi kingusinnerusukkat allannguuteqartinneqartumi § 9, imm. 1 aamma imm. 2 assigai. Oqaasertai ataasiakkaat iluarsineqarput, tamatumani taamaallaat maleruagassat maannamut atuuttuusimasut erseqqissarneqarnissaat siunertarineqarpoq.

§ 26, imm. 1-ip aamma imm. 2-p atuutilernerisigut ukiut tamaasa missingersuusiornermut atatillugu najugaqatigiiffik misissuiffigineqartassaaq, attartortitsisorlu inissiaqarfimmik misissuineq tunngavigalugu ukiumut tulliuuttumut ingerlatsinermut missingersuutissanik siunnersuusiortassaaq. Ingerlatsinermut missingersuutitut siunnersuutit attartortumit inaarutaasumik akuerineqannginnerminni najugaqatigiiffimmi siulersuisunut oqaaseqarfigisassanngorlugit saqqummiunneqartassapput.

Najugaqatigiiffimmi siulersuisut ingerlatsinermut missingersuutini killissarititaasut iluanni siunnersuuteqarsinnaapput:

1. aserfallatsaaliugassat nutartigassallu suut attartortitsisup najugaqatigiiffimmi suliarisariaqarnersut,
2. najugaqatigiiffimmi init ataatsimoorussat ingerlanneqarnerinut atorneqarnerinullu tunngasut, aamma
3. najugaqatigiiffimmi sunngiffimmi sammisassanik assigisaanillu pilersitsinissaq pillugu.

Aalajangersakkani najugaqatigiiffimmi siulersuisut ingerlatsinermut missingersuutinik inaarutaasumik suliaqarnerannut, kiisalu aningaasat najugaqatigiiffimmi qanoq atorneqarnissaannut sunniisinnanermut periarfissiisoqarnissaa siunertarineqarpoq.

Inatsisartut peqqussutaanni nr. 5-imi, 31. maj 2001-imeersumi kingusinnerusukkat allannguuteqartinneqartumi § 9, imm. 3 siunnersuummi § 26, stk. 3-mit taarserneqarpoq.

§ 26, imm. 3-p atuutilerneratigut attartortitsisoq najugaqatigiiffinni tamavinni ukiumoortumik naatsorsuutinik suliaqartassaaq, taakkulu kukkunersiorneqarlutik attartortitsisumit inaarutaasumik akuerineqannginnerminni najugaqatigiiffinnut

oqaaseqarfigisassanngorlugit saqqummiunneqartassapput. Aalajangersakkap atuutilernerata kingunerisaanik Inatsisartut peqqussutaanni nr. 5-imi, 31. maj 2001-imeersumi kingusinnerusukkut allannguuteqartinneqartumi § 9, imm. 3 allanngortinneqarpoq, ukiumoortumik naatsorsuutit akuerineqartussanngorlutik najugaqatigiiffinni siulersuisunut nassiunneqartarunnaarlutik oqaaseqarfigisassanngorlugit nassiunneqartalerlutik. Allanguinermi tunngavigineqarpoq najugaqatigiiffinni siulersuisut ukiumoortumik naatsorsuutini akuersinissaat pisariaqartutut isigineqanngimmat, ukiumoortumik naatsorsuutini kisitsisit oqaluttuarisaanermut tunngasuummata, aammalu attartortut inissiat najukkamik ingerlanneqarnerinut sunniuteqarsinnaanerattartortut najugaqatigiiffinni siulersuisut aqutugalugit ingerlatsinermut missingersuutit il.il. suliarineqarnerinut sunniuteqarsinnaanerisigut qulakkeerneqarmat, tak. § 26, imm. 1 aamma imm. 2.

§ 26, imm. 4 nutaajuvoq, taassumalu atuutilerneratigut najugaqatigiiffinni siulersuisut ukiumoortumik naatsorsuutit akuerisat tusaatissatut tigusallissavaat.

Aalajangersakkap oqaasertai erseqqissarneqarlutik, Inatsisartut peqqussutaanni nr. 5-imi, 31. maj 2001-imeersumi kingusinnerusukkut allannguuteqartinneqartumi § 12-imit assingusuvoq.

Paragrafi nassataraa najugaqatigiiffinni namminerisamik pigisani imaluunniit illuutini namminerisamik pigisani ikinnerpaamik arfinilinnik inissiaartaqartuni, piginnittumit ataatsimit pigineqartuni, ataatsimoorussanik ataatsimik arlalinnilluunniit atortulersugaasuni, soorlu ataatsimut kiassagaasuni, errorsiveqartuni, nalliuttorsioartarfeqartuni, najugaqartut illuannik peqartuni il.il. attartortut apequtit illuutip ingerlanneqarneranut pingaarutillit tamaasa attartortitsisumut oqaloqatigiissutigisinnaalerpaat, tamatumani ineqartut sinniisaannik ataatsimik arlalinnilluunniit qinersisimaneq apeqqutaalluni.

Imm. 1-ikkut illuni namminerisamik pigisani attartortittakkanik inissialtanni attartortut attartortitsisumut oqaloqatiginnittarnissaat qulakkeerneqarpoq.

Siunnersuummi imm. 2-kkut Naalakkersuisut najugaqartut sinniisaannik qinersisarneq najugaqartullu sinniisaasa sulinerat, taassuma ataani illuni namminerisamik pigisani attartortittakkanik inissialtanni ingerlatsinermut sunniutqaqataasinnaanerat pillugu maleruagassiornissamut pisinnaatinneqarput. Ineqarnermik tamakkiisumik iluarsartuusseqqinnerup ilaatut, tassumalu nassataanik illut namminerisamik pigisat attartortittakkanik inissialtallit amerlassutsimikkut qaffannissaannik naatsorsuuteqarneq tunngavigalugu pisortat ilaqutariinnut arlalinnut inissiaataanni najugaqartut oqartussaaqataanerannut assingusumik aalajangeeqataasinnaanissaat qulakkeerniarlugu maleruagassiortoqarnissaa naapertuutissaaq. Naalakkersuisut taamaattunik maleruagassiorsinnaanissamut § 27, imm. 2-kkut tunngavissinneqarput.

Kapitali 4-mut

Kapitali 4-p attartorneq pillugu Inatsisartut peqqussutaanni nr. 5-imi, 31. maj 2001-imeersumi kingusinnerusuk allannguuteqartinneqartumi §§ §§ 10, 11 aamma 13, 14, 15 aamma 16 taarserpai. Aalajangersakkanut maannamut atuuttunut naleqqiullugu najoqqutassatigut allannguisoqarpoq, tamatumalu nassatarisaanik inatsisitigut inissisimaneq allanngortinneqarpoq, tamannalu pingaartumik ilaqtariinnut ataatsinut illuni illunilu affarleriinni inatsisitigut inissisimanermut tunngasuvoq, kisiannili aamma oqaasertaasigut erseqqissaasoqarpoq maleruagassallu ilusilersugaanerannik allannguisoqarluni, taakkunanilu inatsisitatigut inissisimanermut najoqqutassanik allannguisoqanngilaq.

Kapitali 4-mi paragrafit attartortumut ajoqutaasumik sanioqqunneqarsinnaanngillat.

§ 28-mut

§ 28-p annerpaartaa Namminersornerullutik Oqartussat kommunellu ilaqtariinnut arlalinnut inissiaataannut tunngatillugu Inatsisartut peqqussutaanni nr. 5-imi, 31. maj 2001-imeersumi kingusinnerusuk allannguuteqartinneqartumi § 10, imm. 1-3-mut aamma imm. 5-imut assingusuvoq.

Imm. 1-imi aalajangersarneqarpoq ilaqtariinnut arlalinnut inissiani pisortanit pigineqartuni ineqarnermut akiliutit najugaqatigiiffinni ataasiakkaani isertitat aningaasartuutitut naleqqunnissaat tunngavigalugu aalajangerneqartassasut. Tassalu ineqarnermut akiliut oqimaaqatigiissitsinikkut akiliuteqarfiusassaaq (attartorneq aningaasartuutitut aalajangigaasoq), tassanilu inissiaqarfittut immikkoortortap isertitai najugaqatigiiffiup aningaasartuutaanut naapertuutsinneqassapput.

Najugaqatigiiffiup ingerlanneqarneranut aningaasartuutit aningaasartuutitut assigiinngitsunut arlalinnut agguagaapput. Ilanngussaq 1-imi ingerlatsinermut aningaasartuutitut assersuutit arlallit takussutissiorneqarput. Ilannguaq 1 tamavinnut matussusiinngilaq, taamaattumillu inissiaqarfittut immikkoortortap aningaasartuutaanik tamakkiisunik attartortitsisup naatsorsuinerani ilanngussaq 1-imi taaneqartut saniatigut ingerlatsinermut aningaasartuutit allanik ilanngussisoqarsinnaavoq.

Aningaasartuutit pingasunngorlugit immikkoortiterneqarsinnaapput, tassa aningaasartuutitut nalinginnaasunut, illuartitanut aningaasartuutit immikkut ittunut. Aningaasartuutit nalinginnaasut ataaniissapput inissianik piginnittup aningaasaatitigut iluanaarutissai, iluarsaassineq, sillimasiissutit, aserorterinissamik pinaveersaartitsinermut akiliutit, inissiamit aninermi nalinginnaasumik iluarsaassinerit, najugaqartunut sammisaqartitsinerit il.il. Illuartitat tassaasinnaapput pilersaarutaasumik piffissaligaasumik aserfallatsaaliuinissamut nutarterinissamullu, inissiat inoqannginnerinut inissianiillu nuuttoqarneranut atatillugu annaasassanut atugassat. Aningaasartuutit immikkut ittut ataaniissinnaasut ilaatigut tassaapput inissiat inoqannginnerinut inissianiillu nuuttoqarneranut atatillugu aningaasanik illuartitsivigineqarsimangitsunut annaasat.

Ineqarnermut akiliutit aningaasartuutit naapertorlugit aalajangigaanerisa kingunerissanngilaat, aningaasartuutit inissiaqarfittut najugaqatigiiffinni ataasiakkaani ingerlatsinermit missingersuutitut ilanngunneqartut akiviusut imaluunniit najugaqatigiiffimut ataatsimut akiviusoq kisimik ilanngunneqarsinnaanissaat. Taamaattumik allanit sullinneqarnermut aningaasartuutit, soorlu allaffissornikkut aqutsisumut avataaneersumut akiliutit, tak. § 32, tamakkiisumik ingerlatsinermit missingersuutitut ilanngunneqassapput, tassalu allanit sullinneqarnermi sullissisuusup iluanaarutissaa ilanngunneqassaaq. Kiisalu allaffissornikkut aqutsinermit aningaasartuutitut akiliutit attartukkami ataatsimi attartortumut ataatsimut aningaasartuutissatut agguarneqassapput, tak. § 32, imm. 2.

Aammattaaq najugaqatigiiffimmi ilaqutariinnut arlalinnut inissianit ilaasortaaffigineqartumi ineqarnermut akiliutit aningaasartuutit naapertorlugit aalajangigaanerinit mattunneqassanngilaq, Kalaallit Nunaanni periaatsitut atuuttutut nalinginnaasutut assigiimmik akeqartitsisoqartarmat, imaluunniit assigiimmik akeqartitsinissamik maleruagassiortoqartarmat.

Siunnersuummi imm. 2-p atuutilerneratigut attartortut ataasiakkat ineqarnermut akiliutaannik qaffaanissap qaammatinik pingasunik siumut ilisimatitsereernikkut atuutsinneqalernerita unioqutitsinerissanngilaq. Siumoortumik ilisimatitsinerit, ineqarnermut akiliutip qaffanneranut peqqutaasumik taassumalu angissusaannik paasissutissanik imaqqanngitsut atuuttussanngortinneqarsinnaanngillat. Siumoortumik ilisimatitsissut minnerpaamik ineqarnermut akiliutit qaffanneqarnerinut pissutaasumut paasissutissanik pingaarnernik imaqassaaq. Pissutaasutut oqaatigineqarsinnaapput allaffissornikkut aqutsinermit aningaasartuutit qaffannerat, aningaasaliissutitut iluanaarutit qaffannerat, ingerlatsinermit pingaarnermut aningaasartuutit qaffannerat imaluunniit illuarterit aningaasartuutit qaffannerat. Attartortitsisup aamma paasissutissiisussaataaernerminut tapertaralugu ukiumut tulliuuttumut missingersuutit kisitsisitaat ilanngussinnaavai, tassanilu ukiumi ingerlasumi ukiumilu tulliuuttumi missingersuutit aningaasartuutissat pingaarnernit takuneqarsinnaassapput.

Paragrafimi imm. 4 naapertorlugu najugaqatigiiffimmi siulersuisut pitsanngorsagassanik nutartigassanillu naammaginartunik annertussusilinnik suliaqartoqarnissaanik siunnersuuteqarsinnaapput, assersuutigalugu tassaasinnaapput allanngortiterinerit, taassuma ataani atortut nukissamik sipaartut aamma teknikikkut atortulersuutit. Najugaqatigiiffimmi siulersuisut aamma ataatsimoorussanik atortussanik sananissamut siunnersuuteqarsinnaapput, taakku ataanni errorsisarfiit, init ataatsimoorarfii, pinnguartarfiit, biilnut unittarfiit il.il.

Tamatumani piumasaqaataavoq, najugaqatigiiffimmi siulersuisut siunnersuuteqarnerisa kingunerisaanik ineqarnermut akiliutip qaffanneqarnissaanut najugaqatigiiffimmi siulersuisut akuersinissaat. Siunnersuut imaluunniit siunnersuutit najugaqatigiiffimmi najugaqartut tamarnik ataatsimiitinneqarnerini akuersissutigineqartassapput.

Siunnersuummi imm. 5 naapertorlugu Naalackersuisut pilersaarutaasumik aserfallatsaaliuinissamut teknikikkullu atortulersuutinik nutarterinissamut illuartitsisarneq, ineqarnermut akiliutip naatsorsorneqartarnera aamma ineqarnermut akiliutip iluarsineqarnissaanut siumoortumik ilisimatitsisarneq pillugu maleruagassiornissamut piginnaatinneqarput.

§ 29-mut

Tunngaviatigut illunik piginnittut Namminersornerullutik Oqartussat kommunellu inissiaataanni attartortittakkani imermut uuttuusersuinissaq pisussaaffigaat, attartortut imermik atuinerat najugaqatigiiffimmut tamarmiusumut isumagineqarnerat naapertuuttut isumaqarfigineqanngimmat. Taamaalilluni attartortut imermik sipaartut attartortut imermik atuisorujussuit akiligassaannut akileeqaatasarnerat aalajangersakkap atuutilerneratigut atorunnaassaaq. Atuisut akiliuteqartarnerisa atuutilerneratigut imermik atuinerup apparnissaa naatsorsuutigineqarpoq, tamannalu Naalackersuisut avatangiisit eqqarsaatigalugit inatsimmik atulersitsinissamik pingaarnertut naalackersuinikkut ingerlatsinerannut napertuuppoq.

Imm. 2-p atuutilerneratigut imermut uuttuutinik ikkussuisussaataaneq aallaqaammut ikkussuinissaq teknikimut tunngasuinnaat eqqarsaatigalugit naapertuutsitsiviunngitsunut atuutissanngilaq. Tamatumani assersuutigalugu tassaapput illuni quleriinni erngup aqputaanik silaannarissarfikkut qummut ikkussuussinissaq, taamaalillunilu igaffiit tamarmik, uffarfiit tamarmik (errorfiit qortortitsiviillu immikkoortillugit) kiisalu kuutsitsisarfiit allat tamarmik aqqusaarneqassallutik.

§ 30-mut

§ 30, imm. 1 nutaajuvoq, taassumalu atuutilerneratigut ilaqtariinnut ataatsinut illut illullu affarleriit Namminersornerullutik Oqartussanit kommunenillu pigineqartut ingerlatsineranut aserfallatsaaliuinernullu immikkoortortanut aggorneqassapput. Siusinnerusukkut ilaqtariinnut ataatsinut illut illullu affarleriit Namminersornerullutik Oqartussanit kommunenillu pigineqartut najugaqatigiiffinnut aggorneqartaraluarput, tak. attartorneq pillugu Inatsisartut peqqussutaanni nr. 5-imi, 31. maj 2001-imeersumi § 8, imm. 1. Allannuineq najugaqatigiiffinni, maannamut ilaqtariinnut ataatsinut illunit illunillu affarleriinnit ilaaffigineqarsimasut najugaqatigiiffinni najugaqatigiiffimmut siulersuisunut qinersinikkut sunnuteqarsinnaanermikkut atuinissamik kissaateqartarsimanninnerisa kinguneraa. Tamatumunnga pingaartumik ilaqtariinnut ataatsinut illut illullu affarleriit ataatsimoorlutik inissisimanninnerat pequtaavoq, tamatumalu kingunerisaanik najugaqatigiiffinni ilaqtariinnut ataatsinut illuni illunilu affarleriinni attartortut ataatsimooratit. Tamanna tunngavigalugu ilaqtariinnut ataatsinut illut illullu affarleriit ingerlatsineranut aserfallatsaaliuinernullu immikkoortortanut aggorneqarnissaat naleqqunnerutinneqarpoq, taamaaliornikkut ataatsimoorfiusoq kisimi tassaalissalluni attartortut aningaasartuutit ilaannik agguaqatigiittarnerat.

Ingerlatsineranut aserfallatsaaliuinerimullu immikkoortortaq ilaqutariinnut arlalinnut inissianut najugaqatigiiffittulli naatsorsuutininik immikkut ingerlatsiviuvuq, aningaasaqarnera ingerlatsineranut aserfallatsaaliuinerimut immikkoortortanit najugaqatigiiffittullu allanit immikkoortitaaluni.

Kiisalu § 30, imm. 1-ip atuutilerneratigut kommunit ilaqutariinnut ataatsinut illut illullu affarleriit pigisatik ingerlatsineranut aserfallatsaaliuinerimullu immikkoortortamut ataatsimut amerlanerusunulluunniit agguassavaat. Ilaqutariinnut ataatsinut illut illullu affarleriit Namminersornerullutik Oqartussanit pigineqartut ingerlatsineranut aserfallatsaaliuinerimullu immikkoortortamut ataatsimut agguarneqassapput, tassani Naalakkersuisunut pisortanullu inissiat pineqanngillat, tak. § 14, imm. 1, taakku ingerlatsineranut aserfallatsaaliuinerimullu immikkoortortamut nammineq ingerlasumut immikkoortinneqartussaammata.

Imm. 2-4-mi aalajangersakkat atuutilernerisigut ilaqutariinnut ataatsinut illuni illunilu affarleriinni pisortanit pigineqartuni ineqarnermut akiliutit ingerlatsineranut aserfallatsaaliuinerimullu immikkoortortani ataasiakkaani isertitat aningaasartuutininut naleqqunnissaat tunngavigalugu aalajangerneqartassapput. Tassalu ineqarnermut akiliutit oqimaaqatigiisitsinikkut akiliuteqarfiusassaaq (attartorneq aningaasartuutinit aalajangigaasoq), tassanilu ingerlatsineranut aserfallatsaaliuinerimullu immikkoortortap isertitai ingerlatsineranut aserfallatsaaliuinerimullu immikkoortortap aningaasartuutaannut naapertuutsinneqassapput.

Ineqarnermut akiliutit aningaasartuutit naapertorlugit aalajangigaanerisa kingunerissanngilaat, aningaasartuutit ingerlatsineranut aserfallatsaaliuinerimullu immikkoortortani ataasiakkaani ingerlatsineranut missingersuutininut ilanngunneqartut akiviusut imaluunniit najugaqatigiiffimmi ataatsimut akiviusoq kisimik ilanngunneqarsinnaanissaat. Taamaattumik allanit sullinneqarnermut aningaasartuutit, soorlu aqutsisumut avataaneersumut akiliutit, tak. § 32, imm. 1-6, tamakkiisumik ingerlatsineranut missingersuutininut ilanngunneqassapput, tassalu allanit sullinneqarnermi sullissisuusup iluanaarutissaa ilanngunneqassalluni. Kiisalu allaffissornikkut aqutsineranut aningaasartuutininut akiliutit attartukkami ataatsimi attartortumut ataatsimut aningaasartuutissatut agguarneqassapput, tak. § 32, imm. 1-6.

Aammattaaq ingerlatsineranut aserfallatsaaliuinerimullu immikkoortortani ilaqutariinnut ataatsinut illunit illunilu affarleriinnit ilaasortaaffigineqartuni ineqarnermut akiliutit aningaasartuutit naapertorlugit aalajangigaanerinit, Kalaallit Nunaanni periaatsitut nalinginnaasutut atuuttutut assigiimmik akeqartitsisoqartarnera, imaluunniit assigiimmik akeqartitsinissamik maleruagassiortoqartarnera mattunneqassanngilaq.

Imm. 3-p atuutilerneratigut ingerlatsineranut aserfallatsaaliuinerimullu immikkoortortap ingerlanneqarneranut aningaasartuutit aningaasartuutininut assigiinngitsunut arlalinnut agguagaapput. Ilanngussaq 2-mi ingerlatsineranut aningaasartuutininut assersuutit arlallit takussutissiorneqarput. Ilanngussaq 2 tamavinnut matussusiinngilaq, taamaattumillu najugaqatigiiffiup aningaasartuutaanik

tamakkiisunik attartortitsisup naatsorsuinerani ilanngussaq 2-mi taaneqartut saniatigut ingerlatsinermut aningaasartuutitik allanik ilanngussisoqarsinnaavoq.

Siunnersuummi imm. 4-p atuutilerneratigut attartortut ataasiakkat ineqarnermut akiliutaannik qaffaanissap qaammatinik pingasunik siumut ilisimatitsereernikkut atuutsinneqalertarnera unioqqutitsinerussanngilaq. Siumoortumik ilisimatitsinerit, ineqarnermut akiliutip qaffanneranut pissutaasumik taassumalu angissusaanik paasissutissanik imaqqanngitsut atuuttussanngortinneqarsinnaanngillat. Siumoortumik ilisimatitsissut minnerpaamik ineqarnermut akiliutit qaffanneqarnerinut pissutaasumut paasissutissanik pingaarnernik imaqassaaq. Pissutaasutut oqaatigineqarsinnaapput allaffissornikkut aqutsinermut aningaasartuutit qaffannerat, aningaasaliissutinit iluanaarutit qaffannerat, ingerlatsinermut pingaarnermut aningaasartuutit qaffannerat imaluunniit illuartitanut aningaasartuutit qaffannerat. Attartortitsisup aamma paasissutissiisusaaatitaanerminut tapertaralugu ukiumut tulliuuttumut missingersuutit kisitsisitaat ilanngussinnaavai, tassanilu ukiumi ingerlasumi ukiumilu tulliuuttumi missingersuutini aningaasartuutissat pingaarnertit takuneqarsinnaassapput.

§ 30, imm. 5 nutaajuvoq, taassumalu atuutilerneratigut attartortitsisoq ineqarnermut akiliutip aalajangernerani imm. 2-4-mi aalajangersakkat tunngaviginiarnagit aalajangersinnaavoq, tamatumunngalu taarsiullugu ilanngussaq 3-mi kisitsisit aallaavissiat illuummik piginnittunut aningaasaliissutiniit iluanaarutissanut aningaasartuutitik, tak. § 31, aamma allaffissornikkut aqutsinermut aningaasartuutitik, tak. § 32, tapeqartitsiviusussat tunngaviginiarlugit aalajangersinnaalluni, tamatumani ingerlatsinermut aserfallatsaaliuinernullu immikkoortotami aningaasartuutiviusut apeqqutaatinnagit. Aalajangersagaq ilaqutariinnut ataatsinut illuni illunilu affarleriinni ineqarnermut akiliutip ingerlatsinermut aserfallatsaaliuinernullu immikkoortotami isertitat aningaasartuutinit naleqqunnissaat tunngavigalugu naatsorsorneqartarneranut aallaaviusumik naleqqussaaneruvoq.

Aammattaaq § 30, imm. 5-ip atuutilerneratigut attartortut ataasiakkat ineqarnermut akiliutaannik qaffaanissap qaammatinik pingasunik siumut ilisimatitsereernikkut atuutsinneqalertarnera unioqqutitsinerussanngilaq. Siumoortumik ilisimatitsinerit, ineqarnermut akiliutip qaffanneranut peqqutaasumik taassumalu angissusaanik paasissutissanik imaqqanngitsut atuuttussanngortinneqarsinnaanngillat. Siumoortumik ilisimatitsissut minnerpaamik ineqarnermut akiliutit qaffanneqarnerinut pissutaasumut paasissutissanik pingaarnernik imaqassaaq. Pissutaasutut oqaatigineqarsinnaapput allaffissornikkut aqutsinermut aningaasartuutit qaffannerat, aningaasaliissutinit iluanaarutit qaffannerat imaluunniit akit aallaaviusut qaffannerat. Attartortitsisup aamma paasissutissiisusaaatitaanerminut tapertaralugu ukiumut tulliuuttumut missingersuutit kisitsisitaat ilanngussinnaavai, tassanilu ukiumi ingerlasumi ukiumilu tulliuuttumi missingersuutini aningaasartuutissat pingaarnertit takuneqarsinnaassapput.

Imm. 6 nutaajuvoq, tassanilu aalajangersarneqarpoq attartortitsisup qaammatisiutit malillugit ukiup naanissaanut qaammatit pingasut sioqqullugit allakkatigut siumoortumik ilisimatitsissuteqarnermigut imm. 2-4-mi aalajangersakkat

tungavigalugit ineqarnermut akiliummik aalajangersaanissaq atornagu (ingerlatsinermit missingersuutit tungavigalugit oqimaaqatigiissitsilluni ineqarnermut akiliuteqartitsineq) imm. 5-imi maleruagassat atorniarlugit (kisitsisit aallaavissiat tungavigalugit ineqarnermut akiliuteqartitsineq) imaluunniit paarlattuanik piniarluni.

Ineqarnermut akiliutip qaffannissaanut naatsorsueriaatsimik allannguisoqarsimappat, siumoortumik ilisimatitsissut qaffaanermit tungaviusoq aamma qaffaatissap qaammammut annertussusissaa koruuninngorlugu imaqarpat tamanna inatsisunik malinninnerusaaq.

Aammattaaq imm. 7 nutaajuvoq, taassumalu atuutilerneratigut aningaasartuutit ilaat attartortumit toqqaannartumik akilerneqartalissapput. Ineqarnermut akiliut imm. 2-4-imi maleruagassat malillugit (ingerlatsinermit missingersuutit tungavigalugit oqimaaqatigiissitsilluni ineqarnermut akiliuteqartitsineq) imaluunniit imm. 5-imi maleruagassat malillugit (kisitsisit aallaavissiat tungavigalugit ineqarnermut akiliuteqartitsineq) aalajangersarneqaraluarpalluunniit aalajangersagaq atuutissaaq.

Taamaalilluni aalajangersakkap atuutilerneratigut attartortut siunissami eqqagassat aaneqartarnissaat, septiktankit imaarneqartarnissaat imermillu pajunneqartarnissaq pillugu isumaqatigiissuteqartalissapput, attartortullu innaallagiasq, imeq kiassarnerlu atugartik kisiat akilertalissavaat. Attartortut toqqaannartumik aningaasartuutitut, § 30, imm. 7-imi taaneqartunut akiliisassapput.

§ 30, imm. 8-imi aalajangersagaq naapertorlugu Naalackersuisut pilersaarutaasumik aserfallatsaaliuinissamut teknikikkullu atortulersuutit nutarterinissamut illuartitsisarneq, ineqarnermut akiliutip naatsorsorneqartarnera aamma ineqarnermut akiliutip iluarsineqarnissaanut siumoortumik ilisimatitsisarneq pillugu maleruagassiornissamut pisinnaatitaaffilerneqarput.

§ 31-mut

Paragrafi annikitsunnguanik allannguuteqartinneqarluni Inatsisartut peqqussutaanni nr. 5-imi, 31. maj 2001-imeersumi kingusinnerusukkut allannguuteqartinneqartumi § 10, imm. 4-mut aamma § 11-imut assingusuvoq. Aalajangersagaq Namminersornerullutik Oqartussat kommunellu ilaqutariinnut arlalinnut illuutaannut, tak. § 28, aamma ilaqutariinnut ataatsinut illunut illunullu affarleriinnut, tak. § 30, atuutsinneqarpoq.

Namminersornerullutik Oqartussat kommunellu aningaasaaliissutinit iluanaarutissaat illup sananeqarnerani akiata 1,5%-ianik annertussuseqarput.

Paragrafimi illut sananeqarnerinut akiinik naatsorsuisarnermut maleruagassat takutinneqarput. Sananermut akiusoq Namminersornerullutik Oqartussat kommunellu ukiumoortumik aningaasaliissutinit iluanaarutissaannik naatsorsuinermi tungaviusarpoq.

Imm. 2-mi sananermut akiusoq, aningaasaatitigut iluanaarutissat naatsorsorneqarnerinut atorneqarsinnaasoq kradratmeterimut 7.000 koruuninik minnerpaaffilerneqarpoq aammalu 15.000 koruuninik annerpaaffilerneqarluni. Tamatumunnga tunngaviuvoq illut nutaanngitsut nutaanerusullu aningaasaliissutinit iluanaarutissartaasa assigiinngippallaannginnissaannik qulakkeerinissamut kissaateqarneq.

Illumi iluarsaanneqarsimasumi sananermut akiusoq illup iluarsaanneqareernerani teknikikkut aningaasaqarnikkullu naliliineq tunngavigalugu aalajangersarneqartarpoq, tak. imm. 3. Taamaalilluni illup pineqartup nalinga piffissami akiusut malillugit aalajangerneqartarpoq. § 31, imm. 2 aamma illuni iluarsaanneqarsimasuni sananermut akiusup aalajangersarneqarneranut atorneqartarpoq.

Siunnersuummi imm. 4 malillugu illumi pisiaasumi sananermut akiusup naatsorsornerani pisinermut akiusoq kingusinnerusukkullu allanngortiterinerit, iluarsaassinerit pitsannguinerilluunniit nalinganut annertusaataasinnaasut ilanngullugit annertussusilerneqassaaq. Illumi pisiarineqartumi iluarsaassineq illup nalinganut qaffatsitsinngippat, iluarsaassinermut aningaasartuutit illup pisiarineqarneranut akiusumut ilassutigineqassanngillat. § 31, imm. 2 aamma illuni iluarsaanneqarsimasumi sananermut akiusup aalajangersarneqarneranut atorneqartarpoq.

Illup akeqanngitsumik tunissutitut, kingornussinikkut, taarsiissutitalimmik arsaagaanikkut imaluunniit aapparisaq taarsernerani pissarsiarineqartoq sananermut akiata aalajangersarneqarnerani illup teknikimut aningaasaqarnermullu tunngasunik naliliiffigineqarnera tunngavigineqassaaq, tak. imm. 7. Tassanissaaq § 31, imm. 2 atorneqassaaq.

Illup teknikikkut aningaasaqarnikkullu nalingata aamma niuernikkut nalingata assigiinngissutigaaq, teknikikkut aningaasaqarnikkullu naliliinermi illup sananeqarnerani atortussat akiisa, sulinermi akissarsiat aningaasaliissutinullu aningaasartuutit kisimik eqqarsaatigineqartarnerat, tassalu illup nalinga kikissat kikissallu qinnillit nali malillugit aalajangerneqartarpoq, kiisalu niuernikkut nalingata aalajangerneqarnerani illup qanoq akilersillugu tunineqarsinnaanerani ersersitsisuusarpoq. Tassalu illup niuernikkut nalinga teknikikkut aningaasaqarnikkullu nalinganit sumiiffinni illunik piumanninnerup annertuffiini qaffasinnerusarpoq, parlattuanillu sumiiffinni illunik piumanninnerup annikiffiini immaqaluunniit piumanniffiunngitsuni appasinnerusarluni.

Imm. 5-imi illuuttip sananeqarnerani akiusoq akinut minnerpaaffissamut kvadratmeterimut 7.000 kr.-inut aalajangerneqarsimappat, aammalu illuummi atortulersuutit nalinginnaasut ilaannik illu amigaateqarpat, sananermut akiusoq atortulersuummut amigaataasumut ataatsimut kvadratmeterimut 1.000 kr.-inik appaasoqarsinnaanera aalajangersarneqarpoq.

Imm. 6-imi naternut, qilaamut iikkanullu kiffiutissat mineraluldit 250 mm-it inorlugit issussuseqarpat, sananermut akiusoq ilanngaaserneqarnissaa

aalajangersarneqarpoq, tak. imm. 5, nr. 6. Kiffiutissat allat atorineqarsimappata, kiffiutissat oqorsaasinnaassusiat mineraluldip oqorsaasinnaassusianut uuttuunneqassapput, taamaalillunilu oqorsaasinnaassusii assigiimmik naliliiffiqarsinnaassallutik.

§ 30-mi imm. 7-imi aalajangersakkap atuutilerneratigut Naalackersuisut imm. 3 aamma 4 malillugu teknikimut aningaasaqarnermullu naliliinissap qanoq ingerlanneqarnissaa pillugu maleruagassiornissamut pisinnaatinneqarput.

§ 32-mut

§ 32 nutaajuvoq, Namminersornerullutik Oqartussat kommunellu ilaqutariinnut arlalinnut inissiaataanni aamma ilaqutariinnut ataatsinut illuni illunilu affarleriinni aqutsisumut akiliutinut tunngasuulluni.

Imm. 1 attartortitsisup illuutiminik attartortittakkanik nammineerluni allaffissornikkut aqutsineranut tunngasuvoq. Attartortitsisup, tassalu Namminersornerullutik Oqartussat kommunelluunniit attartortut allaffissornikkut aqutsinermut akiliisinniarsinnaavai, allaffissornikkut aqutsinermut atatillugu aningaasartuutitut toqqaannangitsunut taamatullu toqqaannartunut matusissutissanik. Aalajangersakkap atuutilerneratigut attartortitsisup illuutiminik attartortittakkanik nammineerluni allaffissornikkut aqutsisuusup illuutininik allaffissornikkut aqutsinermini niuernikkut iluanaarutissani ilanngullugit naatsorsuusiorsinnaanngilai.

Namminersornerullutik Oqartussat kommunellu allaffissornikkut aqutsisumik avataaniit atorfinitsitsisinaapput, soorlu A/S Inissiaatileqatigiiffik INI. Aallaffissornikkut aqutsisumut avataaneersumut akiliutissat attartortitsisup attartortumut allaffissornikkut aqutsinermini akiliutitut akilersissinnaavai. Aallaffissornikkut aqutsisup avataaneersup akissarsiassai attartortitsisup allaffissornikkullu aqutsisup avataaneersup akunnerminni isumaqatigiissusiornisigut aalajangersarneqassapput.

Aammattaaq aalajangersakkap atuutilerneratigut avataaniit allaffissornikkut aqutsisussamik atorfinitsitsisoqartillugu allaffissornikkut aqutsisumut akiliut allanit sullinneqarnermut akiliutitut isigineqassaaq, taamaattumillu allaffissornikkut aqutsisup avataaneersup akissarsiassai inissiaqarfittut immikkoortortani imaluunniit ingerlatsinermut aserfallatsaaliuinerullu immikkoortortani ataasiakkaani ingerlatsinermut missingersuutitut tamakkiisumik ilanngunneqassapput, tassalu iluanaarutissai ilanngullugit, soorlumi allanit sullinneqarnermut allanut aningaasartuutit taamatut pineqartat.

Tassalu inatsisitigut inissisimaneq inissiaatileqatigiiffimmik pilersitsineq pillugu Inatsisartut peqqussutaata nr. 12-ip, 28. oktober 1993-imeersup aamma inissianik attartorneq pillugu Inatsisartut peqqussutaata nr. 3-p, 13. juni 1994-imeersup nalunaarutillu taakkununga atasut atuutilermatali atuussimasoq tassuuna erseqqissarneqarpoq.

Imm. 3-5 attartortitsisup inissiaatiminik attartortittakkanik allaffissornikkut aqutsisussamik avataaneersumik atorfinitsitsisimaneranut attartortitsisullu nammineerluni allaffissornikkut aqutsineranut tunngasuvoq.

Namminersornerullutik Oqartussat kommunellu inissiaataanni attartortittakkani allaffissornermut akiliut attartortitsisup inissiaataanni attartortittakkani tamavinni, inissiap attartortittakkap Kalaallit Nunaanni sumi inissisimanagera aammalu inissiap attartukkap suunera apeqqutaatinnagu attartukkamut ataatsimut assigiimmik akeqartitsineq tunngavigalugu aalajangersarneqarpoq. Taamaattumik allaffissornikkut aqutsinermut akiliut Namminersornerullutik Oqartussat inissiaataanni attartortittakkani, ilaqutariinnut arlalinnut inissiaappata, ilaqutariinnut ataatsinut illuuppata aammalu illuuppata affarleriit, assigiippoq, tamatumani illut, najugaqatigiiffiit imaluunniit ingerlatsinermut aserfallatsaaliuinerullu immikkoortortat allaffissornikkut aqunneqarnermikkut allanit akikinnerugaluarpataluunniit.

Imm. 3-5-ip atuutilerneratigut inissianut attartortittakkanut A/S Inissiaatileqatigiiffik INI-mit allaffissornikkut aqunneqartunut allaffissornermut akiliutit naatsorsorneqartarnerinut tunngatillugu maannamut inatsisitigut inissisimaffiusimasoq allannguuteqartinneqarpoq. A/S Inissiaatileqatigiiffik INI-mi assigiimmik akeqartitsineq naapertorlugu maannamut allaffissornermut akiliutit Kalaallit Nunaanni attartorneri tamakkiisumik assigiimmik akeqartitsineq tunngavigalugu naatsorsorneqartarsimavoq. Inissianut attartortittakkanut A/S Inissiaatileqatigiiffik INI-mit allaffissornikkut aqunneqartunut allanullu siunissami allaffissornermut akiliutit attartornermi ataatsimi attartortitsisumut ataatsimut assigiimmik akeqartinneqartutut aalajangersarneqartassapput.

Kiisalu aalajangersakkat atuutilernerisigut allaffissornikkut aqutsinermut akiliutit tunngaviumik sullissinermut tunngaviumik akiliutinut aamma tapiliussatut sullissinermut tapiliussatut akiliutinut aggorneqarsinnaalissapput. Tunngaviumik akililiutit attartornermi ataatsimi attartortitsisumut ataatsimut assigiimmik akeqartinneqarlutik aalajangersarneqassapput. Tapiliussatut akiliutit najugaqatigiiffinni aamma ingerlatsinermut aserfallatsaaliuinerullu immikkoortortani attartornermut ataatsimut, attartortitsisup tapiliussatut sullissigineqartussatut toqqagaani assigiimmik akeqartinneqarlutik aalajangersarneqassapput.

Paragrafimi imm. 6 naapertorlugu Naalakkarsuisut Namminersornerullutik Oqartussat kommunellu inissiaataasa attartortittakkat allaffissornikkut aqunneqarnerat ingerlanneqarnerallu pillugit sukumiinerusunik maleruagassiorsinnaapput.

Imm. 7 naapertorlugu attartortitsisup Namminersornerullutik Oqartussat imaluunniit kommunet ilaqutariinnut arlalinnut inissiaataanni attartortut aningaasartuutitut, najugaqatigiiffimmi aserortersarnermik pinaveersaartitsinermut attuumassuteqartunut matussutissanik akiliisinniarsinnaavai.

§ 33-mut

§ 33 Inatsisartut peqqussutaanni nr. 5-imi, 31. maj 2001-imeersumi kingusinnerusukkut allannguuteqartumi § 13-imut assingusuvoq.

Ineqarnermut akiliutit aningaasartuutit naapertorlugit aalajangersarneqartut tassaapput ineqarnermut akiliutit, ineqarnermut akiliutinut missingersuutit tunngavigalugit aalajangersarneqartut, taakkunungalugu ingerlatsinermut aningaasartuutit, illuartitsinerit, aningaasaliissutinit iluanaarutissat aningaasalersuinermilu pissarsiaq naammaattunik annertussusillit pisariaqartinneqartullu ilaatinneqarput.

Imm. 2-p aamma 3-p atuutilernerisigut aningaasaliisup aningaasalersuinermit aningaasartuutini illuutillu attartortinneqartup ingerlatsinini (aningaasaliissuteqarnermi) uppersarneqarsimasut matussusertissinnaavai, aningaasaliissutaasut taarsigassarsinikkut imaluunniit nammineq aningaasaataanit aningaasalersorneqarsimanerat apeqqutaatinnagu. Tamatuma saniatigut attartortitsisoq illuutip attartortinneqartup teknikikkut aningaasaqarnikkullu nalilerneqarneranit ernianik pissarsiassaminik naatsorsuisinnaavoq. Teknikikkut aningaasaqarnikkullu naliliineq illuutip namminerpiaq nalingata niuernikkut nalinganut, sumiiffimmi pineqartumi illuutip qanoq akilersillugu tunineqarsinnaaneranut takussutissaasumut naleqqiullugu assigiinngissutaanut takussutissaavoq.

Aningaasalersugaq (illu) avataanit taarsigassarsianik illuliornermi taarsigassarsinikkut aningaasalersorneqarpat, aningaasalersuinermit aningaasartuutit tassaassapput ukiumoortumik erniaritinneqartut. Aningaasaliisup aningaasalersuineq aningaasaatini nammineq atorlugit aningaasalersorpagu, aningaasaliisoq ernianik pissarsiassaminik naatsorsuisinnaavoq, taakkulu aningaasalersugaasumi aningaasaliisumut aningaasartuutit annertoqatigissavaat.

Aningaasalersuinermit aningaasartuutit naatsorsugaq pissarsissutissamut erniap annaaneqarsinnaaneranut assinganik nalorninartumut akileraarutit peereerlugit allamut assersuunneqarsinnaavoq. Erniatulli naatsorsorneqartoq obligationinut ernianit sivisuumik erniaritinneqartartunit annerusartussaavoq,

pissutigalugu inissiap sivisunerusumik atasussaanera,

pissutigalugu aningaasalersorneqartoq aningaasat ileqqaakkat atorlugit aningaasalersorneqarmat, tassalu nammineq aningaasaatit, taarsigassarsilluni aningaasaatinit qaffasinnerusumik ernialersorneqartunik, aamma

pissutigalugu inissianut aningaasaliisarneq nalorninartoqartarmat.

Aningaasalersuinermit aningaasartuutit 10%-imut naatsorsorneqarsimasut soorlu makkuninnga imaqarsinnaavoq:

1. Obligationit naalagaaffimmit pisiat sivisuumik atuuttussat erniaat nalorninartoqanngitsut (5%).
2. Aningaasaliissuteqarnermi sivisuumik piffissaligaanerannit pissarsiat (2%).
3. Piginnittup nalinginnaasumik annaasaqaratarsinnaaneranut pissarsiaritat, aningaasanik atoriaannaarnik amigaateqarneq aningaasanillu pissarsiniarnermi aningaasartuutit (2%).
4. Nalikilliliinerit naatsorsukkat (1%).

Illu 85 m²-nik angissusilik 1.160.259 kr.-inik (13.650 kr./m²) akilerlugu sananeqarpat pisiarineqarpalluunniit, aningaasaliisullu niuernerq nammineerluni aningaasalersorpagu, aningaasaliisup aningaasaliinermut aningaasartuutai naatsorsorneqartut 10%-iusimappata ukiumut aningaasalersuinerit aningaasartuutit 116.025 kr.-inik naleqassapput.

Taakku saniatigut ukiumoortumik aningaasartuutit illuartitsinerillu soorlu 29.133,75 kr.-it (342,75 kr./m²) ilanngunneqassapput. Kiisalu aningaasaliisooq illuutit teknikikkut aningaasaqarnikkullu nalinganut ernianik, diskontop affaanik annertussuseqartumik akiliisitsiniarsinnaavoq, tassalu diskonto 4,75%-iuppat taanna 27.666,94 kr.-inik ((1.160.250 * 4,75 %) / 2) naleqassaaq.

Ukiumut ataatsimut aningaasartuutit katillugit: 116.025,00 + 29.133,75 + 27.555,94 = 172.714,69 kr., taakkulu qaammammut ineqarnermut akiliummut 14.392,89 kr.-inik (172.714,69 / 12) naleqarput. Aningaasaliisup aningaasalersuinerit aningaasartuutigisai naatsorsukkat affaappata, tassalu 5%-it, qaammammut ineqarnermut akiliut 9.558,52 kr.-iussaaq.

Attartortitsisoq imm. 5 naapertorlugu akit akigitallu qaffannerisa imaluunniit illuummi attartortinnetartumit pitsanngorsaanerup kingunerisaanik ineqarnermut akiliut iluarsiivigisinnaavaa. Ineqarnermut akiliutinik qaffaanissaq allakkatigut illuummi attartortunut tamanut ataatsikkoortumik aammalu qaammatit pingasut sioqqullugit siumoortumik nalunaarutigineqarsimassaaq. Ineqarnermut akiliutit pillugit siumoortumik nalunaarutit, qaffaanissamut pequtaasunut qaffatissallu annertussusaanut paasissutissanik imaqqanngitsut atuuttussaatinneqarsinnaanngillat.

§ 34-mut

Aalajangersagaq Inatsisartut peqqussutaanni nr. 5-imi, 31. maj 2001-imeersumi kingusinnerusukkat allannguuteqartumi § 14-imut assingusuvoq.

Imm. 1 attartortitsisup ineqarnermut akiliummik qaffaanissamik siumoortumik nalunaarutaanut, attartortup akuerisinnaanngisaanut attartortup akerliliinissaanut periarfissiivoq. Attartortoq ineqarnermut akiliutit qaffanneqarnissaanik siumut nalunaarummik tigusinerup kingorna sapaatit akunnerisa marluk iluanni tunngavilersukkamik allaganngorlugu qaffaaniarnermut akerliliissummik saqqummiussissaaq. Attartortitsisup ineqarnermut akiliummik qaffaanissaminik piimasaqarnini aalajangiusimaannaruniuk suliaq sapaatit akunneri arfinillit

qaangiutsinnagit eqqartuussivinnut suliakkiissutigissavaa, ineqarnermut akiliutip aalajangiusimaannarnissaa piumasaqaatigalugu.

Eqqartuussivimmuut suliakkiineq atuuttussanngortitsivinnermik kinguneqassanngilaq, tak. imm. 2, kisiannili tamatuma kingorna ineqarnermut akiliut eqqartuussiviup aalajangiinera naapertorlugu iluarsiivigineqassaaq, aammalu ineqarnermut akiliisitsisoqarpallaarsimappat kingumoortumik atuuttussanngortinneqassalluni.

Imm. 3-mi aalajangerneqarpoq, ineqarnermut akiliisitsivallaarutiniq iluarsineq eqqartuussiviup aalajangiineraaniit kingusinnerpaamik qaammatit pingasut qaangiunnerini pisimangippat, attartortup kingusinaarluni akiliinermi il.il. ernialersuisarnej pillugu inatsimmi maleruagassat malillugit ineqarnermut akiliivallaarutit ernialerneqarnissaat piumasarisinnaagaa.

§ 35-mut

§ 35 Inatsisartut peqqussutaanni nr. 5-imi, 31. maj 2001-imeersumi kingusinnerusukkut allannguuteqartumi § 15-imut assingusuvoq.

Inissiami inimik attartornermut akiliutip annerpaaffissaa inissiami init amerlassusaannut naleqqiullugu naatsorsorneqassaaq. Aalajangersagaq taamaallaat ininut najugassianut, Kalaallit Nunaanni illuutit pillugit maleruagassani 1982-imeersuni, ininut minnerpaamik 12,5 m³-nut, sikaaviit aalaakkaasut inimiittut inimilu tassaniittussat ilanngullugit minnerpaamik 6 m²-nik nateqartunut ilassutitaqartinneqartuni nassuiarneqartunut tunngasuvoq. Illuni quleriinni init qilaamut portussusaat minnerpaamik 230 cm-iussapput, aammalu init ilaqutariinnut ataatsinut illuniittut, illuni sanileriinniittut, illuni uiguleriinniittut assigisaanniittulluunniit 210 cm-iussallutik.

Imm. 2-p atuutilerneratigut inini attartortitsisup nammineq najugaata ilaanniittuni attartornermut akiliutit qaffanneqarnissaat qaammammik ataatsimut sioqqutsisumik ilisimatitsissuteqareernikkut pisassapput. Ininut allanut, tassalu ininut attartortitsisup nammineq inissiatut najugarinngisaaniittunut tunngatillugu qaammatinik pingasunik sioqqutsisumik ilisimatitsisoqartassaaq. Siumoortumik nalunaarutit allaganngorlugit tunniunneqartut atuuttussaatinneqassapput.

§ 36-mut

Aalajangersakkap atuutilerneratigut §§ 30-35-mi atorunnaarsitsinissamut maleruagassat attartortumut illersuutitut sunniuteqarput.

§ 37-mut

Aalajangersakkap atuutilerneratigut inissianik allaffissornikkut aqutsisoq taarsigassarsinermut uppersaatinut suliarinerinut sullissinermut

akileeqquisinnaavoq, kiisalu qaammatikkaartumik akilersukkat akilersinniarneqarnerinut qaammammoortumik akiliuteqartitsinnaalluni. Kiisalu allaffissornikkut aqutsisoq aamma akiliinngitsoornermi nukingisaaruteqarnermut sullisinermut akiliisitsinnaavoq.

Aalajangersakkami siunertaavoq allaffissornikkut aqutsinerup sapinngisamik ersarinnerpaamik ingerlanneqarnissaa. Tamatuma ilaatigut kingunerisaanik attartortut akiliutit pillugit apeqquteqartut taakkuttaaq namminneerlutik akilertalissavaat.

Taamaattorli tamanna inunnut, ukiumut isertitat akileraaruteqaataasussat piffissami pineqartumi naatsorsorneqartut ineqarnermut tapiiffiqineqarnissamut killissarititaasut inorlugit amerlassuseqarpata atuutissanngilaq. Inissarsiortoq sullisinermut akiligassamik taassuminnga akiliisannginnissamik kissaateqartoq inoqutigiit ukiumut isertitassaattut naatsorsuutiqineqartut killissarititaasut inorlugit amerlassuseqarnerat uppersarsassavaa, soorlu qaammatini pingasuni akissarsiat allagartaannik, piffissamut naatsorsuutaagallartunik, ingerlatsivimmiit uppersarsaammik imaluunniit nalunaarummik allamilluunniit akuerisaasumik takutitsinikkut.

Attartortup akiliummik akiliinngitsoortinneqarsinnaaneranut aalajangiinermi, attartortup ukiumi pineqartumi isertitarisimasai malillugit ineqarnermut tapiiffiqineqarnissamut killiliussat atorneqassapput, attartortup ukiumi kingullermi isertitarisai pinnagit. Tamatumunnga peqqutaavoq attartortup piffissami pineqartumi isertitaasa annertussusaat ineqartup akiliinngitsoorneqarsinnaaneranut tunngavissatut pingaarnerusariaqarnerat.

Namminersornerullutik Oqartussat aningaasatigut killissarititaasut, nammineerluni akilertagassat aammalu ineqarnermut tapiissutinut minnerpaaffissat annerpaaffissallu pillugit Nalunaarutaat nr. 34, 13. september 2001-meersoq naapertorlugu aningaasatigut killissarititaasut massakkorpiaq imatut isikkoqarput:

Kr. 180.000-it inoqutigiinnut meerartaqanngitsunut.

Kr. 372.000-it inoqutigiinnut ataatsimik meerartalinnut.

Kr. 396.000-it inoqutigiinnut marlunnik meerartalinnut.

Kr. 408.000-it inoqutigiinnut pingasunik meerartalinnut.

Kr. 416.000-it inoqutigiinnut sisamanik meerartalinnut.

Kr. 428.000-it inoqutigiinnut tallimanut meerartalinnut.

Kr. 444.000-it inoqutigiinnut arfinilinnik amerlanerusunilluunniit meerartalinnut.

Suliassaqarfiup nutaanik nalunaarusiorfigineqartarnera malittaralugu aningaasatigut killiliussat allanngortikkiartuarneqassapput.

Attartortoq aningaasaqarnini pillugu eqqunngitsunik paasissutissiippat, taamaalillunilu sullisinermut akilersuinerminut akiliuteqartinneqartannginneq angusimappagu, tamanna qularnaveeqqusiinissamut taarsigassarsianik sumiginnaanertut isigineqassaaq, qularnaveeqqutissatullu akiligassaq erninnaartumik akiligassanngortinneqassalluni.

Attartortup attartukkaminik qimatsineranut atatillugu attartortitsisup qularnaveequsiissut immikkullu qularnaveequsiissut, tak. § 50, imm. 5, attartortumut piumasaqaatinut matusissutissatut atorsinnaavai. Qularnaveequsiissut immikkullu qularnaveequsiissut attartortup attartugaanut atatillugu attartortitsisup piumasarisinnaasaanut tamanut matussutissanut atorneqarsinnaavoq.

§ 38-mut

Aalajangersakkami attartortup ineqarnermut akiliutinik attartornermilu akiligassanik allanik piffissaq attartornermut isumaqatigiissummi aalajangerneqartoq eqqorlugu akiliiffissamut attartortitsisup innersuussinissamut pisussaaffigisaanut, kiisalu akileeriaaseq attartortitsisup toqqarsimasaa atorlugu akiliinissamut pisussaaffeqarnera aalajangersarneqarpoq. Attartortitsisoq akiliiffissamik innersuussisimangippat, ineqarnermut akiliut attartortitsisup niuerfianut akilerneqassaaq.

§ 39-mut

Aalajangersakkakkut attartortup attartornerup taamaatineqarnera imaluunniit piffissamut aalajangersimasumut killiligaanera pequtigalugu atorunnaarnissaata tungaanut ineqarnermut akiliinissamik pisussaaffeqarnera erseqqissarneqarpoq.

§ 40-mut

Aalajangersakkakkut inissiamik namminerisamik pigineqartumik attartortitsisup qularnaveeqummut, aallarniummut ineqarnermullu akiliutissanik ataatsimoortunik qanoq amerlatigisunik siumoortumik akileeqqusisinnaanera killilerneqarpoq.

§ 41-mut

Attartortitsisoq kiassanermik imermillu kissartumik attartortumut pilersuisuusoq, attartortitsisup attartortup kiassarnermut imermullu kissartumut atugaanut aningaasartuutimi utertitussaavai. Attartortitsisoq kiassarnermut naatsorsuutininik immikkut suliaqassaaq, tassanilu aningaasartuutinit tamakkiisunit attartortitsisup akiligassai allassimassapput, taakkulu attartortup akiliutigigallagaannut ataqatigiissinneqarsinnaassapput.

Imm. 2-p atuutilerneratigut attartortoq akilerallagassaminik qaammatikkaartumik akiligassinneqartassaaq, naak attartortup atuinera ukiumoortumik naatsorsorneqartaraluartoq. Imm. 3 naapertorlugu attartortitsisoq kiassarnermut naatsorsuusiordermini allaffissornermut akiliteqartitsisinnaavoq, aammalu imm. 4 naapertorlugu Naalakkersuisut kiassanermut naatsorsuusiorderneq, aningaasartuutit attartortunut agguarneqartarnerat, akiliisarneq aamma kiassarnermut akiliutissat iluarsiivineqartarnerat pillugit maleruagassiorsinnaapput.

§ 42-mut

Aalajangersakkami attartortitsisup kiassarnermut naatsorsuutininik saqqummiussinissaanut piffissat suut malinneqassanersut, kiisalu piffissaliussat malinneqanngippata tamatuma attartortitsisumut kingunerisinnaasai aalajangersarneqarput. Pisarneq malillugu saqqummiussineq attartortitsisup niuerfiani pisarpoq, soorlu INI-p immikkoortortaqrifiini kommunellu allaffiini. Saqqummiineq assersuutigalugu najukkami nivinngaavinnut nivinngaanikkut, imaluunniit aviisitigut nuna tamakkerlugu saqqummersartutigut imaluunniit najukkani aviisitigut sapaatit akunnikkaartumik saqqummersartutigut ilanngussinikkut pisinnaavoq.

Attartortitsisup kingusinnerpaamik juunip ulluisa 30-anni kiassarnermut naatsorsuutit saqqummiussimangippagit, attartortup naatsorsuutit inaarutaasut malillugit pisassami akilerneqarnissaasa tungaanut, Kalaallit Nunaanni aningaaserivimmi uninngasuutinut erniat sukkulluunniit qaffasinnerpaatinneqartut annertoqataannik ernialersussallugit pisinnaatitaavoq.

Taamatuttaaq aalajangersakkami attartortitsisup saniatigut akiligassat imaluunniit utertoortissat pillugit attartortumut ilisimatitsissuteqarnissaanut piffissaliussat maleruagassallu, kiisalu attartortup kiassarnermut naatsorsuutinut akerliissuteqarsinnaaneranut aammalu malittarisassat malinneqannginnerini tamatuma attartortitsisumut kingunerisassai pillugit maleruagassat aalajangersarneqarput. Piffissaliussatut allanneqartut ukiut arlallit ingerlanerini ilanngunneqartarsimapput. Danskitt attartorneq pillugu inatsisaanni maleruagassanut naleqqiullugu aalajangersakkap oqaasertaliernerisa kingunerisaannik attartortitsisoq attartortumik nalunaarummik nassiussisimappat piffissaliussat malinneqarsimassapput. Piffissaq nassiussiffiusoq piffissaliussap killissaanut apeqqutaasussatut toqqarneqarpoq, attartortup nalunaarummik tigussiffia pinnani, tamatumani allakkat Kalaallit Nunaanni ingerlaartarnerisa, pingaartumik nunaqarfinnut isorliunerusunullu, allanngorarneranni misilittakkat tunngavigineqarput.

§ 43-mut

Aalajangersakkami kiassarnermut naatsorsuutit suliarineqareernerisa saqqummiunneqareernerisalu kingorna avataaniit pilersuisunit, soorlu Nukissiorfinnit akiligassanut iluarsisutininik takkuttoqarsinnaanera iluarsivigineqarpoq. Taakku tassaasinnaapput utertoortit imaluunniit akilikkat saniatigut akiligassat. Naatsorsuutiginnisamik akilikkanut iluarsisutissanik takkuttoqartillugu, aningaasartuutissat ukiumut kiassarnermut naatsorsuuteqarfiusumut tullermut nuunneqarsinnaapput.

Tamatumani soorlu qaammatit pingasukkaarlugit akiligassanik kukkusumik piffissaliinerinnaap peqqutaannginnissaa, kisiannili akiligassanut iluarsisutissat naatsorsuutiginnisat siumullu ilisimariinngisat pineqarnissaat piumasarineqarpoq.

Aalajangersakkamissaaq attartortut akeryliliissuteqarsinnaaneranut piffissaq naareersoq aningaasartuutit attartortut akornanni kukkusumik agguarneqarsimasut paasineqarpat, iluarsiiisutissat qanoq attartortut akornanni iluarsineqassanersut aalajangersarneqarpoq.

§ 44-mut

Aalajangersakkami kikkut attartortunut ataasiakkaanut imermut akiligassiisassanersut aalajangersarneqarpoq. Tassani imeq pilersuisutut ingerlatseqatigiiffimmiit toqqaannartumik tunniunneqartarnersoq imaluunniit attartortitsisoq attartortumut imermik pilersuisuunersoq immikkoortinneqarput.

Pilersuisutut ingerlatseqatigiiffik attartortumut imermik pilersuisuuppat, tamanna pilersuisutut ingerlatseqatigiiffiup pilersuineranut piunasaqatai nalinginnaasut naapertorlugu ingerlanneqassaaq.

Attartortitsisoq attartortumut imermik pilersuisuuppat, attartortitsisup aningaasartuutini attartortumit utertittussavi. Illuummi inissiat immikkut imermik uuttuusersugaanersut uuttuusersugaannginnersulluunniit tassani immikkoortinneqarput. Taakkunani marluusuni attartortup uterterlugit akilersitassai suunersut iluarsiivigineqarpoq.

Naalackersuisut atuaasarneq imermullu atukkamut akiliisitsiniartarneq, kiisalu imermut naatsorsuusiortarneq pillugu sukumiisunik maleruagassiorsinnaapput.

§ 45-mut

Aalajangersakkap atuutilerneratigut inissianik attartortittakkanik pigisaqartup inissiatini isumannaatsumik aserfallatsaaliorneqarnissaat pisussaaffigaa. Piginnittoq aserfallatsaaliugassanik aalajangersimasunik piffissani aalajangersimasuni suliaqarnissamik pisussaaffilerneqanngilaq, kisianni piginnittoq pisussaavoq illup attartukkallu pissusia eqqarsaatigalugu pisariaqartitsiviusuni nutarterissalluni iluarsaassissallunilu. Tamanna qanoq akulikitsigisumik pisassanersoq piginnittup pisunut aalajangersimasunut naliliinera tunngavigineqartassaaq.

Taamaattumik attartortup inissiamik tigusinerminut atatillugu piunasarinnavaa inissiaq isumannaatsumik aserfallatsaaliorneqarsimassasoq aammalu nalinginnaasumik iluarsaanneqassalluni, kiisalu atortulersuutit pitsaasuussasut atorsinnaassallutillu. Attartortup inissiamut iserternerminut atatillugu attartortoq immikkut ittumik aserfallatsaaliugassanik suliaqarnissamut piunasarinnaanngilaa.

Attartortup inissiaq nalinginnaasumik aserfallatsaaliugaq tiguguniuk, attartornermi nalaani inissiap iluani aserfallatsaaliuinnissaq akisussaaffigaa aningaasartuutinullu akiliisartussaalluni, tassanilu pineqarput qilaat qalipallugit qaqorsarnissaat, iikkat qalipanneqartarnerat aamma / imaluunniit ungalitserorneqarnissaat kiisalu natit lakkerneqartarnerat. Attartortup attartornermi nalaani inissiami aserfallatsaaliugassat

pisussaaffigaa, taakkulu akulikitsigisumik pisassapput, taamaaliornikkut nalinginnaasumik nungullarnerit pisoqalisullu saniatigut inissiaq ajorseriartinnaveersaarneqassalluni.

§ 46-mut

Aalajangersakkap atuutilerneratigut § 45-mi Namminersornerullutik Oqartussat kommunellu inissiaataanni aserfallatsaaliuinissamut maleruagassat inissiani namminerisamik pigisani attartortitsinermit atorneqalissapput. Taamaattorli illuatungeriit isumaqatigiissuteqarnermikkut tamanna sanioqqussinnaavaat.

§ 47-mut

Aalajangersakkap atuutilerneratigut attartortitsisup attartorneqartoq piffissamit attartornissap aallartiffissaaniit pitsaasumik illersorsinnaasumillu pitsaassuseqartillugu attartortumut atugassanngortissavaa. Tassa attartortup iserternerani iikkat, qilaat naqqillu nalinginnaasumik iluarsaanneqarsimassapput, inissiaq eqqiarneqarsimassaaq, igalaavi, sikaaviit matui aamma matut ilivitsuussapput, taamatullu matut atorsinnaasunik paarnaarsaateqassallutik.

Aalajangersakkami erseqqissarneqarpoq inissiamut iserternissamut atatillugu attartugassamik takuniaasoqassasoq inissiamullu iserternermut nalunaarusiortoqassalluni. Attartortoq nalunaarummut oqaaseqaatissaqaruni, inissiamut iserternerminiit sapaatit akunneri marluk qaangiutsinnagit tamanna nalunaarutigissavaa, tamatumani ajoqutit amigaatillu ersinngitsut pineqanngippata.

Iserternissamut takuniaasoqarsimanngippat attartortup iserterneraniit ullut 14-it qaangiutsinnagit attartortumit uparuarneqarsimasut pillugit attartortitsisup attartortoq amigaatinik iluarseeqqusinnaanngilaa.

§ 48-mut

Aalajangersakkami attartortup attartukkaminik isumannaatsumik atuisussaanera, taamatullu attartortup attartukkamik atuinerninik allanut tunniussisussaanninnera imaluunniit attartortitsisoq akuersiteqqaarnagu attartukkap inissiatut atornagu siunertanut allanut atorneqarsinnaannginnera aalajangersarneqarpoq.

Attartortup attartugaq isumannaatsumik paarijuartussaavaa. Tassani attartukkami aserortut, attartortitsisup pitsaasumik isumannaatsumillu pitsaassuseqartinnissaannik akisussaaffigisaat aamma attartukkami attartortup aserfallatsaalissallugit akisussaaffigisaat immikkoortinneqarput. Attartortitsisup akisussaaffigisaani peratarsinnaasumik aserortoqarpat, attartortup attartortitsisoq tamanna pillugu ilimatissavaa, taamaalilluni attartortitsisup ajoquserneq iluarsissallugu periarfissinneqassalluni.

Attartortup attartukkani isumaqatigiissutaasumit allaanerusumut atorsinnaangilaa. Tassalu inissiamiit inuussutissarsiutinik ingerlatseqqusaanngilaq, tamatumani nammineq inuttut sullissineq, nerisassiuussineq, nerisassanik kissartunik assartuineq, nujaleringeq, ulluunerani meeqqanik paarsineq, immiaaqqanik, viinninik, imigassanik aalakoornatulinnik ikiaroomartunilluunniit nioqquteqarneq pineqaraluarpalluunniit. Inuussutissarsiutit taagorneqartut nassaqartussaapput sullitat aqqusaartuilernerannik imaluunniit attartorneqartumik pissusissamisuumngitsumik nungullartitsiartornermik kinguneqartartut.

Taamatuttaaq aalajangersakkap atuutilerneratigut attartortoq attartugaq qimavillugu anisimappat, attartortup tunngavissaqanngitsumik kinguartiterinani tamanna pillugu attartortitsisumut nalunaaruteqassaaq. Attartortitsisumut nalunaaruteqannginneq attartortitsisup attartukkamut atorunnaarsitsineranik kinguneqarsinnaavoq.

§ 49-mut

Aalajangersakkap atuutilerneratigut attartortoq pisussaavoq aalajangersakkami taaneqartunik pisoqartillugu attartortitsisoq inissiamut isernissaanut akuerissallugu. Attartortitsisup attartortoq suliassanik aallartitsinissaq siumoortumik nalunaarfigisussaavaa, tamatumani suliassat kinguartinneqarsinnaanngitsut, soorlu imermik innarlikkanik, atortulersuutit ajoquserlutik, ikuallannernik allanillu illuummut najugaqartunullu ulorianartorsiortitsisinnaasunik iluarsaassinissaq pineqartinnagu. Iluarsaassinerit sapinngisamik attartortumut najugaqartunullu allanut annikinnerpaamik ajoqutaasumik suliarineqassapput, tunngavissaqanngitsumillu kinguartiterneqaratik naammassineqassallutik.

§ 50-imut

Aalajangersakkami erseqqissarneqarpoq attartortup taassumalu inoqutaasa kiisalu inuit attartortumit attartorneqartumut isersinnaatitaasut illumi torersaarnissamut maleruagassat maleruassagaat. Attartortup ajoqusikkat inuit taagorneqartut attartukkami ajoqusersimasinnaasaat akisussaaffigai.

Immikkoortortami siulersuisut torersaarnissamut maleruagassanut ilassutaasunik aalajangersaasinnaapput. Taakku tassaasinnaapput inissiap iluani atisanik panerseeqqusaannginneq, sapaatikkut sakkunik atueqqusaannginneq imaluunniit raadiunut fjernsyninullu antenninik illuummut ikkuseqqusaannginneq.

Aallaaviatigut Namminersornerullutik Oqartussat kommunellu inissiaataanni attartortittakkani qimmeqarnissaq qitsuuteqarnissarlu inerteqqutaavoq. Attartortoq peqqussutip matuma atuutilernerani maleruagassanik unioqqutitsinani inissiami attartortittakkami qimmeqartoq qitsuuteqartorluunniit uumasuutip toqunissaata tungaanut imaluunniit attartortup arlaannik peqquteqarluni uumasuutaarunnissaata tungaanut qimmeqarsinnaavoq qitsuuteqarsinnaallunilu.

Taamaattorli ilaqutariinnut ataatsinut illuni illunilu affarleriinni attartortup attartortitsisumut allakkatigut qimmiuteqarnissaq qitsuuteqarnissarlu qinnutigisinnaavaa. Qimmeqarnissamut qitsuuteqarnissamulluunniit akuersissuteqarnermi attartortitsisup qaammagini pingasuni ineqarnermut akiliutip annertoqataanik immikkut sillimanissamut akiliuteqarnissaq piumasarisinnaavaa. Uumasuutip toqunerani imaluunniit attartortoq arlaannik peqquteqarluni uumasuuteqarunnaarpat, attartortitsisoq illuut attartugarlu takuniarlugit attartortup sillimasiissutaanik tigumminiinnarnissamut piumasaqaatit atuukkunnaarsimanersut, aammalu aningaasat utertinneqassanersut aalajangersinnaavoq.

§ 51-imut

Aalajangersakkap atuutilerneratigut attartortoq attartortitsisumut allakkatigut akuersissummik piniaqqaarluni attartukkamini atortulersuutininik assigiinnigitsunik atortulersuutininut taamaattunut ikkuffissanik piareersimasoqareertinnagu ikkussuisinnaavoq, taakkulu tassaasinnaapput errorsiviit, panersiiviit erruiviilluunniit maskiinat.

Attartortitsisoq attartukkat ilusilersugaanera atortuisalu, soorlu innaallagissamut kuuffinnullu tunngatillugu, pisinnaasai atortulersuutininut naammangitsut isumaqaruni attartortup kissaataanut akerliusinnaavoq.

Pisuni tamani attartortoq ikkussuilinginnermini attartortitsisumut akuersissummik piniaqqaartassaaq.

§ 52-imut

Aalajangersakkap atuutilerneratigut attartortut ataasiakkaat imaluunniit najugaqatigiiffik ataatsimoorluni attartortitsisumut akuersissummik piniareernikkut attartortitsisup innersuussinera malillugu illuummi radiomut fjernsynimulluunniit antenniliisinnaatitaapput bredbåndimilluunniit ikkussisinnaatitaapput imaluunniit radiomut fjernsynimulluunniit kabelinut attaviliisinnaatitaallutik.

Taamaattorli attartortitsisup ikkussugassaq pineqartoq attartortunut allanut illuummulluunniit ajoqutaasoq uppersarsinnaappagu tamanna atuutissanngilaq, taamatullu attartortup kissaatigisaa attartortitsisup ataatsimoorussamik kabelinut antenneqarfinnulluunniit imaluunniit attartortut ataatsimoortumik atugassatut ikkussimasaat aqqutigalugu naammassineqarsinnaappat pisinnaatitaaffik taanna atuutissanngilaq.

Aalajangersakkap atuutilerneratigut attartortut pisussaapput ikkussuinissaq sioqqullugu attartortitsisup allakkatigut akuersissutaanik piniassallutik. Attartortitsisoq ikkussukkap peerneqarnerata kingorna illuutip iluarsateqqinnissaanut sillimasiissutissamik attartortut qularnaveequsiissuteqarnissaannik piumasaqarsinnaavoq.

Attartortut akuersissutinik tuniniaasartunut isumaqatigiissutaat attartortitsisumit susassarineqanngillat, tassalu najugaqatigiiffimmi attartortut, soorlu fjernsynikkut aallakaatitanik qaammataasakkut tiguisarnissamik kissaateqartut tamatumunnga namminneerlutik akiliisassapput.

§ 53-imut

Aalajangersakkap atuutilerneratigut attartortoq immikkut atortunik ikiorsiissutinik pisariaqartitsisoq attartortitsisoq tamanna pillugu allakkatigut akuersiteqqaarluni ikkussuisinnaatitaavoq. Ikkussukkat tassaasinnaapput kalerrisaarutit, attartukkami allangortiterinerit imaluunniit immikkut ittumik ilusilersuinerit, soorlu uffartarfimmi igaffimmilu, illup isaariaani majuartarfinnilu majorallaffiliat.

Aalajangersakkattaaq atuutilerneratigut attartukkamit nuunnermut atatillugu attartortitsisoq attartukkap iluarsaateqqinnissaanik piumasaqarsinnaavoq, taassuma ataani iluarsaaseqqinnissamut aningaasartuutitut akiliutissanik kommunalbestyrelsep qularnaveeqqusiinissaa.

§ 54-imut

Aalajangersakkap atuutilerneratigut attartortoq atortut attartortup attartukkamut ikkussuussimasai peqqutaallutik ajoqusikkanut taarsiinissamut akisussaavoq. Attartortitsisup atortunik ikkussuinerminut atatillugu taarseeqqusisoqassagaluarpat piumasaqaatip naammassinnaanut atugassanik sillimmasiissuteqarnissaa piumasarinnaavaa. Qularnaveeqqusiissutissaq attartortitsisup § 52 naapertorlugu antennilersuinerup kingorna iluarsaaseqqinnissamut sillimmatissanik qularnaveeqqusiinissamut piumasaqarsinnaaneranut aamma attartortitsisup § 53 naapertorlugu kommunalbestyrelsep qulanaveeqqusiinissaanik piumasaqarsinnaaneranut atasutut isigineqassaaq.

§ 55-imut

Aalajangersakkap atuutilerneratigut attartortoq attartortitsisumit siumut allaganngorlugu akuersissummik piniaqqaarluni inissiami silataanilu pitsannorsaasinnaatitaavoq. Pitsannorsaait tassaasinnaapput atortut nukissamik sipaarfiusut, atortut imermik sipaarfiusut, nuussineq, iikkanik talulersuutinik piiaaqeq ikkussuinerlu, eqqiluisaarnermut atortulersuutit immikkut ittut il.il. Pitsannorsaait inissiap inissarsiortunit assigiinngitsunit tamavinnit atorsinnaaneramik piiassanngillat.

Pitsannorsaait attartortitsisumut immikkut ingerlatsinerit aserfallatsaaliinermullu aningaasartuutinik kinguneqassappata, ineqarnermut akiliutit amerlaqataannik qaffanneqassapput. Aammattaaq attartortoq inissiap silataani suliaannik, attartukkap nalinganut qaffatsitsisunik, soorlu quinik, aneerasaartarfinnik assigisaannillu suliaqarnissamut allakkatigut akuersissummik piniarsinnaavoq. Allanguineq

takuneqarsinnaasutut pitsannguinerussaaq, tassa attartulersinnaasut amerlanersaasa pitsannguutitut isumaqarfigisinnaassavaat, attartortup pineqartup kisimi pinnani.

Attartortup pitsanngorsaataasoq attartortitsisoq akuersiteqqaarnagu suliarisimappagu, pissutsit eqqarsaatigalugit pitsanngorsaaneq attartukkamut mianersugaalliortumik ilionertut isigineqarsinnaavoq, attartortorlu tamatumunnga taarsiinissamut akisussaatinneqassaaq.

Attartortup inissiamiit nuunnerminut atatillugu pitsanngorsaaneq aningaasartuutit akilikkani uppersarneqarsimasut ajunngitsorsiatut taarsertissallugit pisinnaatitaaffeqarpoq. Ajunngitsorsiasatq maleruagassat Naalakkersuisunit aalajangersarneqartut malillugit naatsorsorneqassaaq. Taamaattorli atortulersuutit nukissamik atuineruffiusut imaluunniit inuulluataarniutaaneri ersarissut ajunngitsorsissutaasinnaanngillat.

§ 56-imut

Aalajangersakkap atuutilerneratigut attartortitsisup attartortumut akileqqusani, soorlu inissiamit aninermi akiligassat, ineqarnermut akiligassat akilinngitsuukkat, kiassarnermut iluarsisutit il.il. attartortitsisup attartortumut ajunngitsorsiasanik akiliineranut atatillugu iluarsivigitissinnaavai. Ajunngitsorsiasat attartortup pitsanngorsaaneqarpoq qaammatinut 100-nut amerlaqatigiinnik aningaasartalerlugit nalikilluartuartinneqassapput.

Ajunngitsorsiasat attartortup attartortitsisumit pisassarisai attartortup pitsanngorsaaneqarpoq qaammatinut 100-nut amerlaqatigiinnik aningaasartalerlugit nalikilluartuartinneqassapput. Kinguliani assersuutigineqartumi taarsiissutissat qanoq naatsorsorneqarsinnaanersut takutinneqarpoq:

Attartortoq inissiami najukkamini kr. 20.000-it nalinginut pitsanngorsaavoq.

Attartortoq pitsanngorsaaneqarpoq naammassineraniit qaammatit 30-it qaangiuttut inissiamit najukkaminiit nuuppoq.

Attartortitsisup attartortumut ajunngitsorsiaritassai qaammammut 20.000 / qaammatit 100-t = kr. 200-nik amerlassuseqarput. Ajunngitsorsiasat pitsanngorsaaneqarpoq naammassineraniit qaammatit, attartortup qaammatinut 100-uusunit inissiami najugaqarfiginngisai kisiisa tunngavigalugit akilerneqartussaapput.

Attartortoq qaammatit 30-t qaangiunnerini nuuppat, attartortoq qaammatinut 70-inut, attartortup inissiami najugaqarfiginngisaaq ajunngitsorsitinneqassaaq, taamaallunilu attartortup inissiami pitsannguina iluaqutiginngitsuussallugu.

Taamaattumik attartortoq qaammatit 70-it a kr. 200 = kr. 14.000-inik ajunngitsorsitinneqassaaq.

Attartortup nutaap inissiamik attartulernermini attartukkap anisup pitsanngorsagai tigussavai, tamatumunngalu atatillugu piffissami tigusiviusumi pitsanngorsakkap nalinganut akiliisalissalluni. Tamanna ineqarnermut akiliutip qaffanneratigut pitsanngorsaanerup nalingata sinnera illuatungilerneqassaaq. Attartornermut qaffaataasooq piffissap nalikilliarortitsiviusup qaammatinik 100-nik sivisussuseqartup naanerani unitsinneqassaaq. Attartortut pingajuat, qaammatit 100-t taakku iluanni pitsanngorsakkanik tigusisoq siornatigut attartortuusimasutut aamma pineqassaaq.

Attartortup pitsanngorsaaneramik suliaqartup tamatumunnga atatillugu aningaasartuutit tamaasa akilissavai. Attartortoq taanna piffissap nalikilliaruaartitsiviusup qaammatinik 100-nik sivisussuseqartup iluani attartukkamiit nuuppat, attartortitsisup aningaasat nalikilliliissutaasut attartortumut ajunngitsorsiaritissanngilai. Attartortut tulliuuttut attartortitsisup pitsanngorsaanerumut aningaasanik utertitsinerminut atatillugu akilerallarsimasinnaasai kisiisa matussusissavaat.

§ 57-imut

Aalajangersakkap atuutilerneratigut Naalakkersuisut attartortup pitsanngorsaaviginnaasai suliarisinnaasaalu allat, aammalu taakku angissusissaat, naatsorsorneqarnissaat ajunngitsorsiassanillu akilerneqartarnissaat pillugu sukumiinerusunik maleruagassiusallutik pisinnaatinneqarput.

Kiisalu attartortitsisup qinnuteqaatinik suliarinninnerminut sullissinerumut akiliuteqartoqarnissaanik piunasaqarsinnaanera periarfissinneqarpoq, tak. §§ 51 aamma 55. Sullissinerumut akiliutissaq attartortitsisup qinnuteqaammik suliarinninneranut aningaasartuutitut matusissutigineqassaaq, taannalu qinnuteqartup immikkut sullinneqarnissamut akiliisarnissaanut ersiutaavoq.

§ 58-imut

Aalajangersakkami imm. 1-ip atuutilerneratigut attartortup attartornermut isumaqatigiissut maleruarsimaguniuk, attartortoq inigisaminik qimatsisimagallarnernermini inigisaminik qaammatit aqqaneq-marluk tikillugit allamut attartortitsigallarnissamut pisinnaatitaavoq. Attartortoq qaammatinit pingasunit sivikinnerusumik attartukkaminik allamut attartortitsigallarsinnaanngilaq, tamatumunngalu pissutaavoq attartukkamik allamut attartortitsigallarnissamut isumaqatigiissutip suliarineqarnissaa allaffissornertaqarmat. Taassuma saniatigut allamik killiliisoqarpoq, tassalu attartortup inissiaq attartukkani ukiut tallimat ingerlanerini katillugit qaammatini aqqaneq-marlunni taamaallaat allamut attartortikkallarsinnaavaa. Tamatumuunakkut akornuserniarneqarpoq aattartortup inissiaq attartukkani ingerlaannartumik allamut attartortitsigallartarnissaa, annertunerusumik nammineq tassunga atassuteqarani. Qaammatit pingasut aqqaneq-marlullu akornanni attartukkamik allamut attartortitsigallarsinnaanerumut pisinnaatitaaffik nutaajuvoq. Aalajangersagaq attartortup

qilersorsimannginnerulernissaa anguniarlugu ilanngunneqarpoq, soorlu assersuutigalugu piffissami aalajangersimasumi aaparilikkami misiliilluni najugaqateqarsinnaalersillugu, tamatumalu saniatigut piffissap naanerani attartortoq inissiamut nammineq attartukkaminut uteqqinnissani kissaatigiguniuk uteqqinnissamut pisinnaatitaaffia pigiinnarneqassaaq.

Siuliani piffissamut killiliussat apeqqutaatinnagit attartortup attartornermut isumaqatigiisummik malinnissimasup qaammatit aqqaneq-marluk sinnerlugu peqannginnissani pissutigalugu inissiaq najukkani allamut attartortikkallarniarlugu qinnuteqarsinnaavoq. Taamaattorli attartortitsisoq attartukkamik allamut attartortitsigallarniarnermut akerliliisinnaavoq, inissiami najugaqartussat amerlassusaat inissiap angissusaanut naapertuutinnippata. Aamma attartortitsisoq attartukkamik allamut attartortitsigallarniarnermut akerliusinnaavoq tunngavissaqarluartumik tamatumunnga pissutissaqaruni, soorlu inissiaq inummut ataatsimut amerlanerusunulluunniit, siusinnerusukkut attartortitsisumut attartornermut isumaqatigiisummik sumiginnaasimasunut, aammalu tamatumunnga atatillugu attartortitsisup annaasaanut taarsiisimannigitsunut attartortikkallarniarneqarpat.

Peqanngikkallarnissaq qaammatit aqqaneq-marluk sinnerlugit sivissuseqartussaansoq naliliinermi nalinginnaasumik attartukkamik allamut attartortitsigallarnissaq akuerineqarsinnaavoq piffissami aalajangikkami pineqaatissinneqarluni pinerluuteqarsimasunik inissiisarfimmiittussanngornermi, illoqarfimmi allami nunamiluunniit allami nappaatip katsorsarneqarnerani, suliffimmiit nuutsinneqarallarnermi allamulluunniit suliarortineqarnermi, tamanna attartortup nammineerluni piumasarisimagaluarpagu, imaluunniit qanorluunniit ilinniagaqarnermik pissuteqarsimagaluarpat.

Attartortoq attartukkamik attartortinneqarallartumiit attartortup nammineerluni inissiamut aningaasartuutaanit tamakkisunit inissiamik pequsersukkamik attartortitsigallarnermut annikitsunik akiliuteqartitsinermik ilaqartinneqartunit annerusumik akiliiffigineqassanngilaq. Attartortup aningaasannanniutigalugu inissiamik attartukkaminik allamut attartortitsigallarsinnaanissaa pinaveersaartinniarlugu aalajangersagaq ilanngunneqarpoq.

Aalajangersakkattaaq atuutilerneratigut attartortup attartukkaminik allamut attartortitsigallarnissamut akuerineqarnissamut taarsiullugu piffissap peqanngiffiusup naanerani inissiamut allamut innersuunneqarnissamut qularnaveeqqusiiffigineqarluni inissiaq attartorunnaarlugu taamaatissinnaavaa.

§ 59-imut

Aalajangersakkami attartortup nammineq kissaatigisamik nuunniarluni utaqqisut allattorsimaffianut allatsissinnaanermut inissiamillu paarlaasseqatigiinnissamik pisinnaatitaaffeqarnera iluarsineqarpoq. Attartortoq attartortumik allamik inissiamik paarlaasseqatissaminik nassaarsimannikkuni nammineq kissaatigisamik nuunniarluni utaqqisut allattorsimaffiannut allatsinnissaq iluaqutigisinnaavaa.

Taamaalilluni attartortitsisoq attartortup inissiamik pilerigisaminik takkuttoqarpat paarlaassinissamik kissaateqarnera ilisimariissavaa. Attartortorli attartortumik allamik inissiamik paarlaasserusuttumik nassaareersimappat nammineq kissaatigisamik nuunniarluni utaqqisut allattorsimaffiannut allatsinnissaq pisariaqassanngilaq.

Attartortut inissiamik paarlaakkusuttut marluullutik attartornermut isumaqatigiissutinik malinnissimanissaat piumasaqaataavoq. Attartortitsisup inissiamik taartigiinnissamik qinnuteqaatinik suliaqarnera ullunit 14-init sivisunerusariaqanngilaq.

Attartortitsisoq inissianik paarlaasseqatigiinnermut attartorneqartumut ataatsimut 250 kr.-inik sullissinnermut akiliisitsisinnaavoq. Akiligassaq inissianik paarlaannermut atatillugu akilerneqassaaq, taannalu attartortitsisup attartornermut isumaqatigiissutinik nutaanik suliaqarneranut taakkunungalugu atatillugu allaffissornikut aqutsinnermut aningaasartuutitut matusissutigineqassaaq.

Attartortup inissianik taartigiinnermi periarfissat marluusut arlaat toqqarsinaavaa.

Periarfissaq ajornannginnerusoq siulleeq tassaavoq attartortut attartukkaminik paarlaallutik attartornermik ingerlatsiinnarnissaat. Attartornermut isumaqatigiissutiminni pisinnaatitaaffiit pisussaataitaaffiillu paarlaatissavaat. Oqaatigiinnavillugu oqartoqarsinnaavoq attartornermut isumaqatigiissutit aallaqqaataanni atit titaannarlugit paarlaanneqassapput. Attartortut qularnaveeqqusiinnermut assigiinngitsunik akiligaqarsimappata, tamanna attartortitsisumit susassarineqanngilaq, tamatumanilu piumasarineqarpoq attartortut namminneerlutik iluarsiiissat. Attartortut attartukkanik paarlaannermi inatsitigut sunniutissat pillugit attartortitsisumit ilitsersuunneqarnissartik pisinnaatitaaffigaat, isumaqatigiissutit kingusinnerusukkut aningaasaqarnermut sunniutissanit annerusunit eqqugaasinnaammat, attartortup aappaata assersuutigalugu inissiaq najukkani nungullartingaatsiarsimappagu, attartortullu aappaata najukkani paarilluarsimagaa. Periaaseq taanna attartornerit marluusut tamarmik 1. januar 2002-mi kingusinnerusukkulluunniit aallartinneqarsimappata aatsaat atorneqarsinnaavoq. Taamatut piffissamik killiliinikkut inissiat pisoqqat nungullarsimasorujussuillu inissianik nutaanerungaatsiartunik taarserneqartarnissaat pinngitsoortinniarneqarpoq.

Periaaseq taanna ajornanngitsuararsuuvoq, kisiannili paarlattuanik attartortup kingusinnerusukkut aningaasartuutissat, attartortup aappaata inissiamut, attartortup paarlaaffigisaanut akiligassanngortitarisimasai akilertussanngorsinnaavai.

Periaatsip aappaani attartornermut isumaqatigiissummik nutaamik atuuttussanngortitsisoqarsinnaavoq. Attartornermut isumaqatigiissutaasimasut atorunnaarsinneqassapput inissiallu nalinginnaasumik iluarsaanneqassallutik, imaluunniit inissianik paarlaasseqatigiinnermi nalinginnaasumik iluarsaanneqarsimasutut isikkoqassallutik. Attartortut attartukkaminut nutaamut qularnaveeqqutissanik nutaanik akiliissapput, attartortitsisorlu attartortut attartorsimasaminut qularnaveeqqusiissutitut akilersimasaannut iluarsiiisuteqassaaq.

Attartortut attartukkamut nutaamut iserternerminnut atatillugu namminneerlutik nalinginnaasumik iluarsaassiniarlutik allakkatigut nalunaaruteqassapput. Attartukkat marluusut ajorisassaangippata, aammalu attartortut marluullutik natit nungullalaarsimasut iikkalluunniit annikitsunik simerneqartut ajorinngikkunikkit nalinginnaasumik iluarsaassinissamut aningaasartuutissat sipaarussukkunikku taamaaliornissaq attartortut toqqarunikku iluaqutigisinnaavaat. Attartortut namminneerlutik inissiamut iserternerminni nalinginnaasumik iluarsaassiniarlutik nalunaarutigisimappassuk, inissiat attartortup tungaaniit nalinginnaasumik iluarsaanneqarsimasutut isigineqassapput. Taamaattorli attartortitsisoq attartortup attartukkamini nutaami nalinginnaasumik iluarsaassiniarluni kissaateqarneranut akerliusinnaavoq, attartukkap kingullermik iluarsaanneqarneraniit ukiut tallimat sinnerlugit qaangiussimappata. Aalajangersagaq attartortup kingusinnerusukkut inissiaq paarlaaffigisani qimannialeruniuk attartortup nuunnissaa sioqqullugu attartortup aappaata inissiami najugaqarallarnernanut tunngasunut attartortitsisumiit akiligassinneqangaatsiarnissaanut illersorneqarnissaa siunertaralugu ilanngunneqarpoq.

Periaaseq taanna periaatsimut siullermut naleqqiullugu pisariunerulaarpoq, paarlattuanilli attartortoq kingusinnerusukkut aningaasartuutissaanik siumut ilisimariinngisanik tigusaqannginnissaa qulakkeerneqarpoq.

Imm. 4, nr. 2 naapertorlugu inissianik paarlaannermut assersuut: A L1-imi najugaqartoq aamma B L2-mi najugaqartoq inissianik paarlaanniarlutik kissaateqarunik, marluullutik attartukkatik taamaatissavaat, isumaqatigiissutinillu nutaanik atsiorlutik. Tassalu A-p L1-imi attartornini taamaatissavaa, L2-milu attartornermut isumaqatigiissummik nutaamik atsiuissalluni. B-p L2-mi attartornini taamaatissavaa, L1-imilu attartornermut isumaqatigiissummik nutaamik atsiuissalluni.

Erseqqissaatigineqassaaq marluullutik aaqqissuussinerup tamarmiusup iluatsinnissaa tatigalugu atsiormata. A-p L2-mi attartornermut isumaqatigiissut nutaaq atsiorsimatsiaannarlugu L2-mi attartornissani nutaaq taamaatippagu, tamanna B-p L1-imi attartornissamut isumaqatigiissutaata atuuttussanngortinneqarneranut sunniuteqassanngilaq.

Attartornermut isumaqatigiissutit inissianik paarlaannerup pinerata kingorna kingusinnerpaamik sapaatit akunnerat ataaseq qaangiutsinnagu atsiorneqartariaqarput. Inissiamik paarlaanneq qaammatip ingerlanerani ullormi sumiluunniit pisinnaavoq.

Attartortut imm. 4, nr. 2-mi maleruagassat malillugit inissianik paarlaanniarpata, aammalu inissiat nalinginnaasumik iluarsaanneqarnissaat toqqarneqarpat, inissiat najugaqarfigineqarnerisa nassatarisaanik nalinginnaasumik iluarsaassinermut atatillugu saniatigut aningaasartuuteqartoqarsinnaavoq. Nalinginnaasumik iluarsaassineq saniatigut aningaasartuuteqarfiussappat, aningaasartuutit attartortumit inissiamit anisussamit akilerneqassapput.

Attartortup aappaa imaluunniit attartortut marluullutik sulisunut inissiani najugaqarpata, inissianik paarlaannissamut attartortitsisoq akuersissuteqartussaavoq. Aalajangersagaq pingaartumik illoqarfinnut Namminersornerullutik Oqartussat kommunellu ataatsimoorlutik inissiaateqarfiginngisaannut, aammalu Namminersornerullutik Oqartussat kommunellu sulisunut inissiatimik sulisunut suliffimmi pineqartumi atorfeqartinneqartuinnarnut atugassiisarnissamik kissaateqarfigisaannut tunngatinneqarpoq. Taamatut pisoqartillugu attartortitsisup soorlu kommunemi sulisup aamma Namminersornerullutik Oqartussani sulisup inissianik paarlaanniarnat akueriumanngissinnaavaa.

Aalajangersakkap atuutilerneratigut Naalakkersuisut inissianik paarlaattarneq pillugu sukumiinerusunik maleruagassiorsinnaapput.

§ 60-imut

Aalajangersakkami attartortup toqunerani aapparisaata inooqatigisaatalu qimagaasup toqusup attartorneranik ingerlatitseqqinnissamut tigusinissamullu pisinnaatitaaffeqarnera iluarsivigineqarpoq. Tamatumani inooqataasup attartukkamik tiguisinnaaneranut piumasarineqarpoq, pineqartup sivikinnerpaamik ukiuni marlunni attartortumut illoqataasimanissaa. Aappaasunut piffissamut killiliisoqanngilaq.

Attartortoq inissiami attartortittakkami nalinginnaasumi najugaqarpat, aappaasoq inooqataasorluunniit qimagaasoq atugassarititaasut atuinnaarlugit attartornermik ingerlatseqqinnarsinnaatitaavoq. Tamanna inissiap inoqutigiinni inuit amerlassusissaannut naapertuunnissaanik piunasaqaatitaqanngilaq, inoqutigiinni inuit amerlassusaat inummik ataatsimik ilanngarmata. Assersuutigalugu aappaasup toqukkut qimagaasup inissiaq attartortittagaq nalinginnaasoq sisamanik initalik tiguisinnaavaa, naak apparit qitornaat marluk angerlarsimaffimmiit nooreeraluartut.

Taamatuttaaq aalajangersakkap atuutilerneratigut aappaasoq inooqataasorluunniit sulisoqarnermut inissiamik inissiatut attartortittakkatut nalinginnaasutut tigusinissamik innersuunneqarsinnaavoq, attartortoq, aappaasoq imaluunniit inooqataasoq toqukkut qimagaasoq tamanna sioqqullugu inissarsiortut allattorsimaffiannut nalinginnaasumut allatsissimappat. Inissarsiortut allattorsimaffiannut nalinginnaasumut allatsissimanissamut piunasaqaateqarnermut tunngaviuvoq, attartortup, aappaasup imaluunniit inooqataasup qimagaasup sulisunut inissiap piffissap ingerlanerani qimanneqarnerani pisortat aqutigalugit ineqarnissamik soqutiginninnermik takutitsisimanissaat. Tassanissaaq inissiap inoqutigiinni inuit amerlassusissaannut naapertuunnissaanik piunasaqaatitaqanngilaq.

Aammattaaq attartortoq paaqqinnittarfimmut assigisaanulluunniit nuuppat maleruagassat taakku atorneqassapput.

Aalajangersagaq apparititut inooqatigiinnerinnarmut imaluunniit ataatsimoortumik qitornaliinnarnik atuutinngillat. Aalajangersagaq aamma qatanngutigii imaluunniit

meeqqat angajoqqaallu najugaqatigiinnerannut, imaluunniit najugaqartut eqqarleriinngikkaluarlutik najugaqatigiinnerannut atuutsinneqarpoq.

§ 61-imut

Aalajangersakkap atuutilerneratigut attartortut averuserneranni avinneranniluunniit imaluunniit aappariinnerup atorunnaarsinneqarnerani aappariinni arlaat attartornerup ingerlateqquinnissaanut pisinnaatitaassanersoq aappariit isumaqatigiissutigisinnaavaat. Tassani pissutsit eqqartuussivinniit attartornermik ingerlatitseqqissinnaatitaasoq kinaassanersoq aalajangiisoqarniartillugu pingaartinneqarsinnaasut taagorneqarput. Eqqartuussiviilli aalajangersakkami pissutsinik taagorneqartuinnarnik atuinissamut qilersorsimaneqanngillat.

Averusernerup, avinnerup imaluunniit aappariinnermik atorunnaarsitsinerup kingorna inissiap inoqutigiinni inuit amerlassusissaannut naapertuunnissaanik piunasaqaatitaqanngilaq, inoqutigiinni inuit amerlassusaat inummik ataatsimik ilanngarmata. Assersuutigalugu aappaasup qimagaasup inissiaq attartortittagaq nalinginnaasoq sisamanik initalik tigusinnaavaa, naak aappariit qitornaat marluk angerlarsimaffimmiit nooreeraluartut.

Aalajangersagaq aappaasup aappaa kisimi attartornermut isumaqatigiissummi allassimagaluarpat, imaluunniit aappariit illugiillutik attartornermut isumaqatigiissummi atsiorsimagaluarpata atuutissaaq.

Kiisalu aalajangersakkami allassimavoq, attartortup aappani qimassimappagu aappaasup attartornermut isumaqatigiissummi piunasaqaatit allanngortinnagit attartorneq nangissinnaagaa.

§ 62-imut

Aalajangersakkap atuutilerneratigut inuit sivikinnerpaamik ukiuni marlunni illoqatigiissimasut inooqatigiinnerminnik taamaatitsigunik, arlamik sorliup attartornermut isumaqatigiissummi piunasaqaatit allanngortinnagit attartorneq ingerlatiinnarsinnaassaneraa isumaqatigiissutigisinnaavaat. Attartortitsisoq isumaqatigiissummut akerliusinnaavoq, attartortitsisoq taamaaliornissamut pingaarutilinnik pissutissaqaruni, soorlu attartornermik ingerlatitseqqittusaaq siornatigut attartortumut attartornermut isumaqatigiissutaasimasumik sumiginnaasimappat.

Inooqatigiinnerup taamaatinneqarnerata kingorna inissiap inoqutigiinni inuit amerlassusissaannut naapertuunnissaanik piunasaqaatitaqanngilaq, inoqutigiinni inuit amerlassusaat inummik ataatsimik ilanngarnerat pissutigalugu piunasaqaat amerlanertigut naammassineqarsinnaanngimmat. Assersuutigalugu aappaasup qimagaasup inissiaq attartortittagaq nalinginnaasoq sisamanik initalik tigusinnaavaa, naak aappariit qitornaat marluk angerlarsimaffimmiit nooreeraluartut.

Aalajangersagaq aappaasup aappaa kisimi attartornermut isumaqatigiissummi allasimagaluarpap, imaluunniit aappariit illugiillutik attartornermut isumaqatigiissummi atsiorsimagaluarpata atuutissaaq.

Inooqatigiit attartorneq arlamik sorliup attartorneq ingerlatiinnarsinnaassaneraa isumaqatigiissutigisinnaangikkunikku, § 61 malillugu aalajangiisarnerni piumasagaataasut assinginik piumasagaatitaqarfiusumik apeqquq eqqartuussivinnut aalajangiiffigitissinnaavaat.

§ 63-imut

Aalajangersakkami attartortut sulisunut inissiami atorfirmmut aalajangersimasumut atugassanngortitaasumi najugaqartut imaluunniit innarluutilinnut inissiami najugaqartut iluarsiivigineqarput. Attartortup aappaa qimagaasoq siornatigulluunniit aapparisimasaa inissiamik atorfirmmut aalajangersimasumut atugassanngortitaasumi imaluunniit innarluutilinnut inissiami najugaqaannarnissamik piginnaatitaaffeqaanngilaq, inissiat taamaattut siunertanut aalajangersimasunut atugassiissutaammata. Tassunga taarsiullugu inissarsiortut allattorsimaffianni nalinginnaasumi allatsissimasunit salliutitsilluni inissiamik allamik innersuussisoqarsinnaavoq.

Pissutsilli immikkut ittut peqquataallutik attartortup aappaa qimagaasoq siornatigulluunniit aapparisimasaa attartortup inissiaq atorfirmmut aalajangersimasumut atugassiissutaasoq imaluunniit innarluutilinnut inissiaq tigusinnaavaa, soorlu pineqartoq nammineerluni inissiami atorfirmmut aalajangersimasumut atugassanngortitaasumi imaluunniit innarluutilinnut inissiami najugaqarsinnaatitaaguni, attartortorli taamatut pisinnaatitaaffeqaarnera peqquataalluni pisinnaatitaaffimminik atuiinnarsimangikkuni.

§ 64-imut

Aalajangersakkakkut attartortup nammineerluni atorunnaarsitsisinnaanera iluarsiivigineqarpoq. Inissiaq attartortumut ilaqutaanullu ataatsimut inigineqarpat, imaluunniit inissiaq aappariit aappaasulluunniit sulineranut atorineqarpat attartortup nammineerluni attartornermut isumaqatigiissut atorunnaarsissinnaangilaa. Tamatumani attartortup atorunnaarsitsinerata allaganngorlugu tunniunneqarnissaa piumasarineqarpoq.

§ 65-imut

Aalajangersakkami sulisunut inissiamik attartorneq atorfeqaarnerup unitsinneqarnerani atuukkunnaassasoq tamatumunngalu atatillugu qimanneqassasoq aalajangersarneqarpoq.

Sulisooq pisussaavoq inissiap qimanneqarnissaa nalunaarutigissallugu, aammalu sulisup akiligassat ingerlaavartut attartornermut attuumassuteqartut siuumoortumik nalunaartussaataaneq nalinginnaasoq naapertorlugu attartornerup unitsinneqarnissaata tungaanut akilertassavai. Aalajangersagaq attuumassuteqartorujussuuvoq, attartortut ilaasa atorfeqarnermik unitsinneqarneranut atatillugu sulisunut inissiamik najukkaminnik taamaatitsinngitsoortarnerannut assersuutissaqarmat, attartortut isumaqaramik sulisitsisup inissiaq taamaatissallugu pisussaaffigaa, sulisitsisup inissiamik sulisumut inniminniineq isumagisimmagu.

Assersuutigalugu atorfeqarneq juunip ulluisa 30-anni unittussanngorpat, attartortup attartornini kingusinnerpaamik maajip ulluisa 31-anni nalunaarutigissavaa. Attartorneq aatsaat soorlu juunip 30-ani unittussatut nalunaarutinneqarpat, attartortup ineqarnermut akiliut il.il. juulip ulluisa 31-ata tungaanut akilersussavai, kisiannili sulisooq juulip qaammataani sulisunut inissiami najugaqarnissamut pisinnaatitaaffeqassanngilaq. Taamaattorli attartortup juulip qaammataani inissiap allamut attartorteqqinneqarnissaa anguniassavaa. Inissiap juulip qaammataani allamut atartorteqqinneqarnissaa iluatsissappat imaluunniit iluatsittariaqassappat, attartortitsisup juulimi allamut attartortitseqqinnermini isertitai attartortitsisup attartortumit piumasaqaataanit ilanngaatineqassapput.

§ 66-imut

Aalajangersakkap atuutilerneratigut attartortitsisup atorunnaarsitsinissamik nalunaarnissamut piffissarititaasut nalinginnaasut malillugit attartortitsisup inissiami najukkamini ineqqanik ataasiakkaanik attartortitsinermik atorunnaarsitsisinnaalerpoq. Tamatuma saniatigut illumik affarleriimmik piginnittup piginnittoq inissiap aappaani najugaqaruni illumi affarleriimmi inissiap aappaani attartorneq atorunnaarsissinnaalerpaa. Atorunnaarsitsineq allaganngorlugu saqqummiunneqassaaq.

§ 67-imut

Aalajangersakkami qanoq pisoqartillugu attartortitsisup attartortumik attartorunnaarsitsisinnaanera aalajangersarneqarpoq. Aalajangersakkami attartortitsisooq inoqutaalu namminneerlutik attartukkami ineqalivinnissartik attartortitsisup kissaatigippagu attartortumik attartorunnaarsitsisinnaanera periarfissinneqarpoq. Tamatumani pineqartoq tassaasinnaavoq attartortup piffissami sivisuumi nunami allamiinnerminik tassanngaannaq kipititsisariaqalernera, taamaattumillu uternermini inissiami najugaqalernissaminik pisariaqartitsinera. Najugaqalivinnissamut piumasaqarnerup kingunerisaanik attartortitsisup attartukkamik nammineerluni atorfissaqartitsinerarluni attartortumik anisitseriarluni inissiaq allamut attartorteqqissinnaanngilaa.

Attartortitsisooq inatsisitigut inuttut naligiissitaalluni isigineqarpat, soorlu assersuutigalugu ingerlatseqatigiiffiuppat imaluunniit pisortani oqartussaasuuppat,

taassuma attartortitsisup attartukkami najugaqalivinnissamik tunngavilersuuteqarluni attartorneq unitsissinnaangilaa. Taamaattorli peqqudit immikkut ittut pingaaruteqarluartullu tunngavigalugit attartortitsisup attartortup attartorunnaarsitsinissaa pisariaqartissinnaavaa.

Tassani pineqartut tassaasinnaapput pisortatigut inuussutissarsiornikkulluunniit eqqarsaatigisassat annertuut, soorlu attartortitsisup illuut tuniniarlugu kissaateqarsinnaavoq, tamannalu attartorneq ataqqineqassappat ajornarsinnaalluni. Aamma eqqarsaatigisassat tassaasinnaapput attartortitsisup napparsimanera utoqqalineraluunniit peqqudigalugu inissiap nakkutilliisumut, illuutip ingerlanneqarneranik isumaginnissaguni illuummi najugaqartariaqartumut atorneqartariaqarnera.

Aamma attartortitsisup attartortoq attartorunnaarsissinnaavaa, attartortoq ileqqorissaarnissamut maleruagassanik malinninngippat, pissutsilli imaangippata attartortitsisup attartornermik isumaqatigiissut atorunnaarsissinnaallugu. Aalajangersagaq attartortitsisup attartortup, uparuarneqartaraluarluni nipiliortortartup imaluunniit najugaqartunut allanut akornusersuisup, kisiannili pissutsit imaangippata attartortitsisup attartornermik isumaqatigiissut atorunnaarsissinnaallugu, attartorunnaarsissinnaanera periarfissinniarlugu ilanngunneqarpoq.

Aalajangersagaq tamavinnut atuuppoq.

§ 68-imut

Aalajangersakkami illuut iluarsaassinisaaq isaterinissarlunniit pissuutigalugu illuutip qimattariaqarnerani Namminersorullutik Oqartussat kommunellu inissiamik taartissamik innersuussinissamut pisussaaffeqarnerat aalajangersarneqarpoq. Isaterineq illuutip piiarneqarneranik paasineqassaaq.

Attartortitsisup attartortut attartornermut isumaqatigiissummik malinnissimasut inissiamut taartissamut innersuuttussaavai. Attartortut iluarsaassinerup kingunerisaanik iluarsaassinerup naammassereerneratigut illuni iluarsaanneqarsimasuni inissiamik, attartortullu isaterinerup kingunerisaanik illunut isatikkanut taarsiullugit inissiaqarfimmi sananeqartunut inissiamik innersuussivigineqarnissamut salliutinneqartussaataapput.

Inissiamut iluarsaanneqarsimasumut uternissamut imaluunniit inissiamut nutaamut salliutinneqartussaataanermi makku piunasaqaataapput: Attartortup attartortitsisup uternissamik neqerooruteqarnerata nalaani attartornermut isumaqatigiissut eqqortissimassavaa, tassalu inoqutigiinni inuit amerlassusaat inissiamut innersuunneqartumut naapertuutissapput. Attartortitsisup pissutsit annertuumik pingaaruteqanngitsut pissutiginiarsinnaangilai. Pissutsit tunngaviginiarneqartut tunngavimmikkut ima annertutigissapput, inissiamik innersuussinissamut itigartitsivinnissamut, imaluunniit attartornermik ingerlasumik unitsitsinissamut inatsisitigut tunngavissaqartoqassalluni.

Attartortup inissiamut taartaasussamut tassanngaanniillu nuunnerminut atatillugu, tassani iluarsaassinerup isaterinerulluunniit kingunerisaanik nuunnerit pineqaraluarpata, aningaasartuutai taarserniarlugit attartortitsisoq aningaasanik taarsiissutissanik attartortumut akiliuteqassaaq. Attartortitsisup aningaasanut taarsiissutissanut aningaasartuutai, aningaasaliissutit illuummik iluarsaassinissamut isaterinissamulluunniit atatillugu tunniunneqartut aqutugalugit akilerneqassapput. Taamaattumik aningaasat inissiaqarfittut immikkoortortat ataasiakkaat aningaasaqarnerannut artukkiissanngillat.

Aningaasat taarsiissutissat annertussusissaannut attartortup nuunnermini aningaasartuutivii apeqqutaatinneqanngillat, inissiallu angissusaa apeqqutaatillugu imatut amerlassusiligaallutik:

Inissiap angissusaa	Taarsiissutissaq
Ataatsimik initalik	2.200
Marlunnik initalik	3.200
Pingasunik initalik	4.200
Sisamanik initalik	5.200
Tallimanik initalik	6.200
Arfinilinnik initalik	7.200

§ 69-imut

Aalajangersakkami attartortitsisup attartornermik atorunnaarsitsinerata tamatigut allaganngorlugu tunniunneqartarnissaa aalajangersarneqarpoq, taannalu tunngavilersugaassaaq akerliliinissamullu periarfissat pillugit paasissutissartaqassalluni. Attartortup attartorunnaarsitsineq akuerisinnaanngikkuniuk, attartorunnaarsitsinerup tigueneraniit sapaatit akunneri arfinillit qaangiutsinnagit tamanna pillugu attartortitsisumut akerliliissuteqassaaq, tamatumalu kingorna attartortitsisup atorunnaarsitsinini aalajangiusimaannaruniuk suliaq eqqartuussivinnut ingerlateqqittariaqassavaa. Namminersornerullutik Oqartussat kommunellu inissiaataanni attartortittakkani iluarsaassinissaq isaterinissarluunniit peqqutugalugit attartorunnaarsitsinermut akerliliissutit suliap kinguartinneqarneranik kinguneqarsinnaanngilaq, taamaattumillu attartortoq piffissaliussami anisariaqarluni. Taamatuttaaq illuummi nakkutilliisumik nutaamik atorfinitsitsinerup kingunerisaanik attartorunnaarsitsinermut akerliliissutit suliap kinguartinneqarneranik kinguneqarsinnaanngilaq.

§ 70-imut

Aalajangersakkap atuutilerneratigut attartortitsisup attartorunnaarsitsinissamik siumoortumik nalunaarfissaa sivikinnerpaamik qaammatinik pingasunik

piffissalerneqarpoq, qaammatip naanerani atuuttussanngorlugu. Taamaattorli attartortitsisup inissiami najugaani inini ataasiakkaani attartortut qaammammik ataatsimik sioqutsisumik nalunaarfigineqassapput.

Attartortup attartorunnaarsitsinissamik siumoortumik nalunaarfissaa qaammammik ataatsimik sivissuseqarpoq, qaammatip naanerani atuuttussanngorlugu. Taamaattorli inissiami nammineq pigisami attartortitsisup taassumalu attartortuata isumaqatigiissutigisinnaavaat, attartortup tungaaniit siumoortumik ilisimatitsinissaq sivikinnerpaamik qaammatinik pingasunik sivissuseqartinneqassasoq, qaammatip naanerani atuuttussanngorlugu. Tamanna taamaallaat attartortup inissiaq ilivitsoq, taassuma ataani illuni affarleriinni inissiaq najugassaq ataaseq attartorpagu tamanna atuutissaaq. Piumasaqaatit atuutinneqassagunik attartornermut isumaqatigiissummi immikkoortillugit erseqqissarneqassapput. Taamaattumik attartortitsisup namminersortup inimik attartortoq isumaqatigiissuteqarfigereerlugu attartortup attartorunnaarnissamik siumoortumik nalunaaruteqarnissaa qaammammik ataatsimiit qaammatit pingasut tikillugit sivitsuinissamik isumaqatigiissuteqarfigisinnaangilaa.

Attartortitsisut namminersortut attartortup attartorunnaarnissamik siumoortumik nalunaaruteqarnissaanut piffissarititaasup sivissunerunissaanut periarfissinneqarnerannut tunngaviuvoq, attartortitsisut namminersortut pisortat attartortitsisartuinut naleqqiullutik attartortitsinermik pisortani attartortitsisartutulli inuussutissarsiorsinnaassuseqarnissaat naatsorsuutigineqanngimmat, taamaattumillu annasaqarnissamut ulorianartorsionerusarlutik, piffissaq sivissunerusoq atorlugu attartortussamik nutaamik nassaarniartariaqartassagamik.

Attartortup akiligassat attartukkamut attuumassuteqartut attartorunnaarnissamut nalunaarfiusup naanissaata tungaanut akilersussavai. Piffissaq nalunaarfiusoq suli naanngitsoq attartortoq inissiamiit anippat, attartortup attartugaq allamut attartorteqqinniassavaa, attartortup aningaasartuutissai killilerniarlugit. Ineqarnermut akiliutit piffissaq nalunaarfiusoq naanngitsoq suli attartortitsisup inissiamik allamut attartortitseqqinnermigut isertitarisai attartortitsisup attartortumut piumasaqaataanit ilanngaatigineqassapput. Assersuutigalugu attartortoq qaammatinut pingasunut siumut ineqarnermut akiliisimappat, attartortitsisup inissiamik allamut attartortippagu attartortup piffissaq nalunaarfiusoq matussuserniarlugu qaammatinut pingasunut siumoortumik akiliutigisani utertissavai. Attartortitsisup piffissap nalunaarfiusup ingerlanerani inissiaq allamut attartortinngippagu, kisiannili attartortittariaqaraluarlugu, attartortoq taamatuttaaq aningaasartuutiminut attartortitsisumit taarsiiffigineqassaaq. Attartortitsisup piffissap nalunaarfiusup iluani inissiaq attartortittariaqarnera naliliisarneq inatsisilerinikkut isiginneriaatsit nalinginnaasut aallaavigalugit pisassaaq.

§ 71-imut

Aalajangersakkap atuutilerneratigut attartornermut isumaqatigiissut piffissamut aalajangersimasumut atuuttussanngortitaasimasoq piffissap attartornissamut isumaqatigiissuteqarfiusup naanerani siumut ilisimatitsinertaqanngitsumik attartorneq unitsinneqassaaq. Attartortup pissusilersornera attartortitsisumut

illuummilu attartortunut allanut artukkiippat, attartortitsisup attartornermut isumaqatigiissut atorunnaarsissinnaavaa. Taamaattorli attartortitsisup attartortumut pissutiginiagai annertuumik pingaaruteqanngippata attartortitsisup attartornermut isumaqatigiissut atorunnaarsissinnaanngilaa. Pissutsit pingaarutillit attartortitsisup attartornermut isumaqatigiissummik atorunnaarsitsisinnaanera pillugu kapitali 11-mi takuneqarsinnaapput.

Kiisalu aalajangersakkap atuutilerneratigut attartortup attartortitsisup ilisimasaanik attartornerup piffissamut aalajangersimasumut atuuttussanngortitaasup naareernerani attartukkani atuinnaarpagu, attartorneq attartornermut nalinginnaasumut piffissamut aalajangigaanngitsumut, inatsisitigullu sunniutissanut tassunga attuumassutilinnut ingerlaannartumik nuussaaq. Tassalu attartortoq attartortitsisorlu maanna attartorunnaarnissaq pillugu siumoortumik nalunaartussanngorput. Maleruagassaq attartukkami piffissamut killiligaasumi attartortut attartornerminnik ingerlatsiinnarsinnaatitaasut illersorniarlugit ilanngunneqarpoq. Taamatut pisoqartillugu attartortitsisup tassanngaannaq ullormik ataasiinnarmik periarfissiilluni attartortoq attartorunnaarsissappagu, paarlattuanillu attartortup attartorunnaarnissamut nalunaarut malissallugu akuerisariaqassappagu tamanna naapertuutissanngilaa.

§ 72-imut

Aalajangersakkap atuutilerneratigut §§ 67-71-imi atorunnaarsitsinissamut maleruagassat attartortumut illersuutitut sunniuteqarput.

§ 73-imut

Aalajangersakkami attartortup pissusisilersornera attartortitsisumut illuummilu attartortunut allanut artukkiippat, attartortitsisup attartornermut isumaqatigiissummik atorunnaarsitsisinnaanera iluarsivigineqarpoq. Taamaattumik attartortitsisup attartortumut pissutiginiagai annertuumik pingaaruteqanngippata attartortitsisup aalajangersagaq malillugu taamaatitsisinnaaneranik kinguneqarsinnaanngilaa. Attartortitsisoq pisussaavoq attartortumut pissutsit iluarseqqullugit allakkatigut nalunaaruteqassalluni. Attartortup piffissaliussatut taaneqartup iluani pissutsit iluarsisimappagit, attartortitsisup attartornermut isumaqatigiissut atorunnaarsissinnaanngilaa.

Aammattaaq aalajangersakkap atuutilerneratigut imm. 1 naapertorlugu pisortaniit attartortitsisoq pisut ilaanni attartornermut isumaqatigiissummik atorunnaarsitsissalluni pisussaavoq. Tamanna ineqarnermut akiliummut akiliinngitsoornermut, imermut imaluunniit kiassarnermut akiliinngitsoornermut imaluunniit qularnaveeqqusiissummumut akiliinngitsoornermut atuutsinneqarpoq. Tamatumunnga peqqutaavoq ineqarnermut akiliummut, imermut imaluunniit kiassarnermut qularnaveeqqusiissummulluunniit akiliinngitsoornerup tamatigut attartornermut isumaqatigiissummik sumiginnaanertut annertuutut isigineqartarnera, attartortut ataasiakkaat akiliinngitsoorneranni najugaqatigiiffimmi attartortut sinneri

aningsartuuteqartinneqartarmata, taamaattumillu attartortitsisoq pisussaavoq attartornermut isumaqatigiisummik atorunnaarsitsissalluni, taamaalillunilu attartortut allat aningsartuutissat killilissallugit. Attartortitsisoq inuinaappat maleruagassaq atuutsinneqassanngilaq, namminerisamik inissiaatit attartortittakkat inissiaqarfittut immikkoortortamut ilaanngimmata. Taamaattumik attartortitsisoq namminersortoq akiliinngitsoortoqarnerani attartornermut isumaqatigiisummik atorunnaarsitsinissamik pisussaaffiligaanngilaq, kisiannili attartortitsisoq taamatut sulii periarfissaqarpoq.

§ 74-imut

Aalajangersakkami ineqarnermut akiliummut, imermut, kiassarnermut qularnaveequsiisummulluunniit kingusinaarluni akiliinerup kingunerisaanik attartornermut isumaqatigiisutit atorunnaarsinneqarneranut atatillugu periusissaq attartortitsisullu pisinnaatitaaffii pisussaaffiilu erseqqissarneqarput. Tassani § 73-imut nassuiaatini tunngaviliunneqartut assingi aallaavigalugit attartortitsisut pisortat namminersortullu immikkoortinneqarput.

Aalajangersagaq kingusinaarluni akiliinermut atatillugu akileeqqusinermut sullissinermut akiliisitsisoqarsinnaaneranut tunngavissanik imaqarpoq. Sullissinermut akiliutissaq attartornermi akiligassatut pisussaaffiuvoq. Sullissinermut akiliutissaq annerpaamik 150 kr.-iussaaq.

Aammattaaq aalajangersagaq tamatuma kingorna atorunnaarsitsinissap atorunnaarsinneqarneranut atatillugu sullissinermut akiliisitsisoqarsinnaaneranut tunngavissanik imaqarpoq. Sullissinermut akiliutissaq attartornermi akiligassatut pisussaaffiuvoq. Sullissinermut akiliutissaq annerpaamik 150 kr.-iussaaq. Attartortitsisup atorunnaarsitsinissap atorunnaarsinneqarneranut akiliisitsisarnissaanut tunngaviuvoq, pisortat inissiaataanni attartortikkani attartortut arlallit akiliinngitsoornerup kingunerisaanik atorunnaarsitsinerup kingorna erngerlutik ineqarnermut akiliummik akiliisarnerat. Attartortitsisut atorunnaarsitsinernik taakkununga atorunnaarsitsisarnerat allaffissornermut artukkiisarpoq.

Taamaattorli attartortitsisup sullissinermut akiliutigigitaa annerpaamik attartortitsisup akileeqqusissutaanik nassiussinermut imalunniit atorunnaarsitsinermik atorunnaarsitsinernut tamatumalu kingorna sulianut aningsartuutaanit annertunerussanngilaq.

§ 75-imut

Aalajangersakkap atuutilernergut attartortoq illumut, attartortitsisumut, taassuma sulisuinut, illumi attartortunut allanut inatsisit malillugit illumiittunut annertuumik ajoqutaasumik pissusilersorpat, attartortitsisup attartortitsineq erngerluni atuutilersussamik atorunnaarsinnaavaa. Ajoqutaasumik uloarianartumilluunniit pissusilersornerit attartortumit namminermit, attartortup inoqutaanit allanilluunniit

attartortup attartukkamut isersinnaatitaanit piliarineqarnersut apeqqutaatinnagu attartortitsisup pisinnaatitaaffia atuutissaaq. Tamatumani pineqartoq tassaavoq inuup pissusilersornerminik unitsitsinissaanik piffissalernerqarnissaata isumaqannginnera.

§ 76-imut

Aalajangersakkami attartortup erngerluni attartukkamit aninissaminik, aammalu attartortup atorunnaarsitsinermik nalunaarfissap nalinginnaasup naanerani aninissaata tungaanut akiligassanik pisussaaffiusunik akiliinissamut pisussaataaffeqarnera erseqqissarneqarpoq. Kiisalu attartortoq pisussaavoq attartortup attartornermut isumaqatigiisummik sumiginnaanerata kingunerisaanik attartortitsisup annaasarinnasai taarsissallugit. Assersuutigalugu attartortoq inissiamit erngerluni aninngippat, attartortitsisoq attartortup eqqartuusummik naammassititsiniaasartumit anisinneqarnissaata utaqqinerani annaasaqassaaq. Attartortitsisup tamatumunnga atatillugu annasai attartortumut taarsertinniarneqartussaapput, taakkulu attartortitsisup qularnaveeqqutaasinnaasunit, attartortup akilersimasaanit iluarsiiiffiginnaavai.

Tamatuma saniatigut aalajangersakkami erseqqissarneqarpoq, attartortitsisup attartortup aningaasartuutissai killilersorniassagai, attartortup nuunnerata kingorna attartortitsisup attartugaq pilertornerpaamik attartorteqqinniassallugu. Ineqarnermut akiliutit piffissaq nalunaarfiusoq naanngitsoq suli attartortitsisup inissiamik allamut attartortitseqqinnermigut isertitarisai attartortitsisup attartortumut piumasaqaataanit ilanngaatigineqassapput. Attartortitsisup piffissap nalunaarfiusup ingerlanerani inissiaq allamut attartortinngippagu, kisiannili attartortittariaqaraluarlugu, attartortoq taamatuttaaq aningaasartuutiminut attartortitsisumit taarsiiiffigineqassaaq. Attartortitsisup piffissap nalunaarfiusup iluani inissiaq attartortittariaqarnera naliliisarneq inatsisilerinikkut isiginneriaatsit nalinginnaasut aallaavigalugit pisassaaq.

Aalajangersagaq naapertorlugu Naalakkersuisut Namminersornerullutik Oqartussat kommunellu inissiaataanni attartortittakkani attartornermik atorunnaarsitsisarneq pillugu maleruagassiornissamut pisinnaatinneqarput.

§ 77-imut

Aalajangersakkap atuutilerneratigut Inissiamit anisoqarnerani inissiaq nalinginnaasumik iluarsaanneqassaaq. Nalinginaasumik iluarsaassinermi pineqarput qilaanik qaqorsarlugit qalipaaneq, iikkanik qalipaaneq aamma/imaluunniit ungalitsersuineq kiisalu eqqiaaneq. Taakku saniatigut natii nutaamik lakkersimasutut isikkoqassapput, tassalu pisariaqarpat natii lakkerneqassapput. Attartortup nammineerluni nuunnerminut atatillugu nalinginnaasumik iluarsaassinissaaq assasornermik ilinniagaqarsimasutut illersorneqarsinnaasumik pitsaassuseqartillugu suliarinissaanut imaluunniit isumaginissaanut periarfissaqaruni, tamanna attartorunnaarnissamut nalunaarfiusup naannginnerani suliarinissaa attartortup pisinnaatitaaffigaa.

Aalajangersakkami siunertaavoq attartukkap qimannerani inissiaq iserterfigineratut pitsaassuseqartillugu tunniunneqarnissaa. Tamatumattaq kingunerisaanik iserternermi inissiaq nalinginnaasumik iluarsaanneqarsimanngippat, attartortup inissiaq iserterfigineratut itsillugu tunniutiinnarsinnaavaa.

Aalajangersakkap atuutilerneratigut attartortup nammineerluni nalinginnaasumik iluarsaassinissaq isumagisinnaavaa, tassalu attartortup nammineerluni iluarsaassineq suliarisinnaavaa imaluunniit iluarsaassinissaq sanasumut isumagitissinnaallugu. Attartortut qaammatit 100-t inorlugit attartukkaminni najugaqarsimasut, taamaattumillu suli nalinginnaasumik iluarsaassinermut akiliisussaasut, niuernikkut pissutsit apeqqutaatillugit namminneerlutik neqeroortitsinissaq aningaasaqarnikkut iluaqutigisinnaavaat. Aningaasartuutit appasitsinneqarsinnaappata tamanna attartortumut taamatullu inissiaqarfittut immikkoortortamut sipaaruteqarnissamik kinguneqarsinnaavoq, illuatungeriit marluullutik nalinginnaasumik iluarsaassinermut aningaasartuutissat avittussaammaticigik.

Attartortitsisoq periarfissaqarpoq attartukkap qimanneqarnerani nalinginnaasumik iluarsaanneqarnissaanut maleruagassat sanioqqutissallugit. Tamatumunnga taarsiullugu attartortitsisup attartortoq inissiamit aninerminut atatillugu qaammammut inimut ataatsimut 50 kr.-inik aalajangersimasumik akiliuteqarnissaanik piunasaqarsinnaavoq. Tassalu inissiamut marlunnut initaqartumut attartortoq ukiumut 1.200 kr.-inik nalinginnaasumik iluarsaassinissamut akiliuteqartinneqassaaq, inissiamillu sisamanik initalimmik attartortoq ukiumut 2.400 kr.-inik akiliuteqartinneqassalluni. Attartortitsisup attartortoq nalinginnaasumik iluarsaassinissamut annerpaamik qaammatinut 100-nut akiliisissinnaavaa. Qaammatit 100-t inissiap nalinginnaasumik iluarsaassiffiusimanngitsut naaneranni inissiaq nalinginnaasumik iluarsaanneqassaaq, imaluunniit attartortitsisoq siunissami attartortussanut nalinginnaasumik iluarsaassinissamut akiliisitsinissamut pisinnaatitaaffeerutissalluni.

Maleruagassap nunaqarfinnut isorliunerusunullu, nalinginnaasumik iluarsaassinermi annertuunik aningaasartuuteqarfiusartunut atorineqarnissaa eqqarsaatigineqarpoq. Aammattaq attartortitsisup atortussanik nunaqarfinnut assartuisitsinissani ajornakusoortissinnaavaa, soorlu sikorsuit peqqutaallutik. Aamma attartortitsisoq sanasunik piginnaanilinnik nunaqarfiliartitsiniarneq ajornartorsiorfigisinnaavaa.

Nalinginnaasumik iluarsaassineq, taassuma ataani teknikikkut pitsaassuserititassat, atortussanik toqqaasarneq suliassallu suliarineqarnissaanut piunasaqaatit pillugit maleruagassat sukumiinerusut Naalakkersuisunit aalajangersarneqassapput.

§ 78-imut

Aalajangersakkami erseqqissarneqarpoq, attartortitsisup aserfallatsaaliuineranut pisussaaffik qaammatit 100-t ingerlanerini tigujartuaassagaa. Qaammatit 100-t taakku suli naanngitsut inissiaq qimanneqarpat, nalinginnaasumik iluarsaassinermut aningaasartuutit attartortitsisup attartortullu akornanni angeqqatigiinnik avinneqassapput.

§ 79-imut

Aalajangersakkami erseqqissarneqarpoq, attartortup inissiamit anineranut atatillugu attartugaq misissorneqartussaasoq. Tassanissaaq attartortup misissuinermut peqataasinnaatitaanera erseqqissarneqarpoq. Peqataaneq attartortup nammineerluni imaluunniit sinnisorisaata takkunneratigut pisinnaavoq. Attartortitsisup attartortoq sivikinnerpaamik ullut arfineq marluk sioqqullugit misissuinermut peqataaqqullugu qinnuigissavaa. Aalajangersakkamissaaq erseqqissarneqarpoq misissuinermut nalunaarusiortoqassasoq, taannalu misissuinermi peqataasunit atsiorneqassasoq. Attartortoq misissuinermut nalunaarutip assilineranik tunineqassaaq, tamatumalu kingorna attartortup attartortitsisoq tamanna pillugu qinnuigippagu suliasat attartortitsisup attartortumut akiligassatut isumaqarfigisaasa akissaat pillugit nalunaarfigineqassalluni.

§ 80-imut

Aalajangersakkami attartortoq taannaluunniit sinnerlugu takkuttussaq misissuinermut peqataangitsoorpata attartortitsisup misissuinermut nalunaarutip tunngavigineqarnissaanik pisinnaatitaaffeqarnera erseqqissarneqarpoq. Taamatuttaaq attartortitsisup attartortup qularnaveeqqusiissutaanik attartortup nalunaarut attartornissamullu isumaqatigiissut naapertorlugu pisussaaffiinit matusissutissatut atuinissamik pisinnaatitaaffeqarnera aalajangersakkami erseqqissarneqarpoq. Attartortitsisup attartortup inissiamit anineranut atatillugu paarsinerluttoqarsimanera aserorterisoqarsimaneraluunniit patsisiginiassappagit, attartortitsisup tamanna immikkut ittumik uppersarsinnaassavaa, assersuutigalugu isiginnittut, assilisat videolialluunniit atorlugit.

§ 81-imut

Aalajangersakkap atuutilerneratigut Namminersornerullutik Oqartussat kommunellu inissianik allaffissornikkut aqutsisussamik avataaniit atorfinitsitsisimasut nakkutilliisussaataitanerata aqqissorneqarnissaa aalajangersarneqarpoq. Namminersornerullutik Oqartussat kommuneluunniit inissianik allaffissornikkut aqutsisussamik avataaniit atorfinitsitsisimasoq nakkutilliisussaataitanerminnik naammassinninnaapput, allaffissornikkut aqutsisup kukkunersiuisuanik inissianik allaffissornikkut aqutsisup suliasaminik Inatsisartut peqqussutaat manna aalajangersakkallu peqqussut tunngavigalugu suliarineqarsimasut naapertorlugit isumaginninneranut nalunaarusiortitsinikkut. Tamatumuunali Namminersornerullutik Oqartussat kommuneluunniit kukkunernut sumiginnaanernullu, allaffissornikkut aqutsisup avataaniit atorfinitsinneqarsimasup piliarisaanut akisussaaffeqarnerat peerneqanngilaq.

Namminersornerullutik Oqartussat kommuneluunniit nammineerluni inissiaatiminik allaffissornikkut aqutsisusup kukkunersiuisuni allaffissornikkut aqutsinerup Inatsisartut peqqussutaat manna aalajangersakkallu peqqussut tunngavigalugu

suliarineqarsimasut naapertorlugit ingerlanneqarneranut nalunaarusiortissavaa. Nalunaarutit allaffissornikkut aqutsisup nammineerluni naatsorsuutiminik saqqummiussineranut atatillugu suliarineqartarnissaa Naalakkersuisunullu nassiunneqartarnissaa naatsorsuutigineqarpoq.

Aammattaaq aalajangersakkap atuutilerneratigut Naalakkersuisut nakkutilliinerpiamut, taassuma ataani nakkutilliinermi atortussanik suliaqartarnermut tunngasunik sukumiinerusunik maleruagassiorsinnaapput.

§ 82-imut

Aalajangersakkap atuutilerneratigut ineqarneq pillugu maalaaruteqartarfimmik pilersitsisoqarsinnaalerpoq. Maalaaruteqartarfiup pilersinneqarnerani siunertaavoq ataatsimiittartoqatigiinnik, attartortitsisup attartortullu akornanni aaqqiagiinnginnernut pilersunut aalajangiisinnaasunik pilersitsinissaq. Maalaaruteqartarfiup oqarsinnaatitaaffii suliaqartarfinni annerni misilittakkat naapertorlugit aalajangersarneqarput.

Ineqarneq pillugu maalaaruteqartarfik siulittaasoqassaaq, taassumalu saniatigut sulianut ilisimasalinnik pingasunik ilaasortaqaqassalluni. "Sulianut tunngasunik ilisimasalinnik" oqarnermi isumagineqartut tassaapput ilaasortat pisortat sanaartornerat pillugu inatsisinik aammalu inissianik attartortitsisarnermi pissutsinik ilisimasaqarluartut.

Imm. 3-p atuutilerneratigut siulittaasup, ilaasortat sinniisissallu qinigaanerat ukiut sisamat tikillugit atuuttassapput. Siulittaasoq ineqarneq pillugu immikkut ilisimasaqarsinnaavoq imaluunniit inatsisilerituutut misilitsissimassalluni, aammalu piginnittut kattuffiannut, inissiaatileqatigiit kattuffiannut imaluunniit attartortut kattuffiannut immikkut attuumassuteqartuussanngilaq, imaluunniit inuussutissarsiutigalugu illuutininik nioqquteqarnermut akuliusimasuussanani.

Maalaaruteqartarfimmut ilaasortaqaq sinniisussaaluunniit pissusissamisoortumik aggersarneqareernermini maalaaruteqartarfimmut aggernissamut pisussaataitaavoq. Naalakkersuisut ineqarneq pillugu maalaaruteqartarfimmi ataatsimiinnissamut takutinngitsoornerup kingunerisassai pillugit sukumiinerusunik maleruagassiorsinnaapput.

KANUKOKA, kommunet sinnerlugit ilaasortaataitaqartoq, taamatuttaarlu inissianik attartortittakkanik 5.000-it missaanniittunik pigisaqartoq ilaasortassamik sinniisissamillu inassuteqassaaq. A/S Inissiaatileqatigiiffik INI, pisortat inissiaataat attartortittakkat 90%-ii sinnerlugit aqutsisuusoq ilaasortassamik sinniisissamillu inassuteqassaaq. IPK (nuna tamakkerlugu attartortut kattuffiat) ilaasortassamik sinniisissamillu inassuteqassaaq. Erseqqissarneqassaaq IPK ukiuni kingullerni pingasuni uninngasimammat, taamaattumillu ilaasortassamik sinniisissamillu inassuteqarsinnaaneq kattuffinnut SIK-mut, IMAK-imut aamma PPK-mut taaneqarnerisa tulleriinneri malillugit tunniunneqassaaq. Tassa IPK ilaasortassamik inassuteqanngippat, pisinnaatitaaffik SIK-mut tunniunneqassaaq. Tullianik

ilaasortassamik inassuteqartoqalerpat IPK tamanna pillugu neqeroorfigineqaqqissaaq, tassanngaanniillu ilaasortassamik taasisoqaqqinngippat pisinnaatitaaffik IMAK-imut tunniunneqassaaq il.il.

§ 83-imut

Naalackersuisoqarfiup ineqarnermik isumagisaqartup allattoqarfittut ikiorsiinissaa tunngavissaritinneqarpoq. Nalinginnaasumik ineqarneq pillugu maalaaruteqartarfimmut allatsitit fuldmegtigi inatsisilerituutut suliaqartoq toqqarneqartassaaq, taassumalu suliaasanut piareersagassat tamaasa isumagisassavai, tak. kinguliani tamanna pillugu nassuiaatit sukumiinerusut.

Maalaaruteqartarfiup sulineranut aningaasartuutit tamaasa Naalackersuisut akilertassavaat, aammalu ineqarneq pillugu maalaaruteqartarfiup aningaasaqarnera qulakkeerniarlugu Naalackersuisut pisortat inissiaataanni attartortittakkani ataasiakkaani tamavinni attartortortut ukiumoortumik 100 kr.-inik akiliisittarsinnaavai. Attartukkani ataasiakkaani attartortut ineqarneq pillugu maalaaruteqartarfimmut akiliutissanik akiliisitsiniarnissaaq akiliisitsisarnissarlu attartortitsisup akisussaaffigaa.

Aalajangersakkap atuutilerneratigut ineqarneq pillugu maalaaruteqarfiup ukiumoortumik nalunaarummik, ilaatigut suliat tunniunneqartut naammassillugillu suliarineqartut pillugit kiisalu suliat aalajangiiffigineqartut ataasiakkaat kisitsisitaat naatsumik saqqummiullugit kisitsisitigut takussutissianik imaqartumik saqqummiussisassaaq.

§ 84-imut

Aalajangersakkap atuutilerneratigut ineqarneq pillugu maalaaruteqartarfiup suliaasaqarfiit, imm. 1-imi taaneqartut aalajangiiffigisinnaavai. Aalajangersagaq tamanut matussusiiivoq.

Suliaq maalaaruteqartarfimmut tunniunneqartoq maalaaruteqartup maalaaruteqartarfimmut isummerfigitikkusutai pillugit allakkiamik ilaqartinneqassapput. Assersuutigalugu maalaaruteqartoq isumaqarsinnaavoq, inissiami maalaaruteqartup iserterfigisaani nateq lakkernerlunneqarsimasooq, natip lakkia sapaatit akunnerini sisamani nalinginnaasumik atorneqareerluni katagalersimammat. Aamma maalaarut ernissap krefterluni nunami allami katsorsarneqarnissaanut atatillugu attartukkap allamut attartortinneqarnissaanut itigartitsinermut tunngasinnaavoq.

Aalajangersakkamik ilanngussisoqarpoq, taannalu malillugu maalaaruteqartoq maalaaruteqartarfimmut suliaqarnermini 500 kr.-inik akiliisussaavoq. Aningaasat taakku suliap suliarineqarnissaanut akiliutissatut eqqarsaatigineqanngillaq, kisiannili maalaarutit tunngavissaqanngilluinnartut maalaaruteqartarfimmut tunniunneqartarnissaanut pinngitsoortitsinissamik siunertaqarluni akiliutitit

naammaginartutut atuutsinneqalersimalluni. Maalaaruteqartoq maalaaruteqarnermini tamakkiisumik ilaannaasumilluunniit taperserreqarpat, 500 kr.-it taakku maalaaruteqartumut utertinneqassapput.

§ 85-imut

Suliassaqrfiit § 84, imm. 1-imi allatorneqartut pillugit maalaarutit amerlanersaasa pisariunngitsumik naammassineqartarnissaat ilimagineqarpoq, taamaattumillu paasissutissanik ilassutissanik pissarsiniarnikkut imaluunniit takuniaanikkut uppersaatissanik annertuunik pisariaqartitsiviussanatik. Paarlattuanik maalaarutinit ikittunnguit pisariungaatsiartarnissaat, amerlanertigullu arlalinnik tunngaveqartarnissaat naatsorsuutigineqarpoq, tassalu maalaarutit torersagassatut imaluunniit ataatsimoortitatut isigineqarsinnaasut, taakkunanilu pissutsit arlallit maalaarutigineqarsinnaapput, immaqqa attartortoq ataatsimut isigalugu eqqunngitsumik pineqartutut misigisimammat. Suliani taamaattuni maalaaruteqartarfiup suliassaa tassaavoq attartortup attartortitsisullu akornanni tatigeqatigiinnerup pilersinneqaqqinnissaa. Maalaaruteqartarfiup maalaarutininik suliaqarnermini inassuteqaannarfissanik naammattuuisinnaavoq, tamatumani maalaarut saqqummiunneqartoq ilusiligaanini peqqutigalugu uppersaatigineqarsinnaasunik tunngavilerneqarsinnaanngimmat. Kiisalu maalaarutininik pissutsinilluunniit maalaaruteqarnissamut tunngavissaqannginnermut attartortitsisumit qulakkeerlugu uppersarneqarsinnaanngitsunik naammattuuisoqartarsinnaavoq.

Tamanna tunngavigalugu allattoqarfiup maalaarutit takkuttut ilaatigut misissortartussaavai, maalaaruteqartarfimmilu sularineqassanersut isummerfigisartussaallugu. Suliaq maalaaruteqartarfimmi sularineqartussatut tiguneqarpat allattoqarfik suliap saqqummiunneqarnissaanut allakkiusaaq, tassanilu suliaq sukumiinerusumik misissuiffigineqartariaqarnersoq erseqqissarneqartariaqarnersorluunniit naliliiffigineqassaaq. Suliap saqqummiunneqarnissaanut allakkiaq tunngavigalugu siulittaasup allattoqarfik ikiortigalugu inassuteqaasiornissamut, taamaalillunilu maalaaruteqartarfimmut aalajangiiffigisassanngorlugu saqqummiussinissamut suliaq naammattumik erseqqissarneqarsimanersoq aalajangiiffigissavaa. Aammattaaq siulittaasoq suliamut aalajangersimasumut inassusiornissamut atatillugu sukumiinerusumik misissuisoqassanersoq aalajangersinnaavoq.

Suliat pitsaanerpaamik erseqqissaavigineqarnissaat qulakkeerniarlugu siulittaasup maalaaruteqartarfiup allattoqarfia ikiortigalugu nammineerluni misissugassat takuniarsinnaavai. Suliami akuusut sivikinnerpaamik sapaatit akunnerannik ataatsimik sioqqutsisumik takuniaanissamut aggersarneqassapput. Takuniaanermut aningaasartuutit Naalakkersuisunit akilerneqassapput.

Suliassat ineqarnek pillugu maalaaruteqartarfimmut saqqummiussassat allaganngorlugit piareersarneqassapput, taamaattumillu suliami akuusut takkunnerminni maalaaruteqartarfimmut nassuiaateqarsinnaanngillat.

Maalaaruteqartarfiup suliap maalaaruteqartarfimmi suliarineqarnissaa itigartippagu, maalaaruteqartup aalajangiineq tamanna allaffissornermi oqartussaasunut suliaakkiissutigisinnaangilaa, eqqartuussivinnulli suliaakkiissutigisariaqassallugu.

Inassut arlalinnik immikkoortortaligaasinnaavoq, maalaaruteqartarfillu taamaalilluni assigiinngitsunik sakkortussusilinnik kimilinnilluunniit aalajangiisnaavoq. Soorlu natip lakkernerata pitsaassusaa pillugu maalaarut kinguliani allassimasut ilaannik ataatsimik aalajangiiffigineqarsinnaavoq:

- a. nateq lakkeqqinneqassaaq,
- b. natip aserfallatsaalineqarnissaa attartortumut isumagisassanngortinneqanngilaq, imaluunniit
- c. ajoquserneq annikitsuararsuuvoq, taamaattumillu inissiamut iserternermi amigaatitit allanneqaannassalluni, inissiamiillu aninermi nateq nutaamik lakkerneqassanani.

Suliaq maalaaruteqartarfimmi suliarineqartussatut tiguneqarsimappat piffissaliussat malinneqassapput. Maalaarutigineqartoq maalaarut maalaaruteqartarfimmi suliarineqartussatut tiguneqarneraniit kingusinnerpaamik sapaatit akunnerisa marluk qaangiunnerini illuatungeriinni maalaarutigineqartoq ilisimatinneqassaaq. Tamatuma kingorna illuatungeriinni aappaasoq allakkatigut akissuteqarnissamut sapaatit akunnerinik pingasunik periarfissinneqassaaq. Suliaq pisariungaatsiarpat allattoqarfiup akissuteqarnissamut piffissarititaasoq sivitsorsinnaavaa.

§ 86-imut

Allattoqarfik akissutitit allakkiamik tigusiguni suliap saqqummiunneqarnissaanut allakkiussaaq, suliap naammattumik paasissutissiivigineqarnerisooq pillugu naliliinertalimmik. Siulittaasup suliaq naammattumik paasissutissiivigineqarsimasutut isumaqarfiginngikkuniuk, misissugassat suut sukumiinerusumik misissorneqassanersut aalajangiiffigissavaa. Allattoqarfiup sapaatit akunneri pingasut tulliuuttut iluini annertunerusumik misissugassat misissuiffigissavai. Illuatungeriit arlaat annertunerusumik misissuinermut atatillugu paasissutissanut ilassutissanik piumaffigineqaraluarluni, sapaatit akunnerisa pingasut qaangiunnerini akissuteqanngippat, tamanna illuatungiliuttumut tassunga akornutaasinnaavoq. Sapaatit akunnerisa pingasut taakku qaangiunnerini allattoqarfik sapaatit akunnerisa sisamat iluanni suliamik saqqummiussinissamut nutaamik inassutitalimmik allakkiussaaq, siulittaasumut saqqummiunneqartussamik. Siulittaasup inassut akueriguniuk, suliaq nammineq inassutiminik ilallugu ineqarneq pillugu maalaaruteqartarfimmut aalajangiiffigisassanngorlugu saqqummiutissavaa.

Siulittaasup suliassanik maalaaruteqartarfiup ataatsimiinnerani suliarineqartussanik nassiussinissaanut piffissarititaasoq maalaaruteqartarfimmut ileqqoreqqusani allassimassaaq. Nalinginnaasumik suliassat inassutitalit ataatsimiinnermi suliarineqannginnerini kingusinnerpaamik sapaatit akunneri sisamat sioqqullugit maalaaruteqartarfimmi ilaasortanut nassiunneqarsimanissaat piumasarineqassaaq.

Suliaq tamakkerluni ilaaluunniit nutserneqarsinnaappat, tamanna suliap suliarineqarnerani killissarititaasunik sivitsuinissamut pingaarutilittut tunngavigineqarsinnaavoq.

Sulap suliarineqarnissaa ataatsimut isigalugu maalaarutip suliarineqartussatut tiguneqarneraniit ineqarneq pillugu maalaaruteqartarfiup aalajangiinissaata tungaanut sapaatit akunneri 20-t tikillugit ingerlasinnaapput:

- Sap. ak. ataaseq nalunaarsuinissamut naliliinissamullu, § 85, imm. 1.
- Sap. ak. marluk nalunaaruteqarnissamut, § 85, imm. 3.
- Sap. ak. pingasut tusarniaanissamut, § 85, imm. 3.
- Sap. ak. pingasut misissuinissamut, § 85, imm. 5.
- Sap. ak. ataaseq takuniaanissamut, § 85, imm. 6.
- Sap. ak. sisamat suliamik saqqummiinissamut, § 86, imm. 1.
- Sap. ak. sisamat maalaaruteqartarfimmi ilaasortanut.
- Sap. ak. marluk aalajangiinissamut, nutserinissamut nassiussinissamullu.

Maalaaruteqartarfiup aalajangiineri Namminersornerullutik Oqartussanut kommunenullu inissianik attartortitsisuusunut sanioqqunneqarsinnaanngitsumik atuutissapput. Namminersornerullutik Oqartussat kommuneluunniit avataaniit allaffissornikkut aqutsisussamik atorfinitsitsimappat, maalaaruteqartarfiup aalajangiineri aamma sanioqqunneqarsinnaanngitsumik atuutissapput. Aalajangiinerit sanioqqunneqarsinnaanngitsumik atuutsinneqarnerisa kingunerisaannik attartortitsisoq aalajangiineq malissallugu pisussaatinneqarpoq. Kisianni maalaaruteqartarfiup aalajangiineri pinngitsaaliissummik naammassitinniarneqarsinnaanngillat. Tamaattumik maalaaruteqartarfiup aalajangiineri inaarutaasut attartortitsisumit malinneqanngippata, pinngitsaaliissummik naammassinnitsitsiniarnissamut tunngavissaqalerniarluni eqqartuussivinnut suliakkiissutigineqartariaqarput.

Ineqarneq pillugu maalaaruteqartarfik aalajangiisinnaassuseqassaaq, siulittaasoq minnerpaamillu ilaasortat marluk imaluunniit taakku sinniisissaat takkussimappata. Maalaaruteqartarfiup aalajangiineri nalinginnaasumik taasinermi amerlanerussuteqarnikkut atuuttussanngortinneqartassapput. Taasinermi marluk isumaqataappata marlullu akerliullutik siulittaasup taasinera aalajangiisuusaaq.

Ineqarneq pillugu maalaaruteqartarfiup aalajangiinera maalaaruteqartumut suliamilu peqataasunut allanut allakkatigut nalunaarutigineqassaaq, tassunga suliap saqqummiunneqarnera aalajangiinermullu tunngavigineqartoq ilanngunneqassallutik.

Ineqarneq pillugu maalaaruteqartarfiup aalajangiineri allaffissornikkut oqartussaasunut allanut suliakkiissutigineqarsinnaanngillat, tassalu maalaaruteqartup ineqarneq pillugu maalaaruteqartarfiup aalajangiinera naammaginngikkuniuk, tamatumalu iliuuseqarfiginissaa kissaatigiguniuk, suliaq eqqartuussivinnut nalinginnaasunut ingerlateqqittariaqarjaa.

Aalajangersakkami siunnersuutigineqarpoq, peqqussut 1. juli 2005 aallarnerfigalugu atuutsinneqalissasoq.

Inissianik attartorneq pillugu Inatsisartut peqqussutaat nr. 5, 31. maj 2001-imeersoq akuersissutigineqarnermi kingorna piffissap ingerlanerani Inatsisartut peqqussutaatigut nr. 18-ikkut, 12. november 2001-imeersukkut, Inatsisartut peqqussutaatigut nr. 2-kkut, 21. maj 2002-meersukkut aamma Inatsisartut peqqussutaatigut nr. 3-kkut, 15. april 2003-meersukkut allanngortinneqartarsimavoq.

Nalunaarutit Inatsisartut peqqussutaat taaneqartut tunngavigalugit atuutsinneqalersut immikkut atorunnaarsinneqarnissamik allannguuteqartinneqarnissamilluunniit tungaannut atuutiinnassapput.

§ 88-imut

Maannamut attartornernik atuuttunik, attartorneq pillugu peqqussutip siulliup 1. januar 1990 aallarnerfigalugu atuutilertera sioqqullugu atuutilersimasunik, aammalu attartornernik atuuttunik, 1. januar 1990-imiit 1. januar 1995-imut attartorneq pillugu peqqussutip tulliup atuutilerfiata nalaani atuutilersimasunik sulii peqarpoq.

Aalajangersagaq aqutigalugu inissianik attartortitsisarnerup assigiimmik iluarsivigineqartarnissaa qulakkeerniarneqarpoq, taamaattorli attartornerni piffissani assigiinngitsuni aallartinneqarsimasuni immikkut pisinnaatitaaffeqarfiusut ajorseriaateqartinneqassanngillat.

Attartornernut attartorneq pillugu peqqussut siullem 1. januar 1990-imi atuutilersoq sioqqullugu aallartinneqarsimasunut tunngatillugu aalajangersakkap atuutilerneratigut attartortut inissiami najugaqarnermik nalaani illup iluani aserfallatsaaliuineq aammalu attartukkaminnit aninerminnut atatillugu inissiap nalinginnaasumik iluarsaaneqarnissaa akisussaaffigisussaannngilaat.

Taamatuttaaq aalajangersakkap atuutilerneratigut inissiani namminerisamik pigisani attartornerit, peqqussutip matuma atuutilernissaa sioqqullugu aallartinneqarsimasunut attartornernut aalajangersakkanut isumaqatigiissutit attartornerup pineqartup atorunnaarsinneqarnissaata tungaanut allanngortinneqaratik ingerlaqqissapput.